

Números irundaya kuaxia Moisés ombopara va'ekue

Números irundaya kuaxia Moisés ombopara va'ekue

Kova'e kuaxia ma Números 'epy va'e, mba'eta omombe'u mokoïgue Moisés heta va'e kuery oipapague. Jypy ma Egito yvy gui Israel kuery oëmba rire Sinai yvyty py ikuai jave py oipapa (capítulo 1). Ha'e gui amboae ma quarenta ma'etý rire Canaã yvy re oopa ta jave py ju oipapa (capítulo 26). Ha'e gui kova'e kuaxia para re oĩ quarenta ma'etý re Israel kuery tekoá e'ýa rupi ikuai jave guare.

Ha'e va'e jave ma Israel kuery nonhe'ẽ rendui jepi okuapy Nhanderuete, neĩ hemimbo'e Moisés voi. Amongue py na'ikyre'ývei, okyje rei ha'e ijayvu rei okuapy Moisés ha'e Nhanderuete rovai. Ha'e rami teĩ Nhanderuete omboaxyá rupi opena porã, ojejavyague operdoa kuerei guive. Moisés ma imbaraete oikovy va'eri ha'e voi peteigue nonhe'ẽ rendu porãi, mba'eta Meribá tekoá py ivai vy nomboetei Nhanderuete heta va'e kuery oendua py. “Ha'e ramo Senhor aipoe'i Moisés ha'e Arão pe: ‘Peẽ kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ý va'ea. Ha'e nunga rupi peẽ ma naperovalvei ma 'rã kova'e kuery ijyvyrã ame'ëague py', he'i” (20.12).

Ha'e gui ma Israel kuery rovaigua kuery ogueru

peteĩ ava Balão ha'e kuery re ijayvu vai aguã. Ha'e rami teĩ Nhanderuete ojoko vy ojeupegua kuery rovai nomombe'u ukai ayvu vai. Ha'e rami 'rãgue py Balão aipoe'i: "Jacó kuery rovai rupi mba'evykyia nda'eve ranhei 'rã, Israel kuery rovai mba'ekuaa ndovarei 'rã", he'i (23.23a). Ha'e ramia py Nhanderuete oepy kuerei 'rã ojeupegua kuery.

Moisés pe Israel kuery rery rupi Nhanderuete oipapa ukapaague

¹ Egito vvy gui Israel kuery oje'oipa rire mokoĩ ma'etýa re, mokoĩ jaxyá, jypy araa py ma SENHOR ijayvu Moisés pe, Sinai vvyty katy'i tekoa e'ýa oĩ va'e py. Oguy nhemboaty oĩaty oĩ va'e py aipoe'i:

² — Pemboparapa ke Israel kuery rery ha'e javi, peteĩ-teĩ ta'y va'e, ha'e tamoĩ kuery ro pygua ikuai rami vy. Avakue ha'e javi 'rã peipapa peteĩ-teĩ rery rupi.

³ Vinte ma'etý oguereco va'e guive 'rã peipapa tujakue peve, Israel regua joe opu'ã aguã ikuai kuaa va'e meme, ha'e va'e kuery ae ndee ha'e Arão reve peipapa 'rã xondaro kueryrã peteĩ-teĩ regua gui.

⁴ Peteĩ-teĩ regua ikuai va'e gui oiko avi 'rã peteĩ ava penepytyvõarã, nguu ro pygua kuery ruvixa ae.

⁵ Po rami ma avakue penepytyvõa rery: Rúben ramymino kuery ruvixa ma Sedeur ra'y Elizur;

⁶ Simeão ramymino kuery ruvixa ma Zurisadai ra'y Selumiel;

⁷ Judá ramymino kuery ruvixa ma Aminadabe ra'y Naassom;

⁸ Issacar ramymino kuery ruvixa ma Zuar ra'y Natanael;

⁹ Zebulom ramymino kuery ruvixa ma Helom ra'y Eliabe;

¹⁰ Ha'e gui José ra'y kuery ramymino kuery, Efraim ramymino kuery ruvixa ma Amiúde ra'y Elisama, ha'e rã Manassés ramymino kuery ruvixa ma Pedazur ra'y Gamaliel;

¹¹ Benjamim ramymino kuery ruvixa ma Gideoni ra'y Abidã;

¹² Dã ramymino kuery ruvixa ma Amisadai ra'y Aiezer;

¹³ Aser ramymino kuery ruvixa ma Ocrã ra'y Pagiel;

¹⁴ Gade ramymino kuery ruvixa ma Deuel ra'y Eliasafe;

¹⁵ Naftali ramymino kuery ruvixa ma Enã ra'y Aira.

¹⁶ Ha'e va'e kuery ma heta va'e kuery mbyte gui oiporavo pyre, tamoi kuery ramymino kuery yvateve va'e, Israel kuery mbovy rei e'ÿ ikuai va'e ruvixarã.

¹⁷ Ha'e ramo ha'e va'e avakue hery rupi oiporavoa ramo Moisés ha'e Arão ogueraa.

¹⁸ Ha'e vy mokoï jaxyá jypy'ia ára py heta va'e kuery omboatypa ramo ha'e kuery omombe'u porâve okuapy peteñ-teñ regua ramoï kuery rery, tuu ha'e ta'y kuery. Hery rupi oipapa vinte ma'etÿ oguereko va'e guive tujakue peve.

¹⁹ Moisés pe SENHOR ojapo ukaague rami vy oipapa Sinai yvyty katy'i tekao e'ÿa oĩ va'e py.*

²⁰ Israel ra'y jypykue Rúben ramymino kuery, peteñ-teñ hoo pygua kuery ikuiaia rami, tuu ha'e

* **1:19** Sinai yvyty áry SENHOR lei oeja raka'e (Êxodo 19.1-6).

ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

21 Ha'e vy Rúben ramymino kuery oipapa rã quarenta e seis mil e quinhentos ha'e javi vy.

22 Ha'e gui Simeão ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

23 Ha'e vy Simeão ramymino kuery oipapa rã cinqüenta e nove mil e trezentos ha'e javi vy.

24 Ha'e gui ma Gade ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

25 Ha'e vy Gade ramymino kuery oipapa rã quarenta e cinco mil seiscentos e cinqüenta ha'e javi vy.

26 Ha'e gui Judá ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

27 Ha'e vy Judá ramymino kuery oipapa rã setenta e quatro mil e seiscentos ha'e javi vy.

28 Ha'e gui Issacar ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

29 Ha'e vy Issacar ramymino kuery oipapa rã cinqüenta e quatro mil e quatrocientos ha'e javi vy.

30 Ha'e gui Zebulom ramymino kuery ju, peteĩ-teĩ hoo pygua kuery ikuaria rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

31 Ha'e vy Zebulom ramymino kuery oipapa rã cinqüenta e sete mil e quatrocientos ha'e javi vy.

32 Ha'e gui José ra'y kuery ju, Efraim ramymino kuery ranhe, peteĩ-teĩ hoo pygua kuery ikuaria rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

33 Ha'e vy Efraim ramymino kuery oipapa rã quarenta mil e quinhentos ha'e javi vy.

34 Manassés ramymino kuery ju, peteĩ-teĩ hoo pygua kuery ikuaria rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

35 Ha'e vy Manassés ramymino kuery oipapa rã trinta e dois mil e duzentos ha'e javi vy.

36 Ha'e gui Benjamim ramymino kuery ju, peteĩ-teĩ hoo pygua kuery ikuaria rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

37 Ha'e vy Benjamim ramymino kuery oipapa rã trinta e cinco mil e quatrocientos ha'e javi vy.

38 Ha'e gui Dã ramymino kuery ju, peteĩ-teĩ hoo pygua kuery ikuaria rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ

oguereko va'e guive tujakue peve oipapa joe opu'ã kuaa va'e meme.

39 Ha'e vy Dã ramymino kuery oipapa rã sessenta e dois mil e setecentos ha'e javi vy.

40 Ha'e gui Aser ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etý oguereko va'e guive tujakue peve oipapa joe opu'ã kuaa va'e meme.

41 Ha'e vy Aser ramymino kuery oipapa rã quarenta e um mil e quinhentos ha'e javi vy.

42 Ha'e gui Naftali ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etý oguereko va'e guive tujakue peve oipapa joe opu'ã kuaa va'e meme.

43 Ha'e vy Naftali ramymino kuery oipapa rã cinqüenta e três mil e quatrocentos ha'e javi vy.

44 Ha'e va'e kuery ma Moisés ha'e Arão oipapa va'ekue. Israel kuery yvatekueve ikuai va'e ma doze avakue, peteĩ-teĩ tamoĩ kuery ro pygua kuery ruvixa oiko.

45 Ha'e rami vy Israel kuery ha'e javi oipapaa peteĩ-teĩ hoo pygua kuery ikuiaia rami. Peteĩ-teĩ ava vinte ma'etý oguereko va'e guive tujakue peve oipapa joe opu'ã kuaa va'e meme.

46 Oipapa pyre ha'e javi vy ma seiscentos e três mil quinhentos e cinqüenta.

Levita kuery regua ndoipapaaigue

47 Ha'e rã levita kuery regua ma ndoipapaaai tuu kuery regua ikuiaia rami, amboae kuery oipapaa rami e'ý,

48 mba'eta Moisés pe SENHOR ijayvu ma voi vy aipoe'i va'ekue:

49 “Levita kuery regua anho 'rã nderepapai, ha'e kuery rery ma voi neremboparai 'rã Israel kuery rery mboae ikuai py.

50 Ha'e rami 'rãgue py levita kuery ma remoĩ 'rã ombojeroviaaty xeayvu oĩa va'e re opena va'erã, tembiporu ikuai va'e ha'e hexegua ha'e javi re. Ha'e kuery ikuai 'rã ombojeroviaaty oguerova heravy aguã rami, hexegua tembiporu ha'e javi reve. Ombojeroviaaty ropy rupi ae 'rã ha'e kuery opena okuapy, ha'e ijyvýry rupi 'rã ikuai.

51 Ha'e gui ombojeroviaaty oguerova ta jave ma levita kuery ombovaipa 'rã. Ha'e gui tekoा mbyte py ju omopu'ã aguã ma levita kuery ae ju 'rã omoatyrõ. Ha'e rã amboae regua hexe onhemboja vy omano 'rã.

52 Ha'e gui Israel kuery ma peteĩ-teĩ ngoorã ojapo 'rã guekoa py ae, peteĩ-teĩ regua joa py ae 'rã ikuai, ojeupeguá bandeira yvýry rupi.

53 Ha'e rã levita kuery ma ngoorã ojapo 'rã okuapy ombojeroviaaty xeayvu oĩa va'e yvýry rupi ae, Israel kuery áry ou e'ŷ aguã imbopagaarã. Ha'e rami vy levita kuery ae 'rã opena okuapy ombojeroviaaty xeayvu oĩa va'e re”, he'i va'ekue.

54 Ha'e ramo Israel kuery ojapo ha'e rami. Moisés pe SENHOR ojapo ukaague ha'e javi rupi ikuai.

2

Tekoा rupi peteĩ-teĩ regua ikuai aguã re ijayvuague

1 SENHOR aipoe'i Moisés ha'e Arão pe:

² — Israel kuery ikuai 'rã peteĩ-teĩ regua bandeira 'y yvýry rupi ae. Peteĩ-teĩ regua bandeira re ma tamoĩ kuery kuaa ukaarã oĩ. Oguy nhemboaty ołaty oĩ va'e yvýry rupi 'rã hekaoa, ha'e va'e katy peteĩ-teĩ regua oma'ẽ okuapy aguã rami.

³ Kuaray oua katy ikuai 'rã Judá regua kuery ojeupegua bandeira 'y yvýry, peteĩ-teĩ regua joa py ae. Judá ra'y kuery ruvixarã oĩ 'rã Aminadabe ra'y Naassom.

⁴ Ha'e kuery va'e regua xondaro kuery oipapaa rã setenta e quatro mil seiscentos ha'e javi vy.

⁵ Ha'e kuery yvýry ikuai 'rã Issacar regua kuery. Ha'e va'e kuery ruvixarã oĩ 'rã Zuar ra'y Natanael.

⁶ Ha'e kuery va'e regua xondaro kuery oipapaa rã cinqüenta e quatro mil e quatrocientos ha'e javi vy.

⁷ Ha'e gui Zebulom regua kuery jevy 'rã ikuai. Ha'e va'e kuery ruvixarã oĩ 'rã Helom ra'y Eliabe.

⁸ Ha'e kuery va'e regua xondaro kuery oipapaa rã cinqüenta e sete mil e quatrocientos ha'e javi vy.

⁹ Judá regua kuery rekoaa py oipapaa rã cento e oitenta e seis mil e quatrocientos ha'e javi vy, amboae regua irũ kuery reve. Ha'e kuery ma tenondeguia 'rã oje'oi.

¹⁰ Ha'e gui kuaray puku-a katy 'rã ikuai Rúben regua kuery ojeupegua bandeira 'y yvýry, peteĩ-teĩ regua joa py ae. Rúben ra'y kuery ruvixarã oĩ 'rã Sedeur ra'y Elizur.

¹¹ Ha'e kuery va'e regua xondaro kuery oipapaa rã quarenta e seis mil e quinhentos ha'e javi vy.

¹² Ha'e kuery yvýry ma ikuai 'rã Simeão regua kuery. Ha'e va'e kuery ruvixarã oĩ 'rã Zurisadai ra'y Selumiel.

13 Ha'e kuery va'e regua xondaro kuery oipapaa rã cinqüenta e nove mil e trezentos ha'e javi vy.

14 Ha'e gui ma Gade regua kuery jevy 'rã ikuai. Ha'e va'e kuery ruvixarã oĩ 'rã Deuel ra'y Eliasafe.

15 Ha'e kuery va'e regua xondaro kuery oipapaa rã quarenta e cinco mil seiscentos e cinqüenta ha'e javi vy.

16 Rúben regua kuery rekoa py oipapaa rã cento e cinqüenta e um mil quatrocetros e cinqüenta ha'e javi vy, amboae regua irũ kuery reve. Ha'e kuery ma tenondegua rakykue 'rã oje'oi.

17 Ha'e gui mae ma oguerovaa 'rã heravy oguy nhemboaty oĩaty. Levita kuery ikuai va'e amboae kuery mbyte py 'rã oje'oi. Ha'e kuery ikuiaia ramiae 'rã oje'oi oguataa rupi. Peteĩ-teĩ regua oje'oi 'rã ikuai aguã py ae, ojeupeguia bandeira rakykue.

18 Ha'e gui kuaray oikea katy ikuai 'rã Efraim regua kuery ojeupeguia bandeira 'y yvýry, peteĩ-teĩ regua joa py ae. Efraim ra'y kuery ruvixarã oĩ 'rã Amiúde ra'y Elisama.

19 Ha'e kuery va'e regua xondaro kuery oipapaa rã quarenta mil e quinhentos ha'e javi vy.

20 Ha'e va'e kuery yvýry ikuai 'rã Manassés regua kuery. Ha'e va'e kuery ruvixarã oĩ 'rã Pedazur ra'y Gamaliel.

21 Ha'e kuery va'e regua xondaro kuery oipapaa rã trinta e dois mil e duzentos ha'e javi vy.

22 Ha'e gui ma Benjamim regua kuery jevy 'rã ikuai. Ha'e va'e kuery ruvixarã oĩ 'rã Gideoni ra'y Abidã.

23 Ha'e kuery va'e regua xondaro kuery oipapaa rã trinta e cinco mil e quatrocetros ha'e javi vy.

²⁴ Efraim regua kuery rekoaa py oipapaa rā cento e oito mil e cem ha'e javi vy, amboae regua irū kuery reve. Ha'e kuery ma mboapya py 'rā oje'oi.

²⁵ Ha'e gui kuaray apu'aa katy ikuai 'rā Dā regua kuery ojeupegua bandeira 'y yvýry, peteī-teī regua joa py ae. Dā ra'y kuery ruvixarā oī 'rā Amisadai ra'y Aiezer.

²⁶ Ha'e kuery va'e regua xondaro kuery oipapaa rā sessenta e dois mil e setecentos ha'e javi vy.

²⁷ Ha'e va'e kuery yvýry ikuai 'rā Aser regua kuery. Ha'e va'e kuery ruvixarā oī 'rā Ocrā ra'y Pagiel.

²⁸ Ha'e kuery va'e regua xondaro kuery oipapaa rā quarenta e um mil e quinhentos ha'e javi vy.

²⁹ Ha'e gui ma Naftali regua kuery jevy 'rā ikuai. Ha'e va'e kuery ruvixarā oī 'rā Enā ra'y Aira.

³⁰ Ha'e kuery va'e regua xondaro kuery oipapaa rā cinqüenta e três mil e quatrocentos ha'e javi vy.

³¹ Dā regua kuery rekoaa py oipapaa rā cento e cinqüenta e sete mil e seiscentos ha'e javi vy, amboae regua irū kuery reve. Ha'e kuery ma opa vygua 'rā oje'oi, peteī-teī regua ojeupegua bandeira rakykue.

³² Ha'e va'e kuery ma Israel kuery regua oipapa pyre, tamoī kuery ikuai va'e-va'e rupi. Oipapa pyre ha'e javi vy ma seiscentos e três mil quinhentos e cinqüenta, peteī-teī regua joa py ikuai rami.

³³ Ha'e rā levita kuery ma ndoipapaai Israel kuery oipapaa py, Moisés pe SENHOR ijayvuague rami vy.

³⁴ Ha'e rami ae Israel kuery ikuai. Moisés pe SENHOR ijayvuague rami ae ikuai ojeupegua bandeira

'y yvýry rupi. Ha'e rami ae avi oguata oje'oivy, peteĩ-teĩ regua nguu ro pygua kuery reve.

3

Levita kuery mbovy pa ikuai, ha'e hembiaporã re ijayvuague

¹ Ha'e gui pova'e kuery ma Arão ha'e Moisés ra'y kuery ikuai, Sinai yvpty áry Moisés pe SENHOR ijayvu jave guare.

² Po rami ae Arão ra'y kuery rery: ta'y jypykue ma Nadabe, ha'e gui ma Abiú, Eleazar ha'e Itamar.

³ Po rami Arão ra'y kuery rery, sacerdote-rã omoi mbyre meme ikuai, sacerdote-rã omboaxaa rire.

⁴ Ha'e rami teĩ Nadabe ha'e Abiú omano raka'e SENHOR renonde py, Sinai regua tekao e'ÿa py SENHOR renonde tata ha'eve'ÿa ramigua ogueroike ramo. Ta'y e'ÿ re omano raka'e. Ha'e rã tyvy kuery Eleazar ha'e Itamar ju sacerdote ikuai nguu Arão renonde.

⁵ SENHOR aipoe'i Moisés pe:

⁶ — Emonhemboja ke Levi regua kuery sacerdote Arão renonde py ipytyvõarã.

⁷ Ha'e kuery tojapo mba'emo ixupe, ha'e heta va'e kuery oguy nhemboaty oñaty renonde rupi ikuai va'e ha'e javi re vy, ombojeroviaaty ropy rupi ombo'eapoa py.

⁸ Ha'e kuery opena 'rã tembiporu oguy nhemboaty oñaty pygua ha'e javi re. Ha'e vy 'rãe ojapopa ojapo 'rã va'ekue Israel kuery re vy, ombojeroviaaty rupi ombo'eapoa py.

⁹ Ha'e nunga rupi levita kuery remboaxa 'rã Arão ha'e ta'y kuery peguarã. Israel kuery regua ixupe remboaxa va'erã ha'e kuery anho.

¹⁰ Ha'e rã Arão ha'e ta'y kuery pe ndeayvu 'rã sacerdote rami anho om̄ba'epo aguã re. Ha'e rã amboae regua ri onhemboja vy ma omano 'rã — he'i.

¹¹ SENHOR aipoe'i Moisés pe:

¹² — Ma'ẽ, levita kuery ma xee aipe'a va'ekue Israel kuery mbyte gui. Israel kuery jypy'i oiko'i va'e nhavõ rekoria ma levita kuery aiporavo xejeupe guarã. Ha'e rami rire levita kuery xevyguia meme 'rã ikuai.

¹³ Mba'eta jypy'i oiko va'e nhavõ ma xevyguia ae. Egito yvy py jypy'i oiko va'ekue ajukapa ára guive ma Israel kuery va'e regua jypykue'i amboaxapa xejeupe guarã, avakue ha'e mymba kuery voi. Xevy guarã meme ikuai. Xee ma SENHOR — he'i.

¹⁴ Ha'e gui Sinai regua tekoa e'ŷa py SENHOR ijayvu Moisés pe. Ha'e vy aipoe'i:

¹⁵ — Reipapa 'rã Levi ramymino kuery peteĩ-teĩ tamymino kuery rery rupi, tuu ha'e ta'y kuery reve. Avakue ha'e javi 'rã reipapa, peteĩ jaxy oguereko va'e guive tujapave peve — he'i.

¹⁶ Ha'e ramo SENHOR ijayvuague rami vy Moisés oipapa levita kuery, ixupe oipapa ukaague rami ae.

¹⁷ Po rami ma Levi ra'y kuery rery: Gérson, Coate ha'e Merari.

¹⁸ Ha'e gui povae ma Gérson ra'y kuery rery, peteĩ-teĩ ta'y kuery reve: Libni ha'e Simei.

¹⁹ Ha'e gui Coate ra'y kuery, ta'y kuery reve ma Anrão, Izar, Hebrom ha'e Uziel.

²⁰ Ha'e gui Merari ra'y kuery, ta'y kuery reve ma Mali ha'e Musi. Ha'e va'e kuery ae Levi ramymino kuery, guamoĩ kuery rery rupi.

²¹ Gérson ramymino kuery ma Libni ha'e Simei ra'y kuery, Gérson re tamoī va'e meme.

²² Ha'e kuery regua avakue peteī jaxy oguereko va'e guive tujapave peve ma hery rupi oipapaa rā sete mil e quinhentos ha'e javi vy.

²³ Ha'e gui Gérson ramymino kuery ma ombojeroviaaty kupe rupi 'rā ngoorā ojapo, kuaray oikea katy.

²⁴ Gérson ramymino kuery ruvixarā ma Lael ra'y Eliasafe ikuai 'rā.

²⁵ Gérson ramymino kuery opena 'rā okuapy oguy nhemboaty oīaty re, ombojeroviaaty, oo ha'e ijao'ia re, ha'e oguy nhemboaty oīaty rokērā ajukue oī va'e re,

²⁶ ajukue oka ombojeroviaaty ha'e altar yvýry rupi ikuai va'e re, oka rokērā ajukue oī va'e re, ha'e gui ixā ikuai va'e re. Ha'e nunga ha'e javi rupi ombo'eapo aguā rami ikuai.

²⁷ Ha'e gui Coate ramymino kuery ma Anrāo, Izar, Hebrōm ha'e Uziel ra'y kuery. Ha'e va'e kuery ma Coate re tamoī va'e meme.

²⁸ Ha'e kuery regua avakue peteī jaxy oguereko va'e guive tujapave peve ma oipapaa rā oito mil e seiscentos ha'e javi vy. Ha'e kuery ma henda iky'a e'ŷ va'e re opena aguā rami ikuai.

²⁹ Ha'e gui Coate ramymino kuery ma ombojeroviaaty yke katy rupi 'rā ngoorā ojapo, kuaray puku-a katy.

³⁰ Coate ramymino kuery ruvixarā oī 'rā Uziel ra'y Elisafā.

³¹ Ha'e kuery ma xeayvu ryru re opena aguā rami ikuai, mesa oī va'e, tataendy 'y, altar ha'e javi re, tembiporu henda iky'a e'ŷ va'e rupi oiporu va'ety

ha'e ajukue okērā oī va'e re. Ha'e nunga ha'e javi re opena aguā rami ikuai.

³² Levi ramymino kuery ruvixa yvateve va'e ma sacerdote Arão ra'y Eleazar. Ha'e va'e ma opena 'rā henda iky'a e'ŷ va'e ropy rupi omба'eapo va'e kuery re.

³³ Ha'e gui Merari ramymino kuery ma Mali ha'e Musi ra'y kuery. Ha'e va'e kuery ae Merari re tamoī va'e meme.

³⁴ Ha'e kuery regua avakue peteī jaxy oguereko va'e guive tujapave peve ma oipapaa rā seis mil e duzentos ha'e javi vy.

³⁵ Ha'e gui Merari ramymino kuery ruvixarā oī 'rā Abiai'l ra'y Zuriel. Ha'e kuery ma ombojeroviaaty yke katy rupi 'rā ngoorā ojapo, kuaray apu'a'ia katy.

³⁶ Merari ra'y kuery omoñague rami vy opena 'rā okuapy yvyra pe ombojeroviaaty regua ikuai va'e re, ha'e gui ijyta'i, ijyta, ijyta yvypy ha'e tembiporu ikuai va'e re. Ha'e va'e ha'e javi re opena aguā rami ikuai,

³⁷ ha'e gui ijyvýry oka rupi ijyta ikuai va'e re, ijyta yvypy, yvyra rakua, ha'e ixā ikuai va'e ha'e javi re.

³⁸ Ha'e gui ombojeroviaaty renonde kuaray oua katy Moisés ha'e Arão ojapo 'rā ngoorā gua'y kuery reve, oguy nhemboaty oñaty renonde kuaray oua katy ae. Ha'e va'e kuery ma henda iky'a e'ŷ va'e ropy rupi 'rā omба'eapo, omoñague rami vy. Omба'eapo 'rā Israel kuery re oma'ē vy. Ha'e rā amboae regua ri onhemboja vy omano 'rā.

³⁹ Ha'e gui levita kuery regua avakue peteī jaxy oguereko va'e guive tujapave peve ma oipapaa rā vinte e dois mil ha'e javi vy. SENHOR ojapo

ukaague rami vy Moisés ha'e Arão oipapa, ta'y kuery ha'e javi reve.

Jypy oiko'i va'ekue rekovia ome'ẽ mbyrã re ijayvuague

40 SENHOR aipoe'i Moisés pe:

— Eipapa ta'y jypykue'i avakue Israel kuery regua. Peteĩ-teĩ hery rupi 'rã reipapa peteĩ jaxy oguereko va'e guive tujapave peve.

41 Ha'e rami avi Israel kuery jypykue'i va'e rekovia xejeupe guarã amboaxa ma levita kuery. Xee ma SENHOR. Ha'e rami ae avi levita kuery rymba kuery xejeupe guarã amboaxa 'rã Israel kuery rymba kuery jypykue'i va'ekue rekovia — he'i.

42 Ha'e ramo SENHOR ojapo ukaague rami vy Moisés oipapa jypykue'i Israel kuery regua ha'e javi.

43 Ha'e kuery regua avakue jypykue'i va'e peteĩ jaxy oguereko va'e guive tujapave peve ma hery rupi oipapaa rã vinte e dois mil duzentos e setenta e três ha'e javi vy.

44 Ha'e gui SENHOR aipoe'i Moisés pe:

45 — Israel kuery regua ta'y jypykue'i rekovia emboaxa ke levita kuery xevy guarã, ha'e Israel kuery rymba kuery rekovia emboaxa avi levita kuery rymba ikuai va'e. Mba'eta levita kuery ma xevy guarã meme ikuai. Xee ma SENHOR.

46 Ha'e gui ikuai avi duzentos e setenta e três jypykue Israel kuery regua, levita kuery gui het-ave va'e. Ha'e va'e kuery remboekovia aguã ma

47 peteĩ-teĩ repyrã rejopy 'rã cinco hatã'i va'e. Henda iky'a e'ŷ va'e py hatã'i va'e oiporua va'e regua ae 'rã reiporu, doze gramas va'e meme.

48 Ha'e va'e peráta reme'ẽ 'rã Arão ha'e ta'y kuery pe, hetave va'e kuery repyrã — he'i.

49 Ha'e va'e peráta ma Moisés ojopy levita kuery gui Israel kuery jypykue'i hetave ikuai va'e repyrã.

50 Israel kuery jypykue'i gui ae ojopy, mil trezentos e sessenta e cinco hatã'i va'e ha'e javi vy, henda iky'a e'ŷ va'e py oiporua va'e rami.

51 Ha'e va'e peráta SENHOR ome'ẽ ukaague rami vy Moisés ome'ẽ ha'e kuery repyrã. Arão ha'e ta'y kuery pe ome'ẽmba, Moisés pe SENHOR ojapo ukaague rami vy.

4

Coate ramymino kuery rembiaporã re ijayvuague

1 Ha'e gui SENHOR aipoe'i Moisés ha'e Arão pe:

2 — Pemboparapa ke Levi ra'y Coate ramymino kuery rery, ta'y kuery ha'e tuu ro rupigua kuery ikuai va'e reve.

3 Trinta ma'etŷ va'e guive cinqüenta ma'etŷ oguereko va'e peve ha'e va'e kuery ombo'eapo aguã rami ikuai 'rã, onhemboaty aty ropy rupi mba'emo ojapo aguã.

4 Po rami ae 'rã Coate ra'y kuery ombo'eapo oguy nhemboaty oĩaty rupi, mba'emo iky'a e'ŷ ete va'e re opena vy.

5 Ha'e gui heta va'e kuery ikuai va'e ova ta ma ramo Arão gua'y kuery reve ou vy omboi 'rã ajukue okẽ regua xeayvu ryru oĩa mbotyarã omoĩ mbyre, ha'e vy ha'e va'e py onhovã 'rã hyru.

6 Ha'e va'e áry rupi ma omoĩ 'rã mba'emo pirekue iporãve va'e, ha'e gui hi'áry jevy rupi omoĩ 'rã peteĩ

ajukue hovypa rei va'e. Ha'e gui mae ma jovaive rupi 'rã omoõ yvyra po'i oupi heravy aguã.

⁷ Ha'e rami ae avi mesa mbojape xerenonde omoõ mbyre ikuaiaty áry voi omoõ 'rã peteõ ajukue hovypa va'e. Ha'e va'e áry ju omoõ 'rã hy'a, heakuã porã va'e ryrurã, karo, ha'e gui mba'emo ryru kyrĩ'i va'e. Hi'áry ikuai tema avi 'rã mbojape xerenonde ikuai riae va'erã.

⁸ Ha'e nunga ha'e javi áry rupi omoõ 'rã ajukue pytã porâve va'e, ha'e ojao'i 'rã mba'emo pirekue iporâve va'e py. Ha'e gui ma jovaive rupi omoõ avi 'rã yvyra po'i.

⁹ Ha'e gui ma ajukue hovy va'e oupi vy ojao'i 'rã imoiny tataendy 'y hi'aõ va'e, tataendy ikuai va'e, tapyõ pejua, imboguea, ha'e gui tykuerã azeite ryru ikuai va'e ha'e javi.

¹⁰ Tataendy 'y, ha'e hexegua tembiporu ikuai va'e ha'e javi ojao'ipa 'rã mba'emo pirekue iporâve va'e py. Ha'e gui ma omoõmba 'rã yvyra po'i áry rupi.

¹¹ Ha'e gui ma altar ouro guigua áry rupi omoõ 'rã peteõ ajukue hovy va'e, ha'e ojao'i 'rã mba'emo pirekue iporâve va'e py. Ha'e gui ma yvyra po'i jevy 'rã omoõ jovaive rupi.

¹² Ha'e gui ma oguerupa 'rã tembiporu henda iky'a e'ý va'e rupi oiporua va'e ha'e javi. Ha'e nunga voi onhovã 'rã ajukue hovy va'e py, ha'e ojao'i avi 'rã mba'emo pirekue iporâve va'e py. Ha'e gui omoõmba 'rã yvyra po'i áry rupi.

¹³ Ha'e gui altar ryepy gui oipe'a 'rã tanhimbu oï va'e, ha'e hi'áry ma omoõ 'rã peteõ ajukue pytã va'e.

¹⁴ Ha'e va'e áry jevy omoõmba 'rã altar rupi tembiporu oiporupy ha'e javi: tapyõ ryru, kuxa rakua va'e, kuxa guaxu ha'e hy'a guaxu ikuai va'e, ha'e

altar rupi tembiporu oiporupy ha'e javi. Ha'e gui hi'áry rupi ma omoĩ 'rã mba'emo pirekue iporâve va'e. Ha'e gui ma joavaive rupi omoĩ 'rã yvyra po'i.

15 — Ha'e gui tekaoa gui oje'oipa ta ramo Arão ha'e ta'y kuery henda iky'a e'ŷ va'e ha'e hexegua mba'emo ikuai va'e ojao'ipa ma rire Coate ra'y kuery ju 'rã ou ogueraapa aguã. Ha'e rã mba'emo iky'a e'ŷ va'e re ma ha'e kuery ndopokoi 'rã, omano e'ŷ aguã. Mba'emo oguy nhemboaty oĩaty regua anho 'rã ha'eve Coate ra'y kuery ogueraa aguã.

16 Ha'e gui sacerdote Arão ra'y Eleazar ma tataendy rykuerã azeite oĩ va'e re opena 'rã, ha'e gui heakuã porã va'e re, mba'emo aju guigua ome'ẽ jepi aguã, azeite SENHOR pe nhomboaxaa aguã regua re. Ha'e rami ae 'rã opena ombojeroviaaty re, ha'e gui ha'e py ikuai va'e ha'e javi re, henda iky'a e'ŷ va'e ropy rupi mba'emo ikuai va'e re guive — he'i.

17 Ha'e ramo SENHOR aipoe'i Moisés ha'e Arão pe:

18 — Peja eme Coate ramymino kuery ojapo aguã, levita kuery mbyte gui okanhymba aguã rami.

19 Pova'e ae 'rã pejapo ha'e kuery okuave aguã, mba'eta mba'emo iky'a e'ŷ ete va'e ikuai katy onhemboja vy ha'e kuery omanomba 'rã. Arão ha'e ta'y kuery anho 'rã ha'e py oike, peteĩ-teĩ rembiaporã ome'ẽ aguã.

20 Ha'e rã Coate kuery ma neĩ xapy'a'i voi nda'evei oike aguã ha'e py mba'emo iky'a e'ŷ va'e oexa aguã, ha'e kuery omano e'ŷ aguã.

Gérson ramymino kuery rembiaporā re ijayvuague

21 Ha'e gui SENHOR aipoe'ive ju Moisés pe:

22 — Aŷ ma pemboparapa ke Gérson ramymino kuery rery, ta'y kuery ha'e tuu ro rupigua kuery ikuai va'e reve.

23 Trinta ma'etŷ va'e guive cinqüenta ma'etŷ oguereko va'e peve ha'e va'e kuery ombo'eapo aguã rami ikuai 'rã, oguy nhemboaty oĩaty roka rupi opena aguã.

24 Gérson ramymino kuery rembiaporā ma mba'emo re opena ha'e ogueraa aguã.

25 Oguerovapa 'rã ajukue ombojeroviaaty ha'e oguy nhemboaty oĩaty mbotyarã oipyo pyre, ha'e gui ijao'ia, hi'ary rupi mba'emo pirekue iporâve va'e py onhovã mbyre, okẽ reguarã ajukue omoĩ mbyre,

26 ombojeroviaaty, altar yvýry rupi ajukue oka mbotyarã oupi pyre, oka rokẽrã ajukue omoĩ mbyre, ixã-ixã ha'e tembiporu ikuai va'e. Ha'e nunga ha'e javi re openaa rupi 'rã ha'e kuery ombo'eapo.

27 Gérson ramymino kuery mba'emo ogueraa e'ŷ vy ojapo aguã ha'e javi ma Arão ha'e ta'y kuery ojapo ukaa rami 'rã ojapo. Arão kuery ae 'rã oguerova uka mba'emo.

28 Ha'e rami ae Gérson ra'y kuery ombo'eapo 'rã oguy nhemboaty oĩaty rupi. Sacerdote Arão ra'y Itamar ijayvua rami anho 'rã ombo'eapo okuapy.

Merari ramymino kuery rembiaporā re ijayvuague

29 — Ha'e gui Merari ramymino kuery reipapa avi 'rã ta'y kuery ha'e tuu ro rupigua kuery ikuai va'e reve.

30 Trinta ma'etÿ va'e guive cinqüenta ma'etÿ oguereko va'e peve ha'e va'e kuery ombo'eapo aguã rami 'rã ikuai, oguy nhemboaty oñaty rupi ombo'eapo aguã.

31 Pova'e nunga ha'e kuery oguerova 'rã oguy nhemboaty oñaty rupi ombo'eapo vy: yvyra peombojeroviaaty mbotyarã omoñ mbyre, yvate rupi ikuai va'e, ijytarã omopu'ã mbyre, ijyta yvypy ikuai va'e,

32 oka yvýry rupi ijytarã omopu'ã mbyre, ijyta yvypy, yvyra rakua, ixã-ixã, tembiporu ha'e opa mba'e ha'e rupi oiporupy ha'e javi. Mba'emo ha'e kuery oguerova va'erã rery remombe'upa 'rã.

33 Ha'e rami ae 'rã Merari ramymino kuery ombo'eapo oguy nhemboaty oñaty rupi, sacerdote Arão ra'y Itamar ijayvua rami anho.

Coate ra'y kuery oipapaa ague

34 Ha'e gui Moisés ha'e Arão heta va'e kuery yvatekueve reve oipapapa Coate ra'y kuery, ta'y kuery ha'e tuu ro rupigua kuery ikuai va'e reve.

35 Trinta ma'etÿ va'e guive cinqüenta ma'etÿ oguereko va'e peve oipapa hembiaporã ome'ẽ aguã, oguy nhemboaty oñaty rupi mba'emo ojapo aguã.

36 Ha'e va'e kuery oipapa rã dois mil setecentos e cinqüenta ha'e javi vy, tuu ro rupigua kuery ikuai rami.

37 Ha'e kuery ae Coate ramymino kuery oipapa pyre, oguy nhemboaty oñaty rupi ombo'eapo

va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

Gérson ramymino kuery oipapaa ague

38 Ha'e gui Gérson ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

39 trinta ma'etÿ va'e guive cinqüenta ma'etÿ oguereko va'e peve hembiaporã ome'ẽ aguã, oguy nhemboaty oñaty rupi mba'emo ojapo aguã.

40 Ha'e va'e kuery oipapa rã dois mil seiscentos e trinta ha'e javi vy, tuu ro rupigua kuery ikuiaia rami.

41 Ha'e kuery ae Gérson ramymino kuery oipapa pyre, oguy nhemboaty oñaty rupi om̄ba'epo va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

Merari ramymino kuery oipapaa ague

42 Ha'e gui Merari ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

43 trinta ma'etÿ va'e guive cinqüenta ma'etÿ oguereko va'e peve hembiaporã ome'ẽ aguã, oguy nhemboaty oñaty rupi mba'emo ojapo aguã.

44 Ha'e va'e kuery oipapa rã três mil e duzentos ha'e javi vy, tuu ro rupigua kuery ikuiaia rami.

45 Ha'e kuery ae Merari ramymino kuery oipapa pyre. Moisés ha'e Arão ae oipapa, Moisés pe SENHOR ojapo ukaague rami vy.

Levita regua kuery anho'i mbovy pa ikuiaia re ijayvuague

46 Ha'e rami py Moisés ha'e Arão Israel kuery yvatekueve reve oipapa levita regua kuery, ta'y kuery ha'e tuu ro rupigua kuery ikuai va'e reve,

47 trinta ma'etŷ va'e guive cinqüenta ma'etŷ oguereko va'e peve, hembiaporã ome'ẽ aguã, oguy nhemboaty oñaty rupi mba'emo ojapo aguã.

48 Ha'e va'e kuery oipapa rã oito mil quinhentos e oitenta ha'e javi vy.

49 Moisés pe SENHOR ojapo ukaague rami vy peteî-teî omoï guembiaporã rupi ombo'eapo aguã. Ha'e rami aguã ae ha'e kuery oipapa, Moisés pe SENHOR ojapo ukaague rami vy.

5

*Tekoa gui mombyry'i lepra revegua ha'e ha'eve'ŷ
va'e oipe'apaa aguã re ijayvuague*

1 Ha'e gui SENHOR aipoe'i Moisés pe:

2 — Aipo're Israel kuery pe tekoa mbyte gui mombyry'i oipe'apa aguã lepra revegua, ipeupa rei va'e, ha'e omanogue re opokoa py ha'eve'ŷ va'e ikuai va'ekue ha'e javi.

3 Avakue ha'e kunhague voi peipe'a 'rã tekoa gui mombyry'i, penderekoa omongy'apa e'ŷ aguã, mba'eta mbyte rupi xee aiko — he'i.

4 Ha'e ramo Israel kuery ha'e rami ae ojapo okuapy. Ha'e vy guekoa mbyte gui oipe'apa ha'e ramigua kuery. Moisés pe SENHOR ojapo ukaague rami vy Israel kuery ojapo okuapy.

Lei mba'emo rekovia ome'ẽa regua oĩa

5 Ha'e gui SENHOR aipoe'ive ju Moisés pe:

6 — Aipo're Israel kuery pe: Xapy'a rei ava e'ŷ vy kunha mba'e ojejavý 'rã pavẽ ojejavýa py, ha'e

vy otekoavy 'rã SENHOR pe. Ha'e rami vy ha'e va'e ojejavy va'e oiko.

⁷ Ha'e gui ma omombe'u 'rã ojejavyague, ha'e ojejavyague re mba'emo ome'ẽ 'rã otekoavyague rekovia. Ome'eve 'rã guive, peteĩ nhiruĩ repy ovare nhavõ áry peteĩ-teĩ ju 'rã ome'eve. Ha'e nunga ha'e javi ome'ẽ 'rã ojapo vaia va'ekue pe ae.

⁸ Ha'e gui xapy'a rei ha'e va'e omano, ha'e hetarã ete'i nda'ipoi ramo otekoavyague rekovia ome'ẽa 'rã ojopy va'erã, ha'e ramo SENHOR pe ae 'rã ome'ẽ opaga aguã va'ekue. Sacerdote pe togueru peteĩ vexa'i reve, ha'e va'e py ojejavyague ojao'i uka aguã.

⁹ Mba'emo sacerdote pe Israel kuery ogueru va'ekue ha'e javi ma sacerdote pegua ae opyta iky'a e'ŷ va'e.

¹⁰ Peteĩ-teĩ gui mba'emo iky'a e'ŷ va'e ojopy va'ekue ma imba'e ae. Sacerdote pe ogueru pyre ma ixupe ae 'rã opyta.

Kunha otavypaague re oikuua pota aguã re ijayvuague

¹¹ SENHOR aipoe'ive ju Moisés pe:

¹²— Ndeayvu ke Israel kuery pe, ha'e vy aipo're: Xapy'a rei amongue ra'yxy ome gui ojepe'a vy oiko 'rã ome okorea rupi.

¹³ Ava mboae reve itavy rei teĩ onhenhomí ramo ime ndoexai 'rã, ha'eve'ŷa rami oiko teĩ avave rei ndoexaai, neĩ itavy jave voi.

¹⁴ Ha'e gui xapy'a rei ime opy'a re oendu hakâte'ŷ reia, gua'yxy re hakâte'ŷ 'rã kunha va'e itavy rire, ha'e'ŷ vy nda'itavyi teĩ hexe hakâte'ŷ vy ma

¹⁵ ava va'e ogueru 'rã gua'yxy sacerdote-a py. Ogueru avi 'rã mba'emo gua'yxy ojejavya regua ome'ẽ va'erã. Peteĩ ryru cevada ku'ikue ome'ẽ 'rã ha'e va'e re azeite omoĩ e'ŷ re, neĩ heakuã porã va'e ma voi nomoĩ 'rã hi'áry, mba'eta hakâte'ŷ reia regua mba'emo aju guigua ome'ẽmby. Ha'e va'e ma mba'emokue re nhomoma'endu'a aguã regua ome'ẽ, teko vai kuaa ukaarã.

¹⁶ — Ha'e ramo sacerdote kunha va'e omonhemboja vy ogueru 'rã imo'amy SENHOR renonde py.

¹⁷ Ha'e vy sacerdote karo nhae'ũ guigua yy ky'a e'ŷ oĩa va'e oupi vy ojopy avi 'rã yvy ku'ikue ombojeroviaaty ropy rupi ikuai va'e regua. Ha'e va'e ma omoĩ 'rã yy py.

¹⁸ Ha'e vy SENHOR renonde py kunha va'e oexa uka vy omboguejypa 'rã hi'a. Ha'e vy ipo py omoĩ 'rã mba'emo aju guigua imoma'endu'aarã ome'ẽ mbyre, takâte'ŷ regua. Ha'e rã yy iro va'e nhomoingo axyarã ma sacerdote po py ranhe 'rã opyta.

¹⁹ Ha'e gui kunha va'e pe sacerdote oura uka vy aipoe'i 'rã ixupe: “Xapy'a rei ndereve avave rei nonhenoai, ha'e neme oipotaa rami e'ŷ vy ixugui nderejepe'ai ri vy ha'eve'ŷ va'e rejapo aguã, ha'e rami vy kova'e yy iro va'e ayvu vaipy nhomoingoarã gui rey'u teĩ mba'eve ndoikoi 'rã, reo jepe 'rã.

²⁰ Ha'e rami teĩ xapy'a rei neme openaa gui rejape'a vy ha'eve'ŷa rami reiko, ha'e ava neme e'ŷ ri ndereve onheno ramo ma —”

²¹ (ha'e rami vy sacerdote oura uka 'rã kunha va'e pe oiko axy aguã rupi, ha'e vy ixupe aipoe'ive 'rã:) — Ha'e rami ri ramo tove SENHOR tanemoingo ayvu vaipy ha'e ojou vaipy heta va'e kuery

mbyte. Tove SENHOR tandeapo nde'u ivaipa ha'e nderyepy rupi irurupa ovy aguã rami.

22 Ha'e rami vy kova'e yy ayvu vaipy nhomoin-goarã nderyepy rupi oike ramo ta'irurupa, ha'e ta'ivaipa nde'u", he'i 'rã. Ha'e ramo kunha va'e "Ha'eve va'e, ha'eve va'e!" he'i 'rã.

23 — Ha'e gui ha'e va'e ayvu vai sacerdote om-boparapa 'rã peteĩ kuaxia re, ha'e gui ipara om-boje'opa ju 'rã yy iro va'e irûrã.

24 Ha'e vy kunha va'e pe oy'u uka 'rã yy iro va'e ayvu vaipy nhomoingoarã. Ha'e va'e oy'u ramove ma hexe oï 'rã imoingo axyarã.

25 Ha'e gui kunha va'e po gui sacerdote ju ojopy 'rã mba'emo aju guigua takâte'ÿ regua ome'ë mbyre, ha'e SENHOR renonde oupi vy ombovava 'rã. Ha'e gui ma altar hi'aña py ju 'rã ogueraa.

26 Ha'e gui mba'emo aju guigua nhomoma'endu'aarã ome'ë mbyre peteĩ po ojopy vy oapy 'rã altar áry. Ha'e va'e rire yy ome'ë 'rã kunha va'e pe oy'u aguã.

27 Ha'e gui ma ixupe yy oy'u uka ramo, xapy'a rei kunha va'e ojejavy ri vy ha'eve'ÿa rami ome okorea rupi oiko rire ma yy ayvu vaipy nhomoin-goarã hexe oike vy omoingo axy 'rã. Ha'e ramo hyepy rupi irurupa 'rã, ha'e hi'u ivaipa 'rã. Ha'e ramo kunha va'e heta va'e kuery mbyte rupi oiko 'rã ayvu vaipy.

28 Ha'e rami teĩ xapy'a rei kunha va'e mba'eve py ndojejavyi, ha'e hexe ha'eve'ÿ va'e noï ramo oo jepe 'rã, ha'eve ju 'rã kyrî va'e oguereko'i aguã.

29 — Ha'e va'e lei ma takâte'ÿa regua, kunhague ome kuery openaa gui ojepe'a vy ha'eve'ÿa rami oiko ramo guarã,

³⁰ ha'e rami e'ŷ vy ava opy'a re hakăte'ŷa oendu ramo guarã. Ha'e rami vy gua'yxy ogueraa vy SENHOR renonde py oexa uka 'rã, ha'e hexe sacerdote ojapopa 'rã lei oĩ va'e ha'e javi rami vy.

³¹ Ha'e gui ava va'e re ma teko vai noĩ, ha'e rã kunha va'e ojejavvy rire hexe oĩ 'rã ojejavvyague re opaga aguã.

6

Lei nazireu rami oiko aguã regua oĩa

¹ SENHOR aipoe'i Moisés pe:

² — Ndeayvu ke Israel kuery pe, ha'e vy aipo're: Peteĩ ava e'ŷ vy kunha teĩ ae ma onhemboayvu 'rã anhetẽ rupi nazireu rami oiko aguã re, SENHOR pe anho oiko aguã.*

³ Ha'e rami vy ha'e va'e ndoy'uvei ma 'rã vinho ha'e iro va'e regua. Neĩ ndoy'uvei 'rã vinagre vinho guigua, iro va'e guigua, uva rykue, ndo'ui 'rã uva oipo'o ramo'i pyre, neĩ ipirukue ma voi.

⁴ Nazireu rami oiko teri reve ndo'upei 'rã mba'emo uva'a gui ojapo pyre, ha'yigue neĩ ipirekue gui ma voi.

⁵ Nazireu rami oiko aguã re onhemboayvuague rami oiko teri reve ma oakã rague ndojaya ukai 'rã mba'emo haimbe va'e py ma voi. SENHOR pe anho oiko aguã ára ojeupitypa e'ŷa ja ma oiko 'rã iky'a e'ŷ va'e. Ha'e vy onhembo'a vuku 'rã.

* **6:2** Nazireu ma Nhanderuete pe anho'i oiko aguã rami onhemboayvu va'ekue. Peteĩ semana e'ŷ vy peteĩ jaxy, e'ŷ vy cinco ma'etŷ peve guarã oiko 'rã ijayvuague rami ae. Ha'e va'e rire ma nazireu ve'ŷ 'rã oiko, Nhanderuete pe oiko riae teĩ amboae nunga re opena reve.

6 — SENHOR pe onhemboaxa aguã pukukue re ma nonhembojavei 'rã te'õgue ituia katy ma voi.

7 Xapy'a rei tuu ae omano teĩ, e'ŷ vy ixy teĩ ae ma, e'ŷ vy tyvy, tyke'y, e'ŷ vy heindy omano teĩ ikáuxa rive nda'evei ha'eve'ŷ va'e oiko aguã. Mba'eta inhakã re oĩ 'rã Nguuete pe anho oiko aguã kuaa ukaarã.

8 Nazireu rami oikoa pukukue re ma SENHOR pe iky'a e'ŷ va'ea 'rã oexa uka.

9 — Ha'e gui ha'e oĩa py amongue omano xapy'a ramo nazireu rami onhemboaxaague gui ha'eve'ŷ va'e ju 'rã oiko, hi'a guive. Ha'e ramo ma sete araa py ojaya ukapa ju 'rã o'a, ojeky'a'o ukaa ára py ae.

10 Ha'e gui oito araa py ma sacerdote pe ogueraa 'rã mokoï pyku'i'i e'ŷ vy mokoï apykaxu'i, oguy nhemboaty oĩaty rokẽ peve.

11 Ha'e va'e regua peteĩ ma sacerdote omboaxa 'rã jejavya regua, ha'e rã amboae ma oapypa vy omboaxa 'rã. Ha'e rami vy ojao'i uka 'rã omanogue káuxa ojejavyague. Ha'e va'e árave omboaxa jevy 'rã o'a.

12 Ha'e gui onhemboaxa ju 'rã SENHOR pe nazireu rami oiko aguã, ha'e vy mba'emo omboekovia aguã regua ome'ẽ va'erã ogueraa 'rã peteĩ vexa'i peteĩ ma'etŷ oguereko va'e. Ha'e gui nazireu rami oikoa oaxa va'ekue ma ndovarevei 'rã, ivaipa rive ramo.

13 — Po rami ma nazireu pegua lei. Nazireu rami oiko aguã ára ojeupitypa ma ramo oguerua 'rã oguy nhemboaty oĩaty rokẽ peve.

14 Ha'e ramo SENHOR pe ha'e ogueru 'rã vexa'i peteĩ ma'etŷ va'e ivaikue rei e'ŷ va'e, oapy vy ome'ẽ mbyrã. Ha'e gui jejavya regua ome'ẽ avi 'rã vexa'i

kunha peteĩ ma'etŷ oguereco va'e, ivaikue rei e'ŷ va'e. Ha'e gui peteĩ rami ikuaria regua ome'ẽ 'rã peteĩ vexa ava ivaikue rei e'ŷ va'e.

15 Ome'ẽ avi 'rã peteĩ varai mbojape imbovua revegua e'ŷ, mbojape trigo iporâve va'e guigua azeite reve omoapomo mbyre, ha'e gui mbojape iperirî'i va'e azeite revegua. Mba'emo aju guigua voi ome'ẽ 'rã, mba'emo rykue guive.

16 Ha'e nunga SENHOR renonde py sacerdote ogueru vy oexa uka 'rã jejavya regua ome'ẽmby ha'e oapypa revegua.

17 Vexa'i ma SENHOR pe ome'ẽ 'rã peteĩ rami ikuaria regua, varai py mbojape imbovua revegua e'ŷ reve. Sacerdote ome'ẽ avi 'rã mba'emo aju guigua ogueru pyre, mba'emo rykue guive.

18 Ha'e gui nazireu rami oiko va'e ma oguy nhem-boaty oĩaty rokẽ py hi'aĩa py onhopî ukapa 'rã oakã rague nazireu rami oikoague kuaa ucaa. Ha'e va'e ma ogueraa vy omoõ 'rã tata áry, peteĩ rami ikuaria regua ome'ẽmby oĩ va'e yvýry.

19 Ha'e va'e rire ma sacerdote ogueru 'rã vexa'i axi'y ro'okue mimoõ, peteĩ mbojape imbovua revegua e'ŷ hyru gui, ha'e gui peteĩ mbojape perirî'i imbovua revegua e'ŷ. Ha'e nunga ma omoõmba 'rã nazireu va'e po py, nazireu rami oiko aguã oakã onhopimba ma rire.

20 Ha'e nunga sacerdote oupi 'rã SENHOR renonde py, oupi vy ombovava reve ome'ẽ mbyrã. Ha'e nunga ma iky'a e'ŷ va'e opyta sacerdote peguarã, mymba oupi vy ombovava reve ome'ẽmby pex-okue ha'e hi'ugue ha'e rami ae avi. Ha'e va'e rire ma ha'eve ju 'rã nazireu va'ekue vinho oy'u aguã.

21 — Ha'e va'e lei ma nazireu rami oiko aguã

re onhemboayvu va'ekue pegua. SENHOR pe mba'emo ome'ẽ 'rã nazireu ome'ẽ aguã va'e ae, mba'emo oguerekó va'e rami ome'ẽ va'e áryve. Onhemboayvuague rami ae 'rã oiko, lei nazireu rami oiko aguã regua oĩa rami ae.

Sacerdote jogueroayvu porã aguã regua

²² SENHOR aipoe'i Moisés pe:

²³ — Ndeayvu ke Arão ha'e ta'y kuery pe, ha'e vy aipo're: Po rami 'rã peroayvu porã Israel kuery. Ha'e vy aipopeje 'rã:

²⁴ “SENHOR tanemoingo porã
ha'e topena porã ndere.

²⁵ SENHOR rova taexakã nde'áry rupi,
tanemboaxy guive.

²⁶ SENHOR toma'ẽ riae ndere,
ha'e tome'ẽ revy'a aguã.”

²⁷ Po rami 'rã peroayvu xerery Israel kuery áry rupi. Ha'e ramo xee amoingo porã 'rã — he'i.

7

*Altar SENHOR pegua iky'a e'ŷ va'erã omboaxaa
py yvatekueve mba'emo ome'ẽ okuapyague*

¹ Ha'e gui Moisés ombojerovia atyrã ojapopaa ára py azeite omoĩ reve omboaxa SENHOR pegua iky'a e'ŷ va'erã, tembiporu ikuai va'e guive, altar ha'e hexegua tembiporu ikuai va'e ha'e javi reve.

² Ha'e ramo Israel kuery yvatekueve guetarã kuery rerekaoa ikuai va'e, peteĩ-teĩ regua ru-vixa kuery guetarã kuery papaare ma mba'emo ome'ẽmba okuapy.

³ Ha'e vy SENHOR renonde py ogueru okuapy ome'ẽ va'erã mboapy meme karóxa hoopa va'e

ha'e doze toro. Yvatekueve mokõ-mokoõ ome'ẽ peteĩ karóxa, ha'e rã peteĩ-teĩ ma ome'ẽ toro. Oguerupa okuapy ombojeroviaaty rexei.

⁴ Ha'e gui SENHOR aipoe'i Moisés pe:

⁵ — Ejopypa ke ha'e nunga ha'e kuery po gui, mba'eta oguy nhemboaty oïaty rupi ombo'eapo va'e kuery oiporu va'erã. Levita kuery pe ju 'rã remboaxapa, peteĩ-teĩ guembiaporã oguerekaoa rami — he'i.

⁶ Ha'e ramo Moisés karóxa ha'e toro ojopypa vy omboaxapa levita kuery pe.

⁷ Ha'e rami vy Gérsom ramymino kuery pe ranhe omboaxa mokoõ karóxa ha'e irundy toro, ha'e kuery guembiaporã oguerekaoa rami.

⁸ Ha'e gui Merari ramymino kuery pe ma irundy karóxa ha'e oito toro omboaxa, ha'e kuery guembiaporã oguerekaoa rami. Ha'e kuery ma sacerdote Arão ra'y Itamar po py meme ombo'eapo.

⁹ Ha'e rã Coate ramymino kuery pe ma nome'ẽi mba'eve, mba'eta ha'e va'e kuery henda iky'a e'ỹ va'e rupi ombo'eapo va'e vy ojaxei 'rã mba'emo.

¹⁰ Ha'e gui altar re azeite omoõ reve SENHOR peguarã omboaxa aguã yvatekueve ogueru okuapy mba'emo altar áry ome'ẽ va'erã. Altar rexei peteĩ-teĩ ogueru okuapy ome'ẽ va'e.

¹¹ Mba'eta SENHOR aipoe'i Moisés pe:

— Altar xevygua iky'a e'ỹ va'erã pemboaxa aguã ma huvíxa kuery peteĩ-teĩ ogueru 'rã ome'ẽ va'erã, ára rexei ae 'rã oguerupa — he'iague rami vy.

¹² Ha'e ramo jypy'ia ára py mba'emo ome'ẽ va'erã ogueru va'ekue ma Aminadabe ra'y Naassom, Judá ramymino kuery ruvíxa.

¹³ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

¹⁴ ha'e gui peteĩ hyru ouro guigua cento e vinte gramas ipoyi va'e, heakuã porã va'e tynyẽ reve;

¹⁵ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

¹⁶ ha'e gui peteĩ kavara jejavya regua ome'ẽ va'erã;

¹⁷ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Aminadabe ra'y Naassom ome'ẽ va'ekue.

¹⁸ Ha'e gui mokoĩ araa py mba'emo ome'ẽ va'erã ogueru va'ekue ma Zuar ra'y Natanael, Issacar ramymino kuery ruvixa.

¹⁹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

²⁰ ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

²¹ ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

22 ha'e gui peteĩ kavara jejavya regua ome'ẽ va'erã;
23 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Zuar ra'y Natanael ome'ẽ va'ekue.

24 Ha'e gui mboapy araa py ma ou Helom ra'y Eliabe, Zebulom ramymino kuery ruvixa.

25 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporâve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

26 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

27 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etý va'e, oapy vy ome'ẽ va'erã meme;

28 ha'e gui peteĩ kavara jejavya regua ome'ẽ va'erã;

29 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Helom ra'y Eliabe ome'ẽ va'ekue.

30 Ha'e gui irundy araa py ma ou Sedeur ra'y Elizur, Rúben ramymino kuery ruvixa.

31 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporâve va'e py omonyẽ reve

ogueru, azeite reve omoapomo mbyre, mba'emo
aju guigua ome'ẽ va'erã;

³² ha'e gui peteĩ hyru ouro guigua cento e vinte
gramas ipoyi va'e, heakũa porã va'e tynyẽ reve;

³³ ha'e peteĩ toro ra'y, peteĩ vexa ava ha'e peteĩ
vexa'i ra'y peteĩ ma'etõ va'e, oapy vy ome'ẽ va'erã
meme;

³⁴ ha'e gui peteĩ kavara jejavya regua ome'ẽ va'erã;

³⁵ ha'e gui peteĩ rami ikuai aguã regua ome'ẽ
va'erã ma mokoĩ toro, peteĩ nhiruĩ vexa ava, peteĩ
nhiruĩ kavara ava ha'e peteĩ nhiruĩ vexa'i ra'y
peteĩ ma'etõ va'e meme. Ha'e va'e ha'e javi ma
Sedeur ra'y Elizur ome'ẽ va'ekue.

³⁶ Peteĩ nhiruĩ araa py ma ou Zurisadai ra'y
Selumiel, Simeão ramymino kuery ruvixa.

³⁷ Ha'e va'e ma ome'ẽ peteĩ hy'a prata guigua mil
e quinhentos gramas ipoyi va'e, ha'e gui peteĩ hy'a
guaxu prata guigua oitocentos gramas ipoyi va'e,
henda iky'a e'ý va'e py oiporupy ramigua ae. Ha'e
va'e mokoïve ma trigo iporâve va'e py omoneyẽ reve
ogueru, azeite reve omoapomo mbyre, mba'emo
aju guigua ome'ẽ va'erã;

³⁸ ha'e gui peteĩ hyru ouro guigua cento e vinte
gramas ipoyi va'e, heakũa porã va'e tynyẽ reve;

³⁹ ha'e peteĩ toro ra'y, peteĩ vexa ava ha'e peteĩ
vexa'i ra'y peteĩ ma'etõ va'e, oapy vy ome'ẽ va'erã
meme;

⁴⁰ ha'e gui peteĩ kavara jejavya regua ome'ẽ va'erã;

⁴¹ ha'e gui peteĩ rami ikuai aguã regua ome'ẽ
va'erã ma mokoĩ toro, peteĩ nhiruĩ vexa ava, peteĩ
nhiruĩ kavara ava ha'e peteĩ nhiruĩ vexa'i ra'y
peteĩ ma'etõ va'e meme. Ha'e va'e ha'e javi ma
Zurisadai ra'y Selumiel ome'ẽ va'ekue.

42 Ha'e gui mboapy meme araa py ma ou Deuel ra'y Eliasafe, Gade ramymino kuery ruvixa.

43 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

44 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

45 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

46 ha'e gui peteĩ kavara jejavya regua ome'ẽ va'erã;

47 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Deuel ra'y Eliasafe ome'ẽ va'ekue.

48 Ha'e gui sete araa py ma ou Amiúde ra'y Elisama, Efraim ramymino kuery ruvixa.

49 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

50 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

51 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã

meme;

52 ha'e gui peteĩ kavara jejavya regua ome'ẽ va'erã;

53 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etõ va'e meme. Ha'e va'e ha'e javi ma Amiúde ra'y Elisama ome'ẽ va'ekue.

54 Oito araa py ma ou Pedazur ra'y Gamaliel, Manassés ramymino kuery ruvixa.

55 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ý va'e py oiporupy ramigua ae. Ha'e va'e mokoïve ma trigo iporãve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

56 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

57 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etõ va'e, oapy vy ome'ẽ va'erã meme;

58 ha'e gui peteĩ kavara jejavya regua ome'ẽ va'erã;

59 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etõ va'e meme. Ha'e va'e ha'e javi ma Pedazur ra'y Gamaliel ome'ẽ va'ekue.

60 Ha'e gui nove araa py ma ou Gideoni ra'y Abidã, Benjamim ramymino kuery ruvixa.

61 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ý va'e py oiporupy ramigua ae. Ha'e

va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erã;

62 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyē reve;

63 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

64 ha'e gui peteĩ kavara jejavya regua ome'ẽ va'erã;

65 ha'e gui peteĩ rami ikuai aguã regua ome'ẽ va'erã ma mokoī toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Gideoni ra'y Abidã ome'ẽ va'ekue.

66 Ha'e gui dez araa py ma ou Amisadai ra'y Aiezer, Dã ramymino kuery ruvixa.

67 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omoneyē reve ogueru, azeite reve omoapomo mbyre, mba'emo aju guigua ome'ẽ va'erã;

68 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyē reve;

69 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

70 ha'e gui peteĩ kavara jejavya regua ome'ẽ va'erã;

71 ha'e gui peteĩ rami ikuai aguã regua ome'ẽ va'erã ma mokoī toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma

Amisadai ra'y Aiezer ome'ẽ va'ekue.

72 Ha'e gui onze araa py ma ou Ocrã ra'y Pagiel,
Aser ramymino kuery ruvixa.

73 Ha'e va'e ma ome'ẽ peteĩ hy'a prata guigua mil
e quinhentos gramas ipoyi va'e, ha'e gui peteĩ hy'a
guaxu prata guigua oitocentos gramas ipoyi va'e,
henda iky'a e'ŷ va'e py oiporupy ramigua ae. Ha'e
va'e mokoïve ma trigo iporâve va'e py omoneyẽ reve
ogueru, azeite reve omoapomo mbyre, mba'emo
aju guigua ome'ẽ va'erã;

74 ha'e gui peteĩ hyru ouro guigua cento e vinte
gramas ipoyi va'e, heakũa porã va'e tynyẽ reve;

75 ha'e peteĩ toro ra'y, peteĩ vexa ava ha'e peteĩ
vexa'i ra'y peteĩ ma'etŷ va'e, oapy vy ome'ẽ va'erã
meme;

76 ha'e gui peteĩ kavara jejavya regua ome'ẽ va'erã;

77 ha'e gui peteĩ rami ikuai aguã regua ome'ẽ
va'erã ma mokoï toro, peteĩ nhiruĩ vexa ava, peteĩ
nhiruĩ kavara ava ha'e peteĩ nhiruĩ vexa'i ra'y
peteĩ ma'etŷ va'e meme. Ha'e va'e ha'e javi ma
Ocrã ra'y Pagiel ome'ẽ va'ekue.

78 Ha'e gui doze araa py ma ou Enã ra'y Aira,
Naftali ramymino kuery ruvixa.

79 Ha'e va'e ma ome'ẽ peteĩ hy'a prata guigua mil
e quinhentos gramas ipoyi va'e, ha'e gui peteĩ hy'a
guaxu prata guigua oitocentos gramas ipoyi va'e,
henda iky'a e'ŷ va'e py oiporupy ramigua ae. Ha'e
va'e mokoïve ma trigo iporâve va'e py omoneyẽ reve
ogueru, azeite reve omoapomo mbyre, mba'emo
aju guigua ome'ẽ va'erã;

80 ha'e gui peteĩ hyru ouro guigua cento e vinte
gramas ipoyi va'e, heakũa porã va'e tynyẽ reve;

81 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

82 ha'e gui peteĩ kavara jejavya regua ome'ẽ va'erã;

83 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Enã ra'y Aira ome'ẽ va'ekue.

84 Po rami ma Israel kuery yvatekueve ome'ẽ va'ekue altar áry azeite omoĩ reve SENHOR peguarã omboaxa aguã: doze hy'a prata guigua, doze hy'a guaxu prata guigua ha'e doze avi hyru ouro guigua.

85 Peteĩ-teĩ hy'a prata guigua va'e ma mil e quinhentos gramas ipoyi va'e meme, ha'e gui peteĩ-teĩ hy'a guaxu ma setenta ipoyi va'e. Ha'e va'e tembiporu re prata oĩ va'e ha'e javi vy ma vinte e oito quilos e oitocentos gramas, henda iky'a e'ŷ va'e py oiporupy rami ae.

86 Ha'e gui doze hyru ouro guigua heakuã porã va'e tynyẽ reve ma cento e vinte gramas ipoyi va'e meme, henda iky'a e'ŷ va'e py oiporupy ramigua ae. Ha'e nunga ha'e javi re ouro oĩ va'e ma um quilo e quatrocentos e quarenta gramas.

87 Ha'e gui mymba kuery oapy vy ome'ẽ mbyre ma doze toro ra'y, doze vexa ava, doze avi vexa'i ra'y peteĩ ma'etŷ va'e, mba'emo aju guigua ome'ẽ mbyre reve, ha'e doze kavara ava avi ome'ẽ jejavya regua.

88 Ha'e gui peteĩ rami ikuai aguã regua mymba ome'ẽ mbyre ha'e javi vy ma vinte e quatro toro ra'y, sessenta vexa ava, sessenta kavara ha'e

sessenta avi vexa'i ra'y peteĩ ma'etŷ va'e meme. Ha'e va'e ma ome'ẽ okuapy altar áry azeite omoĩ vy SENHOR peguarã omboaxa aguã.

⁸⁹ Ha'e gui SENHOR reve Moisés ijayvu aguã oguy nhemboaty oĩaty py oike nhavõ oendu kuerei 'rã ixupe ijayvu va'e ayvu ryru mbotya teko vai ombogueaty áry gui. SENHOR ayvu ryru áry mokoĩ anjo ipepo va'e ra'angaa hi'aĩ va'e mbyte gui on-hendu.* Ha'e rami ae 'rã ijayvu ixupe.

8

Henda iky'a e'ŷ va'e py sete tataendy renda ikuai va'e re ijayvuague

¹ SENHOR aipoe'i Moisés pe:

² — Ndeayvu ke Arão pe, ha'e vy aipo're: Sete tataendy hendarã py remoĩ vy reja 'rã imoiny hi'y kyvõ katy hexakã aguã rami — he'i.

³ Ha'e ramo ha'ekue rami ae Arão ojapo. Ha'e rami vy tataendy omoĩ hi'y kyvõ katy meme hexakã aguã rami, Moisés pe SENHOR aipoe'iaque rami vy.

⁴ Tataendy 'y ma ouro ombota pyre gui ojapoa va'ekue, hi'yvypy guive yvate katy ipoty ikuia peve. Moisés pe SENHOR ta'angaa oexa ukaague rami ae ju ojapo tataendy 'yrã.

SENHOR pegua iky'a e'ŷ va'erã levita kuery omboaxaa ague

⁵ Ha'e gui SENHOR aipoe'ive ju Moisés pe:

⁶ — Aŷ ma emono'õmba levita kuery Israel kuery mbyte gui, ha'e eiky'a'opa xevy guarã.

* **7:89** Anjo ipepo va'e ra'angaa ma ayvu ryru mbotya áry guarã omoĩ mbyre (Êxodo 25.18-20).

⁷ Po rami 'rā rejapo iky'a e'ŷ va'e ikuai aguā: Ha'e kuery áry emboayvi yy jejavya ojao'ia aguā regua. Ha'e gui hete ha'e javi rupi renhopī uka 'rā kyxe py, ha'e rejoi ukapa 'rā ijao. Ha'e rami vy 'rā ha'e kuery iky'a e'ŷ va'e ikuai.

⁸ Ha'e gui ha'e kuery ogueru 'rā peteĩ toro ra'y mba'emo aju guigua reve ome'ẽ va'erā, trigo iporāve va'e ha'e azeite reve omoapomo mbyre. Ha'e rā ndee ma amboae toro ra'y ju 'rā reru jejavya regua reme'ẽ va'erā.

⁹ Ha'e gui rejapo 'rā oguy nhemboaty oĩaty rexei levita kuery onhembojapa aguā rami. Remboaty avi 'rā Israel kuery ha'e javi.

¹⁰ Ha'e gui ma SENHOR renonde py levita kuery removaẽmba ramo ha'e kuery áry katy Israel kuery omoĩmba 'rā opo.

¹¹ Ha'e gui SENHOR pe Arão oexa uka 'rā levita kuery mba'emo oupi reve Israel kuery ome'ẽ va'e rami. Ha'e rami rā 'rā SENHOR pe ombo'eapo aguā rami ikuai.

¹² Ha'e gui levita kuery ju opo omoĩ 'rā okuapy toro ra'y ikuai va'e akā áry. Ha'e va'e regua peteĩ ma rejuka 'rā jejavya regua ome'ẽ mbyrā, ha'e rā amboae ma SENHOR pe oapy vy ome'ẽ mbyrā, levita kuery ojejavvyague rejao'i uka aguā.

¹³ Ha'e vy Arão ha'e ta'y kuery renonde py levita kuery removaẽ imo'amy vy rexia uka 'rā SENHOR pe oupi reve ome'ẽmby rami.

¹⁴ — Reipe'a 'rā levita kuery Israel kuery mbyte gui. Levita kuery ma xevy pegua ae 'rā ikuai.

¹⁵ Ha'e va'e rire mae ma levita kuery oike 'rā oguy nhemboaty oĩaty rupi ombo'eapo aguā. Ndee

remboaxa 'rã iky'a e'ŷ va'erã, ha'e xevy rexá uka 'rã oupi reve ome'ẽmby rami.

16 Mba'eta ha'e kuery ae Israel kuery va'e regua ikuai va'erã xevy pegua. Israel kuery regua jypykue ta'y ikuai va'ekue ha'e javi rekovia ma xejeupe guarã meme aipe'a.

17 Mba'eta xevygua meme ikuai Israel kuery regua jypykue ikuai va'ekue, avakue ha'e'ŷ vy mymba kuery regua teĩ. Egito yvy re ta'y ypy'iague ajukapa ára guive ha'e kuery aipe'a xejeupagua iky'a e'ŷ va'erã.

18 Ha'e nunga rupi xejeupe guarã levita kuery aipe'a Israel kuery jypykue ikuai va'e rekovia.

19 Ha'e gui ma Arão ha'e ta'y kuery po py ju amboaxa levita kuery, Israel kuery mbyte gui. Amboaxapa oguy nhemboaty oĩaty rupi om̄ba'eapo okuapy aguã Israel kuery re ama'ẽ vy, ha'e kuery ojejavyague ojao'i uka aguã, ha'e rami vy Israel kuery mbyte rupi oiko e'ŷ aguã imoingo axyarã, mba'eta henda iky'a e'ŷ va'e py Israel kuery oike va'e rire oiko 'rãgue ae — he'i.

20 Ha'e ramo Moisés, Arão ha'e Israel kuery ha'e javi ma ha'e rami ae ojapo okuapy levita kuery re. Moisés pe SENHOR ijayvuague ha'e javi rami Israel kuery ojapo okuapy levita kuery omboaxa vy.

21 Ha'e rami vy levita kuery iky'a e'ŷ va'e ikuai aguã ojoi okuapy oao. Ha'e gui Arão oexa ukapa SENHOR renonde py oupi reve ome'ẽmby rami. Ojao'i uka guive ha'e kuery ojejavyague, iky'a e'ŷ va'e ikuai aguã.

22 Ha'e va'e rire levita kuery ovaẽmba okuapy oguy nhemboaty oĩaty rupi om̄ba'eapo aguã, Arão ha'e ta'y kuery renonde rupi. Levita kuery rekorã re

Moisés pe SENHOR ijayvuague rami vy ae ojapo ha'e kuery re.

²³ Ha'e gui SENHOR aipoe'ive ju Moisés pe:

²⁴ — Pova'e lei ma levita kuery regua: Vinte e cinco ma'etŷ va'e guive tujakue peve 'rã ikuai oguy nhemboaty oïaty rupi ombo'eapo aguã.

²⁵ Ha'e rã cinqüenta ma'etŷ va'e ma ha'e va'e rupi nda'ikuaivei 'rã, ha'ekue rami nomba'eapovei 'rã.

²⁶ Ha'e rami 'rãgue py joegua kuery ptyvõa rupi 'rã ikuai oguy nhemboaty oïaty rupi ombo'eapoa py, teĩ ha'e kuery ae nomba'eapovei 'rã. Ha'e rami ae 'rã remoĩ levita kuery guembiaporaõ oĩ va'e ojapo aguã.

9

Páscoa ára pygua ngaru ojapo aguã re ijayvuague

¹ SENHOR ijayvu Moisés pe Sinai regua tekaoa e'ŷa rupi oiko teri reve. Egito yvy gui oje'oipa rire mokoĩ ma'etŷa ha'e jypy'ia jaxy re ijayvu vy aipoe'i:

² — Israel kuery tojapo okuapy ngaru Páscoa regua hi'ára py porã.

³ Kova'e jaxy re catorze araa py, ka'aru ma ovya py ma pejapo 'rã ngaru hi'ára py. Lei ha'e ojapo uka pyre ha'e javi rami vy 'rã pejapo ngaru — he'i.

⁴ Ha'e ramo Moisés aipoe'i Israel kuery pe ngaru ojapo aguã Páscoa ára py.

⁵ Ha'e rami vy ngaru ojapo okuapy, peteĩ jaxy re, catorze araa py ae. Ka'aru ma ovya jave ojapo Sinai regua tekaoa e'ŷa py. Moisés pe SENHOR ojapo ukaague rami vy Israel kuery ojapopa okuapy.

6 Ha'e va'e ára ma amongue ikuai avi ha'eve'ŷ va'e peteĩ omanogue re opokoague káuxa. Ha'e nunga rupi nda'evei ngaru oĩa py ikuai aguã. Ha'e rami vy Moisés ha'e Arão renonde py ha'e kuery ovaẽ vy

7 aipoe'i okuapy:

— Ore ma ha'eve'ŷ va'e roiko peteĩ ava omano va'ekue re ropoko rire. Nda'evei 'rã ri nda'u SENHOR pe ore voi mba'emo rome'ẽ aguã Israel kuery reve Páscoa ára py?

8 Moisés ombovai:

— Pearõ ranhe, ha'e xee ajapyxaka 'rã ainy mba'exa pa peẽ kuery re SENHOR ojapo uka rã aendu aguã — he'i.

9 Ha'e gui ma SENHOR aipoe'i Moisés pe:

10 — Ndeayvu ke Israel kuery pe, ha'e vy aipo're: Xapy'a rei amongue pende kuery va'e regua, e'ŷ vy raka'eve rã peneramymino kuery ikuai va'erã regua ikuai 'rã ha'eve'ŷ va'e omano va'ekue káuxa. Ha'e rami e'ŷ vy penderekoa gui mombyry oguata teĩ ha'eve nho 'rã Páscoa regua ngaru ojapo aguã SENHOR pe.

11 Ha'e rami vy ha'e kuery mokoĩ jaxyia py 'rã ngaru ojapo, catorze araa va'e ka'aru ma jave. Ho'u 'rã okuapy mbojape imbovua revegua e'ŷ, jai rogue iro va'e reve.*

12 Pemoembyre eme neĩ kyrĩ'i ma voi ko'ẽ rã guarã, pemopẽ eme guive ikãgue'i. Páscoa pygua ngaru regua re ipara oĩa rami 'rã pejapo.

13 Ha'e rami avi xapy'a rei peteĩ ava ngarua pyguarã ha'eve va'e oiko, ha'e tape rupi ndoguatai

* **9:11** Ha'e kuery pe ma Nhanderuete ngaru ojapo uka amboae jaxy py, hi'ára pyguarã ndoiko katui rire.

va'eri Páscoa ára ngaru py ndooi ri ramo ha'e va'e oipe'aa 'rā heta va'e kuery mbyte gui, mba'eta ha'e va'e ára py mba'eve ndoguerui SENHOR pe ome'ẽ va'erā. Ha'e va'e ava re oĩ ae 'rā ojeavyague re opaga aguã.

14 Ha'e gui penembyte amboae regua ikuai va'e Páscoa ára SENHOR pegua ngarua py ikuai avi ri vy lei ipara oĩ rami vy ae 'rā ikuai. Peteĩ'i lei oĩ pendevy ha'e amboae kuery pe joo rami.

Êxodo 40.34-38

15 Ha'e gui ombojerovia atyrā ojapoaa ára py arai ou va'e ojao'ipa. Ha'e va'e oo ma SENHOR ayvu ołaty ae. Ha'e rā ka'aru guive ko'ẽmba peve ma tata rami ju 'rā ojekuaa ombojeroviaaty áry rupi.

16 Ha'e rami ae tema oiko. Arai ojao'i kuerei 'rā, ha'e rā pyávy ma tata rami ju 'rā ojekuaa.

17 Oo áry gui arai ojeupi ovv nhavõ Israel kuery oguata 'rā oje'oivy. Ha'e gui arai optyta oinya py ae ju 'rā Israel kuery optyta avi okuapy.

18 SENHOR oikuaa ukaa rami vy Israel kuery oje'oi 'rā, ha'e gui SENHOR oikuaa ukaa rami vy ae ju 'rā optyta okuapy. Ombojeroviaaty áry rupi arai optyta oinya ja ma ikuai tema 'rā ha'e py.

19 Heta ára re ri ombojeroviaaty áry rupi arai optyta teĩ Israel kuery SENHOR ojapo ukaa rami ikuai vy ndooi 'rā okuapy.

20 Amongue py are'ŷ'i re arai optyta 'rā oiny ombojeroviaaty áry rupi. Ha'e ramo SENHOR oikuaa ukaa rami vy ikuave tema 'rā ha'e py, ha'e gui SENHOR oikuaa ukaa rami vy jevy 'rā oguata oje'oivy.

21 Amongue py ma ka'aru'i ramove ko'ẽmba peve'i 'rā arai optyta oiny. Ha'e gui ko'ẽ rā arai ojeupi ovv

ramo ma ha'e kuery oguata 'rã oje'oivy. Ara py e'ÿ vy pyávy teĩ arai ojeupi ramo oguata 'rã oje'oivy.

²² Xapy'a rei ombojeroviaaty áry rupi arai oĩ tema 'rã mokoĩ ára re, e'ÿ vy peteĩ jaxy re mba'e, e'ÿ vy areve mba'e teĩ hi'áry rupi arai oĩ teria ja Israel kuery ikuai tema 'rã ha'e py, ndoguatai. Ojeupi ovy ramo mae ma oguata ju 'rã oje'oivy.

²³ Ha'e rami py SENHOR oikuaa ukaa rami vy opyta 'rã, ha'e gui SENHOR oikuaa ukaa rami vy ae ju 'rã oguata oje'oivy. SENHOR pe ojapo okuapy ojapo 'rã va'ekue, Moisés rupi SENHOR ojapo ukaa rami vy.

10

Mokoĩ mimby guaxu prata guigua re ijayvuague

¹ Ha'e gui SENHOR aipoe'ive ju Moisés pe:

² — Ejapo uka mokoĩ mimby guaxu prata guigua. Pembota-mbota vy 'rã pejapo. Ha'e va'e pemonhe'ẽ 'rã heta va'e kuery pemboaty aguã, ha'e ikuiai gui oguata oje'oivy aguã guive.

³ Pemonhe'ẽ ramo heta va'e kuery onhemboatypa 'rã okuapy ndea py, oguy nhemboaty oĩaty rokẽ rexei'i rupi ae.

⁴ Peteĩ'i mimby guaxu pemonhe'ẽ ramo ndea py onhemboja 'rã yvatekueve anho, Israel kuery mbovy rei e'ÿ regua ruvixa ikuai va'e ae.

⁵ Ha'e gui mokoĩ've ri pemonhe'ẽ ramo ma oje'oi 'rã kuaray oua katy ikuai va'ekue ranhe.

⁶ Pemonhe'ẽ jevy ramo oje'oi 'rã kuaray puku-a katy ikuai va'ekue. Pemonhe'ẽ va'e ha'e kuery oendu vy oikuaa 'rã oje'oi aguã.

⁷ Ha'e rã ha'e kuery pemboaty jevy aguã ma pemonhe'ẽ avi 'rã teĩ hatã e'ÿ ta'vy.

8 Arão ramymino kuery sacerdote ikuai va'e ae 'rã omonhe'ẽ mimby guaxu. Pende kuery rekorã aeja raka'e rã peve guarã.

9 Ha'e gui pendeyvy re ae pendekuai jave penderovaigua kuery reve pepu'ã aguã katy peje'oi ramo penemoõ vai okuapy ramo pemonhe'ẽ avi 'rã mimby guaxu. Ha'e ramo xee SENHOR Penderuete aña py peẽ kuery re ama'ẽ ramo peo jepe 'rã penderovaigua kuery gui.

10 Ha'e rami ae avi pevy'a aguã ára py, xevy ngaru pejapoa py mba'e, ha'e jaxy jypy'ia py guive pemonhe'ẽ avi 'rã mimby guaxu. Ha'e va'e jave py mba'emo peapypa vy peme'ẽ, ha'e peteĩ rami pendekuaia regua peme'ẽ va'e áry rupi pemonhe'ẽ ramo xee Penderuete aña py ama'ẽ 'rã pendere. Xee ma SENHOR Penderuete aiko.

Sinai gui Israel kuery oje'oipaague

11 Ha'e gui ma mokoõ ma'etŷa py, mokoõ jaxy re vinte ára ma jave arai ojeupi ov y oguy nhemboaty oñaty áry rupi oñague gui.

12 Ha'e ramo Israel kuery Sinai regua teko a e'ŷa py ikuia gui oguata oje'oivy. Oguata-guata oje'oivy Parã regua teko a e'ŷa py ju arai opyta peve.

13 Ha'e rami vy oguata ypy'i oje'oivy, SENHOR Moisés pe ojapo ucaa rami vy.

14 Jypyra ete ma Judá ramymino kuery pegua bandeira reraa ranhe oje'oi ngupivegua kuery reve. Ha'e va'e regua xondaro kuery ruvixa ma Aminadabe ra'y Naassom.

15 Ha'e gui Issacar ramymino kuery regua xondaro kuery ruvixa ma Zuar ra'y Natanael.

16 Zebulom ramymino kuery xondaro kuery regua ruvixa ma Helom ra'y Eliabe.

17 Ha'e gui ma ombovaipa okuapy ombojeroviaty, ha'e Gérson ha'e Merari ramymino kuery oje'oi vy ogueraapa henoiny.

18 Ha'e va'e rire ma Rúben kuery pegua bandeira reraa ju oje'oi ngupivegua kuery reve. Ha'e kuery va'e regua xondaro kuery ruvixa ma Sedeur ra'y Elizur.

19 Ha'e gui Simeão ramymino kuery regua xondaro kuery ruvixa ma Zurisadai ra'y Selumiel.

20 Gade ramymino kuery regua xondaro kuery ruvixa ma Deuel ra'y Eliasafe.

21 Ha'e gui ma oje'oipa ju Coate regua kuery mba'emo iky'a e'ý va'e ogueraa reve. Ha'e gui ha'e kuery ovaẽ e'ý mbove ma voi omopu'ãmbaa ju 'rã imoiny ombojeroviaty.

22 Ha'e va'e rire ma Efraim ramymino kuery pegua bandeira reraa ju oje'oi ngupivegua kuery reve. Ha'e kuery regua xondaro kuery ruvixa ma Amiúde ra'y Elisama.

23 Ha'e gui Manassés ramymino kuery regua xondaro kuery ruvixa ma Pedazur ra'y Gamaliel.

24 Benjamim ramymino kuery regua xondaro kuery ruvixa ma Gideoni ra'y Abidã.

25 Ha'e gui ma Dã ramymino kuery pegua bandeira reraa ju oje'oi ngupivegua kuery reve. Ha'e va'e kuery ma heta va'e kuery ha'e javi rakykue oje'oi oarõa rupi. Ha'e kuery va'e regua xondaro kuery ruvixa ma Amisadai ra'y Aiezer.

26 Ha'e gui Aser ramymino kuery regua xondaro kuery ruvixa ma Ocrã ra'y Pagiel.

²⁷ Naftali ramymino kuery regua xondaro kuery ruvixa ma Enã ra'y Aira.

²⁸ Ha'e rami ae oguata oje'oivy Israel kuery meme, oxondaro kuery reve.

Hobabe pe ha'e kuery reve oo aguã re Moisés ojerureague

²⁹ Ha'e gui Moisés ijayvu Hobabe pe. Ha'e va'e ma hatyu Midiã pygua Reuel ra'y. Ha'e vy aipoe'i:

— Roguata roje'oivy peteñ henda orevy SENHOR "Ame'ẽ 'rã pêvy" he'iague katy. Eju orerupive, ha'e ramo rojapo porã 'rã ndevy. Mba'eta Israel kuery pe mba'emo porã ome'ẽ aguã re SENHOR ijayvu.

³⁰ Ha'e ombovai:

— Xee ma ndaa reguai. Xeyvy xeretarã kuery rekoaa py ae 'rã aa — he'i.

³¹ Ha'e gui ixupe Moisés aipoe'ive ju:

— Ne'exa, orereja eme ke, mba'eta ndee ma reikuua tekaoa e'ŷa rupi orekuai ranhe 'rãa. Ha'e gui ndee ma orererekoarã 'rã reiko.

³² Xapy'a rei ore kuery reve reo ri ramo ndevy pe rojapo porã 'rã SENHOR ore kuery pe ojapoa rami ae — he'i.*

³³ Ha'e gui ma oje'oipa ma SENHOR pegua yvyty katy'i ikuaiague gui. Mboapy araa re oguata oje'oivy. Ha'e kuery renonde rupi SENHOR guexeve guarã ojapo va'ekue ryru reraa kuery oguata oje'oivy mboapy ára re, ha'e kuery opytu'u aguã ojou aguã.

³⁴ Ha'e gui ára py arai SENHOR ombou va'ekue oo tema ha'e kuery áry rupi, ikuaia gui oje'oi jave voi.

* **10:32** Moisés ngupive ogueraaxe ngovaja Hobabe. Ha'e va'e ma ndooxei ranhe teñ oo nho (Juízes 1.16).

35 Ha'e gui Nhanderuete ayvu ryru oupia heravy nhavõ Moisés aipoe'i 'rã:

— SENHOR, epu'ã ke nderovaigua kuery remoaïmba aguã. Tove nerentonde gui tonhamba ndere nda'ija'eí va'e.

36 Ha'e gui opyta ju nhavõ aipoe'i 'rã:

— SENHOR, ejevy ju ke mbovy rei e'ý Israel kuery ikuaiá py.

11

Israel kuery ijayvu ete okuapyague

1 Ha'e gui ma SENHOR oendua py teĩ ha'e kuery ijayvu ete okuapy mba'emo oiko va'e re. SENHOR oendu ramo ipoxya hendy. Ha'e rami vy ha'e kuery mbyte tata SENHOR guigua ou vy omomba hekoa apy rupi ikuai va'e.

2 Ha'e ramo Moisés pe ha'e kuery ojerure okuapy ramo SENHOR pe ha'e ju onhembo'e. Ha'e ramo tata oguepa.

3 Ha'e nunga rupi ha'e va'e tekao ma oenoï Taberá, ha'e kuery mbyte tata SENHOR guigua hendy ma rire.*

4 Ha'e gui ha'e kuery mbyte opa marã ikuai va'e oendu okuapy Egito pygua kuery rembi'u regua ho'uxe reia. Ha'e ramo Israel kuery voi ojae'opa reve aipoe'i okuapy:

— Mava'e 'rã tu ome'ẽ xo'o ja'u va'erã?

5 Aý ma nhanema'endu'a jakuapy Egito yvy re pira ja'u rive jakuapyague re, ha'e pepino, melão, alho ka'aguy regua, cebola ha'e alho re guive.

* **11:3** Tery Taberá ma “Okaia” 'ea reve nhaendu rã joo ramigua.

⁶ Ha'e rami teĩ aŷ ma nhanenhe'ẽ voi ipirupa ma 'rã, mba'eta amboae ramigua ma voi ndajajouvei, kova'e maná e'ŷ vy — he'i okuapy.

⁷ Maná ma coentreo ra'yigue ramigua, jaexa rã yvyra ayxy ramigua rei.

⁸ Heta va'e kuery opa rupi oeka oje'oivy vy omono'õ vy omongu'i 'rã mba'emo mongu'ia py, ha'e'ŷ vy angu'a py ojoxo 'rã. Ha'e rami vy omomi-moĩ 'rã oja py, e'ŷ vy iku'ikue gui ojapo 'rã mbojape. Ja'u rã mbojape azeite reve ojapo pyre rami hee va'e.

⁹ Pyávy ha'e kuery rekaoa rupi yxapy ho'a reve maná ho'a avi 'rã oiny ha'e rupi.

Moisés ojapo 'rã va'ekue ipoyi etea rupi ijayvuague

¹⁰ Heta va'e kuery ojae'o rã Moisés oendu, mba'eta peteĩ-teĩ gua'y kuery reve ngoo rokẽ py ojae'o okuapy. Ha'e ramo SENHOR poxya hendy. Moisés voi oexa vy ndojou porãi.

¹¹ Ha'e ramo Moisés aipoe'i SENHOR pe:

— Mba'e re tu mba'emo vai rejapo xee nerembiguai re? Mba'e re tu ndaxejou porãevei nerенонде py? Mba'eta xemoĩ kova'e kuery ha'e javi re apena aguã rami.

¹² Xee ae ri ty'y kova'e kuery moingoare aiko? Xee ae ri ty'y areko'i va'ekue xevy aipo're aguã: “Eraapa ndejyva áry okambu'i va'e rami, yvy aura reve neramoĩ kuery pe ame'ẽ aguã re xeayvuague peve”, 're aguã?

¹³ Magui 'rã tu xee ajou xo'o ha'e kuery ha'e javi peguarã? Mba'eta xerenonde py ojae'o reve aipoe'i okuapy: “Eme'ẽ na xo'o ro'u va'erã.”

¹⁴ Ha'e gui xee ae'i ma voi ndaropo'akai 'rā kova'e kuery ha'e javi, xevy ipoyi vaipa ramo.

¹⁵ Nami ae ta ri xererekoy vy ma xejuka vyvoi, ajerure. Xemboaxy ri vy xemoingo eme ajexavai aguā rive.

Moisés pytyvōarā setenta avakue Nhanderuete oiporavo ukaague

¹⁶ SENHOR aipoe'i Moisés pe:

— Emboaty ha'vy setenta avakue Israel kuery monogetaaty va'e regua rexa va'ety, nhomongetaa rupi ha'e heta va'e kuery re openaa rupi ae ikuai va'ety. Ha'e va'e kuery remonhembojapa 'rā oguy nhemboaty oīaty rexei, ha'e py ikuai aguā nerенонде.

¹⁷ Ha'e py ma xee aguejy vy xeayvu 'rā ndereve. Ha'e Xenhe'ē ndere oī va'e ambouve vy ha'e kuery re voi amoī 'rā. Ha'e vy ndereve ha'e kuery ikuai avi 'rā heta va'e kuery re openaa rupi, ndee anho'i e'ŷ repena aguā.

¹⁸ Ha'e vy aipo're 'rā heta va'e kuery pe: “Pejeky'a'o uka ju ko'ē rā guarā, pe'u aguā xo'o. Mba'eta peē kuery pejae'o reve ‘Mava'e tu ome'ē ta xo'o ja'u va'erā? Egito yvy re ma jaiko porā va'ekue’, peje ramo SENHOR oendu. Ha'e rami vy pendevy SENHOR ome'ē 'rā xo'o, ha'e pe'upa 'rā.

¹⁹ Peteī ára'i re rive'ŷ 'rā pe'u, neī mokoī ára'i 'rā e'ŷ, neī peteī nhiruī neī dez, neī vinte ára re'i e'ŷ guive.

²⁰ Ha'e rami 'rāgue py peteī jaxy pukukue re 'rā pe'u, peneapyīguá gui oẽmba rā pejeguarupa peve. Mba'eta SENHOR penembyte oiko va'e ndapeipotavei, ha'e henonde py pejae'o reve

‘Mba'e re tu Egito gui jajupa raka'e?’ peje va'ekue”, 're 'rã ha'e kuery pe — he'i.

21 Ha'e ramo Moisés ombovai:

— Xee ma seiscentos mil avakue opu'ã okuapy va'e mbyte py aiko. Ha'e ramo mba'exa tu aipo're xevy: “Eme'ẽ ha'e kuery pe xo'o, peteĩ jaxy pukukue re ho'u okuapy aguã” 're?

22 Mymba kuery vexa'i ha'e vaka ty'y ojukapaa 'rã ha'e kuery ha'e javi ho'u va'erã? Tyrã pa ye'ẽ rupi pira ikuai va'e ha'e javi 'rã omono'õmbaa ha'e kuery ho'u va'erã? — he'i.

23 Ha'e ramo Moisés pe SENHOR ombovai:

— Xee SENHOR jyva nda'u ijapu'a'i ri? Aŷ'i ma voi rex'a 'rã xeayvuague oiko rã tyrã pa anya! — he'i.

24 Ha'e gui Moisés oẽ vy heta va'e kuery pe SENHOR omombe'upa SENHOR ijayvuague. Ha'e vy ha'e kuery mongetaaty setenta avakue ikuai va'e omboaty imbokuapy oo yvýry rupi.

25 Ha'e ramo SENHOR oguejy arai rupi. Ha'e vy ijayvu ixupe. Ha'e vy Nhe'ẽ hexe oĩ va'e ombouve vy omoĩ avi setenta nhomongetaaty ikuai va'e re. Ha'e va'e kuery re Nhe'ẽ oĩ avi ramo omombe'u okuapy ixuguigua, teĩ ha'e va'e rire ma nda'ijayvuvei ha'e rami.

26 Ha'e gui ma mokoĩ avakue opyta tekoa py. Peteĩ ma Eldade hery va'e, ha'e rã amboae ma Medade. Ha'e kuery re voi Nhe'ẽ oĩ, mba'eta ha'e kuery voi nhomongetaaty kuery regua teĩ oo katy ndooi va'ekue. Ha'e rami vy ha'e kuery voi ayvu omombe'u okuapy tekoa mbyte ikuiaia py.

27 Ha'e ramo peteĩ kunumi onha ovv vy omombe'upa Moisés pe. Ha'e vy aipoe'i:

— Eldade ha'e Medade voi ri tu ayvu omombe'u okuapy — he'i.

²⁸ Ha'e ramo Num ra'y Josué, Moisés pytyvōarā oiporavo va'ekue va'e ombovai vy aipoe'i:

— Xeruvixa Moisés, emokyrirī na.

²⁹ Ha'e rā Moisés aipoe'i ixupe:

— Ndee ta'vy nerakāte'ŷ teve xere? SENHOR pegua kuery profeta meme ikuai 'rāgue, ha'e kuery ha'e javi re SENHOR Onhe'ē omoř aguā! — he'i.

³⁰ Ha'e va'e rire Moisés ma tekao katy ju oje'oi Israel kuery mongetaaty kuery reve.

Guyra codornizes Nhanderuete ombouague

³¹ Ha'e gui SENHOR-a gui peteři yvytu oipeju ovv vy ye'ē áry gui ogueru guyra codornizes. Ha'e vy tekao áry ha'e javi rupi omoařmba heravy peteři ára jaguataa rami rai'i peve. Ijyvýry rupi opyta peteři metro peve yvy py.

³² Ha'e ramo ha'e va'e árave heta va'e kuery oje'ipa, pyávy ha'e ko'ëgue voi, ha'e vy ojopy oje'ivvy guyra ikuai va'e. Amongue mboapy'ive ojopy va'ekue ri cem voxá renyë ogueru. Ha'e vy tekao ha'e javi rupi omboaty imoiny ojeupe guarā ae.

³³ Ha'e rami teři ijuru py xo'o oime rei reve, oixu'u jepe e'ŷ re voi ha'e kuery rovai SENHOR poxya hendy vy ojukapa mba'emo vai py.

³⁴ Ha'e nunga rupi ha'e va'e tekao ma oenoňa Quibrote-Hataavá, ha'e py Egito regua tembi'u re nda'eveive va'ekue ojatypaa rire.†

† **11:34** Tery Quibrote-Hataavá ma “Tembí'u re nda'eveive va'ekue ojatyaague” 'ea.

³⁵ Ha'e gui Quibrote-Hataavá gui ma ha'e kuery oje'oive Hazerote katy, ha'e vy opyta ju ha'e py.

12

Moisés rovai rupi Miriā ha'e Arão ijayvuague

¹ Ha'e gui Moisés ogueraa peteī kunha Cuxé pygua gua'yxyrã. Ha'e ramo Miriā ha'e Arão ijayvu okuapy Moisés rovai, Cuxé pygua gua'yxyrã ogueraa va'ekue káuxa.

² Ha'e vy aipoe'i okuapy:

— Xapy'a rei nda'u Moisés rupi anho ri SENHOR ijayvu? Nhande rupi voi nda'u nda'ijayvui avi 'rã? — he'i ramo SENHOR oendu.

³ Moisés ma ava onhemo'yvȳ'i va'e, ko yvy re avakue ikuai va'e gui voi yvȳ'ive va'e oiko.

⁴ Are'ŷ'i re SENHOR aipoe'i Moisés pe, Arão ha'e Miriā pe voi:

— Peē kuery mboapy ma peē 'rã oguy nhem-boaty oĩaty oĩ va'e gui — he'i. Ha'e ramo oẽmba mboapyve.

⁵ Arai rupi SENHOR oguejy ouvy vy oo rokẽ py opyta ho'amy. Ha'e vy oenoĩ Arão ha'e Miriā. Ha'e ramo ha'e kuery ojexa uka.

⁶ Ha'e ramo aipoe'i ha'e kuery pe:

— Pendu ke aŷ xee xeayvu ramo. Penembyte profeta oiko ramo ma ixupe xee SENHOR ajekuaa uka 'rã mba'emo aexa ukaa py, ha'e'ŷ vy oexa ra'ua py 'rã xeayvu hexeve.

⁷ Ha'e rã xerembiguai Moisés reve ma nami e'ŷ ju aiko, mba'eta ha'e ma ojeroviapy ete oiko xero pygua kuery ha'e javi re openaa rupi.*

* **12:7** Hebreus 3,2,5

⁸ Hexeve ma xeayvu 'rā xejuru rupi ae, oikuaa porā aguā rami, ayvu haxy rei va'e rupi e'ŷ. Ixupe xee SENHOR ajekuaa rā xerexa guive. Mba'exa ha'vy tu ndapekyjei ri xerembiguai Moisés rovai rupi pendeayvu aguā? — he'i.

⁹ Ha'e rami vy ha'e kuery rovai SENHOR poxya hendy. Ha'e rire ojepe'a.

¹⁰ Arai voi ojepe'a ovv oo áry gui. Ha'e ramove Miriā oikuaa rā hexe oĩ ma lepra, yro'y apĩ rami xiĩ rei va'e. Miriā re Arão oma'ẽ ramo lepra revegua ma hi'aĩ.

¹¹ Arão aipoe'i Moisés pe:

— Ake'e xeruvixa! Ndevy ajerure: Orere emoĩ eme orerekvaia, mba'eta ore'arandua rupi e'ŷ rojapo ha'e nunga, rojejavy ete ange.

¹² Nhanereindy topyta eme kyrī'i va'e oity pyre rami, mbyte rupi ho'okue ho'apa va'e rami — he'i.

¹³ Ha'e ramo SENHOR pe Moisés ojapukai vy aipoe'i:

— Xeruete, ajerure remonguera ju aguā.

¹⁴ SENHOR ombovai Moisés pe:

— Xapy'a rei hova re tuu onyvõ va'e rire nda'u sete araa peve ndopytai 'rāgue oximbāa py? Ha'e voi topyta ranhe sete ára tekaoa gui mombyry'i. Ha'e va'e rire ma ha'eve peru ju aguā — he'i.

¹⁵ Ha'e rami rā Miriā sete ára peve omondouka ranhe tekaoa gui mombyry'i. Oguerua e'ŷa ja heta va'e kuery ndoguatai tekaoa gui.

¹⁶ Ha'e va'e rire mae ha'e kuery oje'oi ju Hazerote gui, ha'e Parā regua tekaoa e'ŷa py ju ikuai.

13

Deuteronomio 1.19-25

1 SENHOR aipoe'i Moisés pe:

2 — Emondouka ke avakue Canaã yvy re oexa pota va'erã, mba'eta ame'ẽ 'rã Israel kuery yvyrã. Peneramoĩ kuery peteĩ-teĩ regua gui remondouka 'rã peteĩ ava, huvixa oiko va'e ae — he'i.

3 Ha'e ramo Moisés omondouka Parã regua tekao e'ŷa py ikuiai gui ae, SENHOR aipoe'iague rami vy. Ha'e va'e avakue ma Israel kuery ruvixa ikuai va'e meme.

4 Po rami ma ha'e va'e kuery rery: Rúben kuery regua ma Zácur ra'y Samua;

5 Simeão kuery regua ma Hori ra'y Safate;

6 Judá kuery regua ma Jefoné ra'y Calebe;

7 Issacar kuery regua ma José ra'y Jigeal;

8 Efraim kuery regua ma Num ra'y Oséias;

9 Benjamim kuery regua ma Rafu ra'y Palti;

10 Zebulom kuery regua ma Sodi ra'y Gadiel;

11 José kuery regua, ha'e Manassés kuery regua ae ma Susi ra'y Gadi;

12 Dã kuery regua ma Gemali ra'y Amiel:

13 Aser kuery regua ma Micael ra'y Setur;

14 Naftali kuery regua ma Vofsi ra'y Nabi;

15 Gade kuery regua ma Maqui ra'y Geuel.

16 Ha'e va'e avakue ma Moisés omoĩ yvy re oexa pota va'erã omondouka aguã. Ha'e gui Num ra'y Oséias rery Moisés oguerova vy Josué ju omboery.

17 Ha'e gui Canaã yvy katy Moisés omondouka oexa pota aguã. Ha'e vy aipoe'i ha'e kuery pe:

— Peẽ Neguebe katy, ha'e yvyty ikuai va'e rupi ju 'rã peo.

18 Pexa 'rã yvy peikuaa aguã mba'exa pa ra'e, ha'e hexegua kuery re guive peikuaa pota, imbaraetekue tyrã pa ikangykue, ndaetai tyrã pa heta.

19 Ha'e peikuaa pota 'rã mba'exa pa yvy ha'e kuery ikuiaia re, iporã tyrã pa na'iporãi, ha'e mba'exa pa tetã ikuiaia voi ra'e, teko a rive tyrã pa tetã ikorapa va'e.

20 Pexa avi mba'exa pa ra'e yvy itui, iporã tyrã pa na'iporãi, ha'e gui ka'aguy tyrã pa any. Penekyre'ý tema, ha'e peru mba'emo aju ha'e va'e yvy guigua — he'i. Ha'e va'e jave ma uva ijaju ypya ára ae.

21 Ha'e rami rã ha'e kuery oje'oi vy ha'e va'e yvy rupi oexa pota oje'oviy, Zim regua teko a e'ýa guive Reobe peve Hamate py ovaëa'i py.

22 Neguebe rupi oje'oi vy ou okuapy Hebron peve. Ha'e py ma ikuai Enaque ra'y kuery Aimã, Sesai ha'e Talmai. (Hebron tetã ojapoa ma sete ma'etý teri Egito yvy re Zoã tetã ojapoa e'ý mbove ma voi.)

23 Ha'e rire ma Escol yvyugua peve ju ou. Ha'e py ma ojaya okuapy peteï xã uva hi'y reve. Ha'e va'ekue ma mokoï avakue ogueru peteï yvyra po'i re ombo'y vy. Romã'a ha'e figo'a avi ogueru.

24 Ha'e va'e yvyugua pe ma "Escol" oenoï, ha'e py Israel kuery uva'a ojaya rire.*

Deuteronômio 1.26-33

25 Ha'e gui yvy oexa vy oje'oiague gui quarenta ára opaa py ojevypa ju.

26 Oguata jogueruvy vy ovaëmba ju Moisés ha'e Arão-a py, ha'e Israel kuery ha'e javi onhemboaty okuapya py Parã regua teko a e'ýa re, Cades py ae. Ha'e kuery pe omombe'upa okuapy oexa va'ekue,

* **13:24** Tery Escol ma "Uva'a" 'ea.

heta va'e kuery ha'e javi pe voi. Oexa uka avi mba'emo aju ha'e va'e yvy gui ogueru va'ekue.

27 Ha'e vy Moisés pe omombe'u vy aipoe'i okuapy:

— Roje'oi yvy oremondoukaague va'e peve. Ha'e gui anhetē ete ha'e py kamby ha'e ei ndoatai. Kova'e ma mba'emo'a ha'e pyguare.

28 Ha'e rami avi avakue ha'e va'e yvy re ikuai va'e ma imbaraetekue ae. Hetā voi tuvixa ete va'e ikuai, ikorapa va'e meme guive. Ha'e py roexa avi Enaque ramymino kuery.[†]

29 Amalequita kuery ma Neguebe re ikuai. Ha'e rã yvyty rupi ma heteu, jebuseu ha'e amorreu kuery ikuai. Ye'ẽ katy'i rupi ma cananeu kuery ikuai, Jordão yakã yvýry rupi guive — he'i okuapy.

30 Ha'e gui Calebe ju nhomokyririmbá heta va'e kuery Moisés renonde py ikuai va'e. Ha'e rami vy aipoe'i:

— Ma'ẽ, jaje'oi jajopy aguã ha'e va'e yvy, mba'eta nhandepo'aka 'rã ha'e kuery re — he'i.

31 Ha'e rami teĩ avakue mboae hexeve oje'oi va'ekue aipoe'i okuapy:

— Nda'evei teve ha'e va'e kuery rovai jaje'oi aguã, nhande kuery gui ipo'akapave va'e ramo — he'i okuapy.

32 Ha'e rami vy Israel kuery oendupaa py ha'e kuery ijayyu rei okuapy yvy oexa va'ekue re. Ha'e vy aipoe'i:

— Yvy mbyte rupi roexa pota aguã roaxaague va'e ma hekoa va'e kuery mombaarã itui. Ha'e py roexa va'ekue ma ava ja'eakue meme,

[†] **13:28** Enaque ra'y kuery ma gigante ikuai raka'e (versículo 33).

³³ gigante kuery avi roexa karamboae. Ha'e vy rojoexa ramo tuku'i rami rive orekuai, ha'e kuery pe voi ha'e rami ae avi orerexa rā — he'i okuapy. Enaque ramymino kuery ma gigante guigua meme ikuai raka'e.

14

Heta va'e kuery oyvyrā katy ndooxeiague

¹ Ha'e gui heta va'e kuery opu'ãmba vy ojapukai atā rei okuapy. Ha'e va'e pyávy ha'e kuery ojae'opa okuapy.

² Ha'e vy Israel kuery ha'e javi ijayvu rei okuapy Moisés ha'e Arão re. Ha'e vy aipoe'i:

— Ha'eveve 'rāgue Egito yvy re, e'ŷ vy kova'e teko a e'ŷa py ma voi nhamanomba va'e rire!

³ Mba'erā tu SENHOR nhandererupa kova'e yvy re? Kyxe py nhamanomba aguā pa, ha'e nhanderayxy kuery ha'e nhandera'y kue'iry escravõrā ogueraapaa aguā teve? Nda'evei nda'u Egito yvy katy ae ju jajevypa aguā? — he'i.

⁴ Joupe-upé aipoe'i okuapy:

— Jajou peteĩ nhanderuvixarā, Egito yvy katy jajevypa aguā — he'i okuapy.

⁵ Ha'e rami rā Israel kuery oexaa py Moisés ha'e Arão guenapy'ã re oĩ ngova yvy re omovaẽ reve.

⁶ Ha'e rami ae avi yvy rexaare kuery va'e regua Num ra'y Josué ha'e Jefoné ra'y Calebe omondoro okuapy oao.

⁷ Ha'e vy Israel kuery ha'e javive pe ijayvu vy aipoe'i:

— Yvy mbyte rupi roaxaague va'e rima iporā ete.

8 SENHOR nhandejou porã ri vy ojapo 'rã ha'e va'e yvy re nhavaẽ aguã rami, nhandevy ju omboaxa aguã. Ha'e va'e yvy ma kamby ha'e ei oata e'ÿa.

9 Ha'e nunga rupi pepu'ã rei eme SENHOR re, pekyje eme guive ha'e pygua avakue gui, mba'eta mbojape ja'ua rami nhamomba avi 'rã ha'e kuery. Ha'e kuery reve noïvei ma hepyarã va'ekue. Ha'e rã nhande kuery reve ma SENHOR ae 'rã oiko. Pekyje eme ha'e kuery gui — he'i.

10 Ha'e rami teĩ heta va'e kuery ha'e javi jogueroayvu okuapy ita py ojapipa aguã re. Ha'e rami teĩ ha'e kuery pe SENHOR rexakã ojekuaa xapy'a oguy nhemboaty oñaty rupi.

11 Ha'e rami vy SENHOR aipoe'i Moisés pe:

— Raka'e peve nda'u kova'e kuery xereko a'ã 'rã okuapy? Raka'e peve nda'u ndojeroviai 'rã xere, ha'e kuery mbyte rupi opa marãguia hexa pyrã amoingo va'eri?

12 Ha'e nunga rupi ambou 'rã mba'eaxy vaikue ijukapaarã, name'ëvei ma 'rã ijyvyrã va'ekue. Ha'e gui ndegui ju amoingo 'rã peteĩ regua kova'e kuery gui hetave ha'e imbaraetekueve va'e — he'i.

Heta va'e kuery re Moisés ojerureague

13 Ha'e ramo Moisés ombovai SENHOR pe:

— Egito pygua kuery mbyte gui ndepo'akapaa rupi kova'e kuery reipe'apa rire teĩ remomba ramo Egito pygua kuery oendupa 'rã.

14 Ha'e rami vy ha'e kuery omombe'u uka 'rã kova'e yvy re ikuai va'e pe. Ha'e gui SENHOR, kova'e yvy pygua kuery oendu ae ma ndevygua kuery mbyte rupi reikoa, ha'e ha'e kuery rexá py ae rejexa ucaa. Ha'e kuery áry rupi ndeguigua

arai oĩ, ha'e ha'e kuery renonde rupi arai opu'ã va'e py 'rã reo ara py, ha'e rã pyávy ma tata opu'ã va'e py 'rã reo.

15 Ha'e gui xapy'a rei ndevyguia kuery rejukapa vyvoi ramo amboae regua kuery nemombe'ua rã oendu va'ekue aipoe'i 'rã okuapy:

16 “Yvy re SENHOR ndogueraa kuaai ri nda'u ojeupagua kuery, oura reve ha'e kuery pe ome'ẽ aguã re ijayvu va'ekue ri, ha'e nunga rupi ae ojukapa teko a e'ÿa py”, he'i 'rã okuapy.

17 Ha'e nunga rupi aÿ SENHOR, ajerure ndepo'akapa va'ea rex a uka aguã, ndeayvuague rami vy. Mba'eta aipo're va'ekue:

18 “Xee SENHOR ma xeporayvu va'e ha'e opa mba'e py anhomboaxy va'e, ambogue 'rã teko vai ha'e jejavya. Ha'e rami avi ojejav yva'ekue nambopaga e'ÿi 'rã. Ha'e rami 'rãgue py tuu kuery reko vaa iague re ambou 'rã ta'y kuery voi ojexavai aguã, mboapya ha'e irundaya ikuaia peve”, 're va'ekue.

19 Ha'e nunga rupi opa mba'e py renhomboaxy va'e vy embogue ke kova'e kuery reko vaia, heko vaia Egito yvy gui oje'oipa guive apy ovaëmba peve rembogue jepiaty rami.

Deuteronômio 1.34-40

20 Ha'e ramo SENHOR aipoe'i:

— Ndeayvua rami xee ambogue ma ha'e kuery reko vaia.

21 Ha'e rami avi anhetẽ ete xee SENHOR xee ae rekove rupi, ha'e xerexakãa yvy jave rupi ojekuaa va'erã va'e rupi aura vy aipoa'e:

22 avakue xerexakãa ha'e hexa pyrã Egito yvy re ha'e teko a e'ÿa rupi ajapo rã oexa va'ekue, ha'e

gui dez-kue ma xerekó a'ãa rupi naxenhe'ẽ rendui va'ekue,

²³ ha'e va'e regua neĩ peteĩve ma ndoexai 'rã yvy peneramoĩ kuery pe ame'ẽ aguã re aura reve xeayvuague va'e. Tá, ndaxepotavei va'e kuery neĩ peteĩ'i ma voi ndoexai 'rã.

²⁴ Ha'e rã xerembiguai Calebe re ma amboae regua nhe'ẽ oĩ. Ha'e va'e ma xereve ete oiko riae ramo xee ajapo 'rã yvy oexa potaague re ae hekoia aguã rami. Hamymino kuery avi 'rã ikuai ha'e py.

²⁵ Ne'exa, amalequita ha'e cananeu kuery ma yvy'ã guy katy ikuai. Pejepekuavo ha'vy amboae katy. Ko'ẽ rã tapeo tekao e'ÿa katy ju, ye'ẽ pytã yvýry tape oo va'e rupi ae — he'i.

²⁶ Ha'e rire Moisés ha'e Arão pe ju SENHOR aipoe'i:

²⁷ — Raka'e peve 'rã tu aropo'aka kova'e kuery xerovai rupi ijayvu okuapy va'e? Xee aendupa ainy Israel kuery xere ijayvu rei okuapy ramo.

²⁸ Aipo're ha'e kuery pe: SENHOR aipoe'i: Xee ae rekove rupi aura vy aipoa'e: Xeapyxa py pendeaayvuague ae ju 'rã ambou pendere.

²⁹ Mba'eta kova'e tekao e'ÿa py ae 'rã pemanomba, peẽ kuery va'e regua penderery omoña jave vinte ma'etÿ va'e ha'e pendetujakueve va'e guive, joupe-upu xerovai pendeaayvu va'ekue ha'e javi.

³⁰ Ndapeupityi 'rã yvy pendekoarã ame'ẽ aguã re aura reve xeayvuague va'e py, Jefoné ra'y Calebe ha'e Num ra'y Josué va'e e'ÿ vy.

³¹ Ha'e rã pendera'y kuery pe “Escravo-rã oguer-aapaa 'rã” peje va'ekue ri ha'e kuery ma ajapo 'rã ha'e py ovaẽmba aguã rami. Ha'e kuery ma oexa 'rã yvy peẽ ndapeipotai va'ekue.

32 Ha'e rã peẽ kuery ma kova'e tekoa e'ŷa py 'rã pemanomba.

33 Kova'e tekoa e'ŷa rupi ma quarenta ma'etŷ re pendera'y kuery ikuai 'rã guymba kuery re openaa rupi. Pejejavya káuxa ae 'rã ha'e kuery ojexavai, kova'e tekoa e'ŷa py xapirẽ penderetekue ho'upa peve.

34 Mba'eta quarenta ára re yvy re pexa pota peje'oivy rire quarenta ma'etŷ re ju 'rã pejexavai pejejavyague re, peteĩ-teĩ ára rekovia peteĩ ma'etŷ 'rã oaxa. Ha'e rami vy pendupa 'rã xee rojou vaia regua.

35 Xee SENHOR ha'e rami xeayvu rire ha'e rami ae ju 'rã ajapo kova'e kuery heko vai va'e xere opu'ã va'ekue re. Kova'e tekoa e'ŷa py ae 'rã okanhy ovy, opa peve — he'i.

36 Ha'e gui avakue yvy rexaarã Moisés omondouka va'ekue ojevy vy ha'e va'e yvy re ijayvu rei vy ojapo heta va'e kuery ha'e javi yvy re ijayvu rei avi okuapy aguã rami.

37 Ha'e va'e avakue yvy re ijayvu rei va'ekue ma SENHOR renonde py omanomba raka'e mba'eaxy vaikue gui.

38 Ha'e rã Num ra'y Josué ha'e Jefoné ra'y Calebe ma avakue yvy rexaarã oje'oi va'ekue va'e regua avi teĩ okuave.

Deuteronômio 1.41-46

39 Ha'e nunga Moisés omombe'u Israel kuery ha'e javive pe. Ha'e ramo ha'e kuery iporiau vaipa ete okuapy.

40 Ko'ẽ rai ramove ovypa vy oẽmba jogueruvy yvyty apyte katy. Ha'e vy aipoe'i okuapy:

— Apy ma orekuai, anhetē ae rojejavypa rire teĩ roo nho 'rã yvy nhandevy SENHOR ome'ẽ 'rã va'ekue re — he'i okuapy.

41 Moisés ombovai:

— Mba'e re ha'vy SENHOR ojapo ukaa rami e'ŷ pendekuai? Pendeayvua rami pendekuai aguã ma nda'eve porãi.

42 Tapeo eme ta'vy penderovaigua kuery renonde py pemanomba e'ŷ aguã, mba'eta SENHOR noïvei ma 'rã peẽ kuery mbyte.

43 Ma'ẽ, penerenonde rupi amalequita ha'e cananeu kuery ikuai. Pe'apa 'rã pekuapy ikyxe gui. Mba'eta SENHOR gui pejep'e'a ma rire noïvei 'rã peẽ kuery reve — he'i.

44 Ha'e ramive ma ha'e kuery onhea'ã tema okuapy yvyty rupi oje'oi aguã. Ha'e rami teĩ SENHOR guexeve guarã ojapo va'ekue ryru ndoguer-aai ha'e kuery rekoa mbyte oĩa gui, neĩ Moisés voi ndooi.

45 Ha'e ramo amalequita ha'e cananeu kuery yvyty rupi ikuai va'e oguejy vy ojukapa, Horma peve oitypa.

15

Lei mba'emo ome'ẽmby regua oĩa

1 SENHOR aipoe'i Moisés pe:

2 — Ndeayvu ke Israel kuery pe, ha'e vy aipo're: Yvy pendekoarã xee ame'ẽ va'erã re pevaẽ jave ma

3 mba'emo peapy vy peme'ẽ 'rã SENHOR pe, mymba mba'e pejuka vy penhemboayvuague pejapopa regua, e'ŷ vy mba'emo penhenhandua'i rami

peme'ẽ va'e, e'ŷ vy ngaru hi'ára py pejapoa py SENHOR pe peapy 'rã heakuã porã va'e, vaka, vexa'i pejuka vy peme'ẽ va'e reve.

⁴ Ha'e gui SENHOR pe mba'emo ome'ẽ va'erã ogueru va'e ma ogueru avi 'rã peteĩ ryru trigo iporãve va'e, peteĩ ryru raxa'i azeite reve omoirũ va'ekue.

⁵ Ha'e peteĩ-teĩ vexa'i peme'ẽ va'e reve guarã peru avi 'rã peteĩ ryru vinho penhoẽ reve peme'ẽ va'erã, mba'emo peapy vy peme'ẽ va'e ha'e mymba pejuka uka va'e áry.

⁶ Peteĩ-teĩ vexa'i peme'ẽ va'e reve guarã peru avi 'rã mba'emo aju guigua peme'ẽ va'erã. Mokoĩ ryru trigo iporãve va'e Peru, peteĩ ryru raxa'i azeite reve omoirũ mbyre.

⁷ Vinho peteĩ ryru raxa'i 'rã peme'ẽ SENHOR pe penhoẽ reve, peapy vy peme'ẽ ramo heakuã porã aguã.

⁸ Ha'e gui toro ra'y peapy e'ŷ vy pejuka aguã perekó katu 'rã penhemboayvuague pejapopaa reguarã, ha'e'ŷ vy perovy'a aguã regua SENHOR pe peme'ẽ va'erã.

⁹ Toro ra'y reve Peru avi 'rã mba'emo aju guigua peme'ẽ va'erã. Mboapy ryru trigo iporãve va'e 'rã Peru, mokoĩ ryru rai'i azeite reve omoirũ mbyre.

¹⁰ Vinho penhoẽ reve peme'ẽ 'rã mokoĩ ryru rai'i, SENHOR pe mba'emo peapy vy peme'ẽ ramo heakuã porã aguã.

¹¹ Ha'e rami ae pejapo 'rã toro ra'y peme'ẽ va'e reve guarã, vexa ava, vexa'i ra'y ha'e kavara ava reve guarã guive.

¹² Peteĩ-teĩ peme'ẽ va'e reve guarã 'rã Peru, mbovy pa peme'ẽa rami vy.

¹³ Ha'e py aegua kuery ojapo 'rã ha'e rami,

mba'emo oapy vy SENHOR pe ome'ẽ ramo heakuã porã aguã.

14 Ha'e penembyte rupi ikuai avi 'rã amboae regua, peneramymino kuery ikuative-ive jave. Ha'e va'e regua ogueru avi 'rã mba'emo oapy vy SENHOR pe ome'ẽ va'erã, heakuã porã aguã. Peẽ kuery pejapoa rami ae avi 'rã ha'e kuery voi ojapo.

15 Peẽ kuery ha'e javi rekorã ma peteĩ'i aeja, pêvy ha'e amboae regua penembyte rupi ikuai va'e pe voi. Ha'e va'e ma raka'e rã peve guarã oĩ peneramymino kuery rekorã avi ikuai jave guarã. Peẽ kuery pendekuaia rami ae avi 'rã amboae regua kuery ikuai xee SENHOR renonde.

16 Peteĩ'i lei oĩ 'rã penderekorã, peẽ kuery pe ha'e amboae regua penembyte rupi ikuai va'e pe voi — he'i.

17 SENHOR aipoe'ive ju Moisés pe:

18— Ndeayvu ke Israel kuery pe, ha'e vy aipo're: Yvy xee rogueraa ague py pevaẽ jave

19 yvy re mba'emo aju oiko va'ekue pe'u ta nhavõ SENHOR pe ranhe 'rã peme'ẽ mba'emo.

20 Jypygua mba'emo pemongu'i va'ekue iporãve va'e gui pejapo 'rã mbojape. Ha'e va'e ma Peru peme'ẽ va'erã. Mba'emo pemoa'yĩ va'ekue rami 'rã peme'ẽ.

21 Jypygua mba'emo pemongu'i va'ekue iporãve va'e guigua SENHOR peguarã ranhe 'rã peme'ẽ, peneramymino kuery ikuative-ive jave voi.

Levítico 4.13-21

22— Ha'e gui amongue py pejavy 'rã Moisés rupi SENHOR ojapo uka va'ekue ndapejapoia py.

23 Mba'eta Moisés rupi meme SENHOR ojapo uka raka'e pêvy, ojapo uka ypya ára guive aŷ peve,

ha'e peneramymino kuery ikuaiive-ive jave guarã
guive.

24 Ha'e gui xapy'a rei potae vy e'ŷ pejapo 'rã
ha'eve'ŷa rami, ha'e neĩ heta va'e kuery voi
ndoikuaai okuapy. Ha'e rami vy ha'e kuery ha'e
javi ome'ẽ 'rã peteĩ toro ra'y, oapya ramo SENHOR
pe heakuã porã aguã. Mba'emo aju guigua reve
'rã ogueru, ha'e mba'emo rykue onhoẽ aguã ome'ẽ
va'erã reve, pendekorã oeja pyre rami vy ae. Peteĩ
kavara ogueru avi 'rã jejavya regua ome'ẽ va'erã.

25 Ha'e gui sacerdote ojao'i uka 'rã Israel kuery
ojejavy okuapyague. Ha'e ramo ha'e kuery oper-
doaa 'rã, potae vy e'ŷ ojavy rire. Ha'e kuery oje-
javyague re ogueru 'rã mba'emo oapy vy SENHOR
pe ome'ẽ va'erã. SENHOR renonde py ogueru avi
'rã ojejavyague regua ome'ẽ va'erã.

26 Ha'e ramo operdoaa 'rã Israel kuery ha'e javi,
ha'e kuery mbyte rupi amboae regua ikuai va'e
voi, ha'e javive otekoavy rire.

27 — Amongue potae vy e'ŷ ojejavy rire ogueru
'rã peteĩ kavara kunha peteĩ ma'etŷ va'e, oje-
javyague regua ome'ẽ va'erã.

28 Ha'e ramo sacerdote ojao'i uka 'rã ojejavyague,
SENHOR renonde potae vy e'ŷ ojejavy rire. Ha'e
nungakue ojao'i uka ramo operdoaa 'rã.

29 Israel kuery ae, ha'e'ŷ vy ha'e kuery mbyte
amboae regua ikuai va'e teĩ peteĩ'i anho 'rã oĩ lei
potae vy e'ŷ ojejavy va'ekue pe.

30 Ha'e rã otekoavy potae va'e, ha'e pygua kuery
ae, e'ŷ vy amboae regua teĩ SENHOR mboetea rupi
e'ŷ rei oiko ramo oipe'aa 'rã heta va'e kuery mbyte
gui,

31 SENHOR ayvu noendu potai rire, ha'e ndojapoxei ete ha'e ojapo uka va'ekue. Ha'e va'e oipe'aa 'rāe, ha'e hexe ae 'rā oī ojejavvyague opaga aguã.

Sábado regua lei rupi e'ŷ oiko va'ekue ombopagaague

32 Tekoa e'ŷa py Israel kuery ikuai teri reve oikuaa okuapy peteĩ ava sábado py va'eri xakā omono'õ oikovy rā.

33 Ha'e rami vy xakā mono'õare ojou va'ekue ogueru okuapy Moisés ha'e Arão-a py, heta va'e kuery ha'e javi renonde py.

34 Oeja ranhe openaa imoiny aguã, mba'eta ndoikuaai rei teri mba'exa pa hexe ojapo aguã.

35 Ha'e ramo SENHOR aipoe'i Moisés pe:

— Ha'e va'e ava ma omano aguã rami oiko. Pavẽ 'rā ojapi ita py, tekaoa gui mombyry'ia py — he'i.

36 Ha'e ramo ha'e kuery ha'e javi ma tekaoa gui mombyry'ia py ogueraa vy ojapipa okuapy ita py. Ha'e ramo omano, Moisés pe SENHOR ojapo ukaague rami vy.

Deuteronômio 22.12

37 SENHOR aipoe'i Moisés pe:

38 — Ndeayvu ke Israel kuery pe. Ha'e vy aipo're: Pembopotypa 'rā pendeano apy rupi, peneramymino kuery ikuave-ive jave guarã. Ao apy re peteĩ-teĩ poty 'rā pejokua ixã hovy va'e py.

39 Ha'e nunga pexa nhavõ penema'endu'a 'rā SENHOR ojapo uka va'ekue ha'e javi re, pejapo ete aguã. Nda'evei pendepy'a re peipotaa oī va'e rami rive pendekuai aguã, neĩ mba'emo pexa vy peipota rei aguã guive, mba'eta ha'e nunga rupi pendekuai vy pendetavy rei ae ma.

⁴⁰ Ha'e rami 'rāgue py penema'endu'a ajapo uka va'ekue ha'e javi re, pejapo ete aguã. Ha'e vy 'rāe Penderuete renonde peiko iky'a e'ŷ va'e.

⁴¹ Xee ae ma SENHOR Penderuete, Egito yvy gui pendererupaare, Penderuete aiko aguã. Xee ae SENHOR Penderuete.

16

Coré, Datã ha'e Abirão SENHOR rovai opu'âxe okuapyague

¹ Peteĩ levita regua oiko Coate ramymino Isar ra'y Coré hery va'e.* Ha'e va'e ma ngupive ogueraa Rúben kuery regua, Eliabe ra'y kuery Datã ha'e Abirão, ha'e gui Pelete ra'y Om.

² Ha'e ramo ha'e va'e kuery ma Moisés renonde py opu'â okuapy duzentos e cinqüenta Israel kuery regua avakue reve, huvixarã heta va'e kuery oiporavo va'ekue, avakue omboetepy ikuai va'e meme.

³ Ha'e kuery onhemboaty okuapy Moisés ha'e Arão rovai opu'âxe vy. Ha'e vy aipoe'i okuapy ha'e kuery pe:

— Aŷ ha'eve ma! Mba'eta heta va'e kuery ha'e javive iky'a e'ŷ va'e ikuai, nhande kuery va'e regua peteĩ-teĩ ma iky'a e'ŷ va'e jaiko, nhande kuery mbyte SENHOR oiko ramo. Mba'e re tu ha'vy penhemboyvateve ri SENHOR pegua orekuai va'e gui?
— he'i okuapy.

⁴ Ha'e nunga Moisés oendu vy guenapy'â re oĩ, ngova yvy re omovaẽ peve.

⁵ Ha'e rami vy ijayvu Coré ha'e hexeveguá kuery ha'e javi pe. Ha'e vy aipoe'i:

* **16:1** Amongue Bíblia py hery Coré 'rāgue py Corá oĩ. Mokoïve tery ojeporu.

— Ko'ẽ rã aje'ive ma SENHOR oikuaa uka 'rã mava'e ete pa ixupegua ra'ea, ha'e mava'e pa iky'a e'ŷ va'e ojee omonhemboja va'erã. Mba'eta ha'e oiporavo va'ekue anho 'rã omonhemboja.*

⁶ Coré ha'e ndereveguá kuery ha'e javi, po rami 'rã pejapo. Peru ke hy'a'i heakuã porã va'e oapyaty,†
⁷ ha'e gui ko'ẽ rã pemboja 'rã tata. Hi'áry pemoi avi 'rã heakuã porã va'e SENHOR renonde py. Ha'e gui SENHOR oiporavo va'e ae ma 'rã iky'a e'ŷ va'e. Peẽ levita kuery pendekuai va'e, ha'eve ma aŷ pendeayvu — he'i.

⁸ Aipoe'ive ju Coré kuery pe:

— Aŷ ma Levi ramymino kuery, penduve tema.

⁹ Peẽ kuery pe rã nda'u mba'e'ŷ'i ri Israel kuery Ruete ha'e kuery mbyte gui pendeporavo hexe penhemboja aguã, ha'e SENHOR ombojeroviaaty rupi ixupe pemba'eapo aguã heta va'e kuery re vy?

¹⁰ Mba'eta Coré, ha'e ma nemonhemboja ojee, ha'e ndereveguá Levi ramymino kuery voi. Mba'e re tu sacerdote ete avi peikoxe ri?

¹¹ Ha'e nunga rupi ndee ha'e ndereveguá ikuai va'e ma SENHOR rovaigua meme pendekuai. Ha'e gui Arão ma mba'exagua tu oiko, hovai re pendeayvu rei pekuapy aguã? — he'i.

¹² Ha'e gui Moisés oenoi uka Eliabe ra'y kuery Datã ha'e Abirão. Ha'e rami tei ha'e kuery ma aipoe'i uka:

— Ore kuery ma ndorooi 'rãe.

* **16:5** 2 Timóteo 2.19 † **16:6** Ha'e kuery ma sacerdote e'ŷ ikuai ramo nda'evei heakuã porã va'e oapy aguã, sacerdote kuery pe anho ha'eve (Êxodo 30.34-38).

¹³ Ndee ma orepe'a va'ekue yvy kamby ha'e ei oata e'ŷa gui, kova'e tekoa e'ŷa py ju romanomba aguã, ha'e gui aŷ renhemoō ukaxe oreruvixarã orere ndepo'aka aguã.

¹⁴ Mba'eta ndee ndorereraai teri yvy kamby ha'e ei oata e'ŷa py, neĩ orevy nereme'ẽi guive mba'ety ha'e vinho ty. Remombo ta ri ty'y yvy ku'ikue kova'e avakue rexa py? Ha'e nunga rupi ore kuery ma ndorooi 'rã — he'i uka.

¹⁵ Ha'e ramo Moisés ivai vaipa reve aipoe'i SENHOR pe:

— Ha'e kuery ndevy mba'emo ome'ẽ teĩ ema'ẽ rive ome'ẽ va'e re. Mba'eta xee ma ha'e kuery gui neĩ peteĩ mburika ma voi ndaraai, neĩ peteĩ henda py ma voi ndajapo vai ha'e kuery pe — he'i.

¹⁶ Moisés aipoe'ive ju Coré pe:

— Ndee ha'e ndereveguá kuery ma ko'ẽ rã peĩmba 'rã SENHOR renonde py. Arão voi oĩ 'rã.

¹⁷ Peteĩ-teĩ peru 'rã penemba'e hy'a'i heakuã porã va'e oapyaty, pemoõ avi 'rã heakuã porã va'e. Peteĩ-teĩ peru 'rã SENHOR renonde py, duzentos e cinqüenta hy'a'i ha'e javi py 'rã peru. Ndee ha'e Arão Peru 'rã penemba'e ae — he'i.

¹⁸ Ha'e ramo ha'e kuery peteĩ-teĩ ogueru okuapy heakuã porã va'e oapyaty. Tata omboja, ha'e hi'áry omoõ heakuã porã va'e. Moisés ha'e Arão reve ikuai oguy nhemboaty oĩaty rokẽ rexei.

¹⁹ Moisés ha'e Arão rovai Coré omboatypa heta va'e kuery oguy nhemboaty oĩaty rokẽ py. Ha'e ramo SENHOR rexakãa ojekuaa xapy'a ijaty va'e ha'e javi pe.

Opu'ã rei va'ekue ombopagaague

20 Ha'e gui SENHOR aipoe'i Moisés ha'e Arão pe:

21 — Pejepe'a ke upe va'e kuery mbyte gui, mba'eta are'ŷ'i re amomba vyvoi 'rā — he'i.

22 Ha'e rami teĩ ha'e kuery mokoĩve ma ngova yvy re omovaẽ reve aipoe'i:

— Oreruete temimoingo ha'e javi moingoare ha'e herekoia reiko va'e, xapy'a rei rā peteĩ'i ava ri ojejavy ramo kova'e kuery ha'e javi rovai 'rā teve ndepoxy?

23 SENHOR ombovai Moisés pe:

24 — Aipo're ha'vy upe py ikuai va'e ha'e javi pe: "Pejepe'a ke Coré, Datã ha'e Abirão ikuaria gui", 're.

25 Ha'e ramo Moisés opu'ã ju vy oo Datã ha'e Abirão ikuaria py. Hakykue oje'oipa avi Israel kuery mongetaaty kuery.

26 Ha'e vy aipoe'i ha'e py ijaty va'e pe:

— Ajerure, pejepe'apa na upe va'e avakue heko vai va'e rekoa gui mombyry'i. Pepoko eme guive ha'e kuery mba'e rei-rei re, ha'e kuery ojejavya py peẽ voi penemombaa e'ŷ aguã — he'i.

27 Ha'e ramo ojepo'apa oje'oivy Coré, Datã ha'e Abirão ikuaria gui. Datã ha'e Abirão ma oẽ vy ngoo rokẽ py oguapy, gua'yxy kuery reve, gua'y kuery, guajy kuery ha'e kyrigue'i ha'e javi reve.

28 Ha'e gui Moisés aipoe'i:

— Mba'emo oiko ta va'e rupi peikuaa 'rā SENHOR ae xembouague ixupeguia ha'e javi ajapo aguã, ha'e xejegui e'ŷ ae meme ajapoa peikuaa aguã.

29 Aŷ ma peva'e avakue amboae avakue omanoa rami ri omano ramo, xapy'a rei avakue mboae ojexavaia rami rive ha'e kuery ojexavai ramo ma SENHOR remimbou e'ŷ xee aiko.

30 Ha'e rami avi xapy'a rei SENHOR mba'emo nda-jaexai teri va'e ojapo ramo yvy ojepe'a rã kova'e avakue ho'apa aguã omba'e rei-rei reve, ha'e yvykua vaikue py ha'e kuery oikove reve oguejy ramo peikuaa 'rã SENHOR mboetea rupi ve'ÿ ikuai va'e memea — he'i.

31 Ijayvupa'i ramove yvy ha'e kuery ikuiaia guy rupi ojepe'a ovv.

32 Ojepe'a ramo ha'e kuery ho'apa hoo ha'e javi reve, Coré reveguia avakue ikuai va'ekue voi, imba'e rei-rei ha'e javi reve.

33 Yvykua vaikue py ho'apa oguereko va'ekue ha'e javi reve. Ha'e gui yvy ojao'ipa jevy ramo heta va'e kuery mbyte gui okanhymba.

34 Ha'e ramo Israel kuerya katy'i rupi ikuai va'ekue onhamba oje'oivy haxëmba rã oendu vy, “Tove yvy tanhanemomba heravy eme avi” he'i vy.

35 SENHOR-a gui tata oẽ ouvy vy ojukapa duzentos e cinqüenta avakue heakuã porã va'e ryru reveguia.

36 Ha'e gui SENHOR aipoe'i Moisés pe:

37 — Aipo're sacerdote Arão ra'y Eleazar pe heakuã porã va'e oapyaty ikuai va'e oipe'apa aguã tata hendy va'e mbyte gui, tomoaõmba tata oĩ va'e mombyrya rupi, mba'eta hyru ma iky'a e'ÿ va'e meme.

38 Ha'e gui ojejavy okuapy va'e mba'ekue heakuã porã va'e oapyaty peipe'a va'ekue ma pemoper-er'i 'rã altar penhovã aguã, SENHOR renonde py oguerupa okuapy rire. Ha'e nunga iky'a e'ÿ va'e ikuai ramo opyta 'rã Israel kuery oikuua aguã — he'i.

³⁹ Ha'e ramo sacerdote Eleazar oipe'a heakuā porā va'e oapyaty overa va'e guigua okaipa va'ekue po gui, ha'e vy omopererī'i altar onhovā aguā,

⁴⁰ Israel kuery ha'e nungakue re ima'endu'a okuapy aguā. Mba'eta amboae regua rei Arão guigua e'ý va'e nda'evei SENHOR renonde py onhemboja aguā heakuā porā va'e oapy aguā, Coré ha'e hexeveguá kuery re oiko va'ekue ramigua oiko ju e'ý aguā, Moisés rupi SENHOR ijayvuague rami vy.

Opa marā ju ikuai va'ekue ombopagaague

⁴¹ Ko'ẽ jevy ma Israel kuery ha'e javi ijayvu rei okuapy Moisés ha'e Arão rovai. Ha'e vy aipoe'i:

— Peẽ kuery tu pejuka ma SENHOR pegua kuery — he'i.

⁴² Moisés ha'e Arão rovai re ha'e kuery onhemboatypa vy oguy nhemboaty oñaty oña katy oje'oi ramove arai ou vy ojao'ipa, ha'e SENHOR rexakāa ojekuaa xapy'a.

⁴³ Moisés ha'e Arão jogueru avi onhemboaty aty renonde py.

⁴⁴ Ha'e gui Moisés pe SENHOR ijayvu vy aipoe'i:

⁴⁵ — Pejepa' ke upa va'e kuery ikuiai gui, amomba vyvoi aguā — he'i ramo mokoïve gue-napy'ã re ikuai ngova yvy re omovaẽ peve.

⁴⁶ Ha'e ramo Moisés aipoe'i Arão pe:

— Eraa ke nemba'e heakuā porā va'e oapyaty, ha'e emboja tata altar áry gui rejopy va'e. Hi'áry rupi emoï avi heakuā porā va'e. Ha'e gui tereo pojava hetu va'e kuery ikuiai rupi ha'e kuery ojejavya rejao'i uka aguā, mba'eta imbopagaarā

tuvixa ete va'e ou SENHOR renonde gui. Omboopy ma mba'eaxy vaikue — he'i.

⁴⁷ Arão ma Moisés ijayyuague rami vy heakuã porã va'e ryru ogueraa vy onha ovy tekao mbyte rupi, ha'e kuery mbyte rupi mba'eaxy vaikue ou ma ramo. Tata áry rupi heakuã porã va'e omoõ vy ojao'i uka ovy ha'e kuery ojejavya.

⁴⁸ Ha'e rami py omanogue ha'e okuave va'e mbyte oiko. Ha'e rami rã mba'eaxy vaikue opa vyvoi.

⁴⁹ Mba'eaxy gui omano va'ekue ma catorze mil e seiscentos ha'e javi vy, Coré káuxa omano va'ekue reve'ŷ vy.

⁵⁰ Ha'e gui mba'eaxy vaikue opytu'u rire oguy nhemboaty oñaty rokẽ py ju Arão ou Moisés oña py.

17

Arão popoka ipotypaague

¹ SENHOR aipoe'i Moisés pe:

² — Ndeayvu ke Israel kuery pe. Ha'e kuery gui rejopy 'rã popoka. Doze popoka rejopy 'rã, peteĩ-teĩ tamoõ ro pygua kuery va'e regua yvatekueve gui. Peteĩ-teĩ rery rembopara 'rã imba'e popoka re ae.

³ Ha'e rã Levi kuery va'e regua popoka re ma rembopara 'rã Arão rery, mba'eta peteĩ-teĩ oo pygua kuery ruvixa oguereko 'rã popoka.

⁴ Ha'e va'e ma remoimba 'rã oguy nhemboaty oñaty py, xeayvu ryru oĩ va'e renonde. Ha'e py xee ae 'rã rovaexi.

⁵ Ha'e gui ava xee aiporavo va'e popoka ma ipotypa 'rã. Ha'e rami vy xerenonde gui amombytu'upa 'rã Israel kuery penderovai rupi ijayvu rei okuapya — he'i.

6 Ha'e rami Israel kuery pe Moisés ijayvu ramo doze yvatekueve ikuai va'e ome'ẽ okuapy opopoka. Peteĩ-teĩ ixupe ome'ẽ guamoĩ ro pygua kuery pegua ae, doze popoka ha'e javi vy. Ha'e kuery popoka mbyte py oĩ avi Arão popoka.

7 Ha'e kuery popoka ma Moisés ogueroikepa SENHOR renonde py, opy ijayvua oĩaty py ae.

8 Ko'ẽ jevy oguy Nhanderuete ayvu oĩaty ropy Moisés oike ramo Arão popoka Levi ro pygua kuery pegua henhoimba ra'e. Hi'y tuvixaa rupi ipotypa ma, ha'e vy hi'apa guive.

9 Ha'e ramo popoka ha'e javi ma SENHOR renonde gui Moisés ogueraapa ju Israel kuery ikuiaia py. Ha'e ramo ha'e kuery oexa vy peteĩ-teĩ ojopy okuapy opopoka ae.

10 SENHOR aipoe'i Moisés pe:

— Eraa ju ke imoiny Arão popoka xeayvu oĩaty renonde py, ha'e py ae oĩ porã aguã Israel kuery opu'ã rei va'e oikuua okuapy aguã. Ha'e rami vy 'rãe remokyrirĩ xerovai rupi ijayvu rei okuapy va'e, omanomba e'ŷ aguã — he'i.

11 Ha'e ramo Moisés ojapo ha'e rami. SENHOR ojapo ucaa rami vy ae ojapo.

12 Ha'e gui Moisés pe Israel kuery ijayvu jevy vy aipoe'i okuapy:

— Aŷ ma romanomba ta ma! Rokanhymba 'rã, rokanhymba 'rãe ha'e javive!

13 Mba'eta SENHOR ombojeroviaaty katy onhemboja va'e rei ma omano 'rã. Xapy'a rei nda'u ore kuery ha'e javive 'rã ri romanomba? — he'i okuapy.

18

Sacerdote kuery mba'emo ojapo ha'e ojopy va'erā re ijayvuague

¹ Ha'e gui SENHOR aipoe'i Arão pe:

— Ndee, ndera'y kuery ha'e neramoī Levi ramymino kuery ha'e javi re oī 'rã henda iky'a e'ŷ va'e rupi pemba'eapoa py pejejavy ri vy pepaga aguã. Ha'e rã ndee ha'e ndera'y kuery re anho 'rã oī sacerdote rami pemba'eapoa py pejejavy vy pepaga aguã.

² Ha'e gui oo xeayvu oīaty renonde rupi ndee ha'e ndera'y kuery pemba'eapo pekuapy jave ma peru avi 'rã peneretarā kuery peneramoī Levi ramymino ikuai va'e, pendea py meme ha'e kuery ou vy penepytyvō okuapy aguã.

³ Ha'e kuery ma ndereve oo rupi om̄ba'eapo vy ojapo 'rã okuapy ojapo 'rã va'ekue. Ha'e rami teī ha'e kuery nonhembojai 'rāe henda iky'a e'ŷ va'e py mba'emo ikuai va'e re, neī altar re, omanomba e'ŷ aguã, peē kuery voi.

⁴ Ndea py ha'e kuery onhemboaty 'rã okuapy ojapopa aguã oguy nhemboaty oīaty rupi ojapo 'rã va'e ha'e javi. Ha'e rã amboae regua ma nda'evei pēa py onhemboja aguã.

⁵ Peē kuery anho 'rã pemba'eapo henda iky'a e'ŷ va'e py, altar rupi voi, Israel kuery mbopagaarā oiko jevy e'ŷ aguã.

⁶ Peneretarā kuery levita ikuai va'e ma xee aiporavo Israel kuery mbyte gui, ha'e penepytyvōarā ju amboaxa oguy nhemboaty oīaty rupi SENHOR pe om̄ba'eapo okuapy aguã.

⁷ Ha'e rã altar rupi, ha'e ajukue okẽ regua oĩ va'e ropy rupi ma ndee ha'e ndera'y kuery reve ae 'rã pepena sacerdote rembiaporã oĩ va'e ha'e javi re. Ha'e va'e ma penembiaporã ae. Peẽ kuery pe ame'ẽ sacerdote rami pemba'eapo aguã. Ha'e rã amboae regua onhemboja ri vy ma omano 'rã — he'i.

⁸ SENHOR aipoe'ive ju Arão pe:

— Ndevy peguarã xee amboaxa xevy ome'ẽ mbyre-mbyre gui mba'emo oipe'aa va'e, Israel kuery mba'emo iky'a e'ŷ va'erã ogueru va'e guigua. Ndevy ha'e ndera'y kuery pe raka'e rã peve guarã amboaxa peẽ kuery peguarã ae.

⁹ Pova'e ae 'rã pejopy mba'emo iky'a e'ŷ ete va'e gui, tata py omoña e'ŷ va'ekue regua. Xevy ome'ẽ va'erã ha'e kuery ogueru va'e ha'e javi gui mba'emo opyta 'rã ndevy ha'e ndera'y kuery pe iky'a e'ŷ ete va'erã, mba'emo aju guigua mba'e, jejavya regua, ha'e mba'emo omboekovia aguã regua xevy ogueru va'e ha'e javi gui.

¹⁰ Ha'e nunga pe'u 'rã pekuapy henda iky'a e'ŷ etea py ae. Peẽ kuery va'e regua avakue ma guive rã pe'u 'rã. Pendevy ma iky'a e'ŷ va'e opyta.

¹¹ Pova'e nunga voi opyta 'rã ndevy guarã: mba'emo Israel kuery oupi vy ombovava reve ome'ẽ va'ekue ha'e javi gui oipe'a pyre, ha'e nunga voi amboaxa ndevy, ndera'y kuery ha'e nderajy kuery pe guive, raka'e rã peve guarã. Ndero pygua kuery ngarua pyguarã ha'eve va'e ri ikuai vy ha'e javi 'rã ha'eve ho'u aguã.

¹² Azeite, vinho ha'e mba'emo ra'yigue oiko ypy'i va'ekue regua iporãgueve SENHOR pe ha'e kuery

ome'ẽ va'ekue ma ndevy peguarã meme amboaxapa.

13 Yvy re onhotŷ mbyre ha'e javi regua jypy'i hi'a va'e xee SENHOR pe ha'e kuery ogueru va'e ma nemba'e meme 'rã. Ndero pygua kuery ngarua pyguarã ha'eve va'e ri ikuai vy ha'e javi 'rã ho'u.

14 SENHOR peguarã Israel kuery omboaxa va'ekue ha'e javi ma ndevygua meme opyta.

15 Ha'e javi regua temimoingo jypy'igua oiko va'ekue xee SENHOR pe ha'e kuery ogueru va'e, avakue e'ŷ vy mymba kuery teĩ ndevy guarã meme 'rã opyta. Ha'e rami avi avakue jypykue oiko va'ekue ma remboekovia uka 'rã, mymba kuery ha'eve'ŷ va'e regua jypy guare remboekovia uka avi 'rã.

16 Peteĩ jaxy'i va'e meme 'rã remboekovia uka. Hekovia repyrã reikuua rami vy ae 'rã ome'ẽ, cinco hatâ'i va'e re, henda iky'a e'ŷ va'e py oiporupy regua doze grama va'e rami ae.

17 Ha'e rã vaka, vexa'i, kavara ra'y kuery jypy'igua va'e ma nomboekoviai 'rã, iky'a e'ŷ va'e ramo. Huguykue ma pemboayvipa 'rã altar áry rupi, ha'e rã ikyrakue ma oapy vy ome'ẽa 'rã SENHOR pe heakuã porã aguã.

18 Ha'e rã ho'okue ma pendevygua 'rãe, ipexo oupi vy ombovava reve ome'ẽ mbyre ro'okue, ha'e hi'u oiporu kuaa regua ro'okue ma ha'e rami ae avi.

19 Xee SENHOR peguarã iky'a e'ŷ va'e Israel kuery ome'ẽ va'ekue ha'e javi amboaxa ndevy, nderajy ha'e nderajy kuery ikuai va'e pe guive, raka'e rã peve guarã. Xee SENHOR renonde py oĩ riae 'rã xereve guarã ajapo va'ekue juky regua, ndee ha'e

neramymino kuery peguarã.*

20 Ha'e gui SENHOR aipoe'i avi Arão pe:

— Ndee ma ndeyvyrã nderejopyi 'rã neĩ ruxã'i voi, heta va'e kuery yvy mbyte neĩ peteĩ henda py voi noĩ 'rã ndeyvyrã. Mba'eta xee ae ma aiko ndevygua rerekva'erã Israel kuery mbyte — he'i.

Dízimo ha'e levita kuery re ijayvuague

21 — Levi ramymino kuery pe ma xee amboaxa dízimo ome'ẽmby ha'e javi. Ha'e kuery peguarã ae opyta oguy nhemboaty oĩaty rupi om̄ba'epoague repyrã.

22 Ha'e rã Israel kuery ma novaẽi 'rã oguy nhemboaty oĩaty py, ha'e kuery ojejavvyague re opaga aguã oĩ ramo omanomba e'ŷ aguã.

23 Levita kuery ae 'rã om̄ba'epo oguy nhemboaty oĩaty rupi, ha'e kuery re ae 'rã oĩ ojejavvy vy opaga aguã. Ha'e va'e lei ma raka'e rã peve oĩ hekorã, hamymino jevy kuery peguarã. Ha'e rã oyvyrã ma neĩ ruxã'i ma voi ndojopyi 'rã Israel kuery mbyte py.

24 Mba'eta Israel kuery dízimo SENHOR pe ome'ẽ okuapy va'e ma amboaxapa levita kuery peguarã. Ha'e kuery pe ma “Israel kuery mbyte rupi pendeyvyrã neĩ ruxã'i ma voi ndapejopyi 'rã”, ha'e rire.

25 Ha'e gui Moisés pe ju SENHOR aipoe'i:

26 — Ndeayvu 'rã levita kuery pe, ha'e vy aipo're: Israel kuery dízimo ome'ẽ va'ekue pendevy guarã amboaxa va'e pejopy vy pemboja'o ju 'rã SENHOR pe. Dízimo ome'ẽ mbyre regua gui dízimo ju 'rã peme'ẽ xevy.

* **18:19** Mba'emo ome'ẽ 'rã juky py omoe'ẽ reve (Levítico 2.13).

27 Ha'e nunga peme'ẽ va'e ma mba'emo pemoa'yĩ va'ekue gui, e'ŷ vy vinho onhamiaty gui jypy'igua peme'ẽ 'rāgue py.

28 Ha'e rami vy SENHOR pe ju 'rā peme'ẽ dízimo Israel kuery po gui pejopy va'ekue ha'e javi guigua. Ha'e nunga gui SENHOR pe peme'ẽ va'e ma sacerdote Arão ae oiporu va'erã.

29 Ome'ẽ mbyre pejopy va'e ha'e javi gui peme'ẽ 'rā SENHOR pegua meme. Ha'e nunga iporāgueve ae 'rā peme'ẽ iky'a e'ŷ va'erã.

30 — Aipo'reve ju 'rā levita kuery pe: Dízimo ome'ẽ mbyre regua iporāgueve peme'ẽ ma rire hembyrekue ma pendevy guarã ae opyta, mba'emo pemoa'yĩ va'ekue gui, e'ŷ vy vinho onhamiaty gui dízimo me'ẽare pe hembyrekue opytaa rami avi.

31 Ha'e nunga pe'ua py rei pe'u teĩ ha'eve, peẽ kuery ha'e pendero pygua kuery guive, oguy nhemboaty oïaty rupi pemb'aepoague repy ae ramo.

32 Ha'e va'e mbyte gui iporāve va'e peme'ẽ aguã peiporavo ramo pendere noĩ 'rā pejejavya. Ha'e rami vy 'rāe mba'emo Israel kuery iky'a e'ŷ va'erã ome'ẽ va'ekue ndopyta jevyi ha'eve'ŷ va'e, pemonomba e'ŷ aguã.

19

Yy joky'a'oa re ijayvuague

1 Ha'e gui SENHOR aipoe'ive ju Moisés ha'e Arão pe:

2 — Pova'e lei rupi SENHOR ojapo uka vy aipoe'i: Aipopeje Israel kuery pe peẽa py togueru peteĩ vaka kunha'i pytã va'e, iporã rei va'e,

ivaikue rei e'ŷ va'e, neĩ peteĩgue ma voi canga py omomba'epo e'ŷ teri va'e.

³ Ha'e va'e ma pemboaxa ju 'rã sacerdote Eleazar pe. Ha'e va'e ju ogueraa 'rã tekaoa gui mombyry'ia py, ha'e vy ojukaa 'rã henonde py.

⁴ Ha'e vy huguykue re sacerdote Eleazar okuã omboovy vy omboayvipa 'rã oguy nhemboaty oĩaty renonde katy. Sete-kue 'rã omboayvi.

⁵ Ha'e oexaa py oapypaa 'rã vaka kunha'i ha'e javi: ipire, ho'okue, huguy ha'e hepoxikue voi. Ha'e javi 'rã oapypa.

⁶ Sacerdote ogueru 'rã peteĩ yvyra yary va'e, hissopo rogue ha'e havijukue pytã va'e, ha'e vy omoĩmba 'rã tata mbyte vaka kunha'i okaia py.

⁷ Ha'e gui ma sacerdote ojoi 'rã oao, ojau 'rã guive yy py. Ha'e rire mae 'rã ojevy ju tekaoa py, teĩ ha'eve'ŷ va'e oiko 'rã ka'aru peve.

⁸ Hapyare voi ojoi 'rã oao ha'e ojau yy py. Ha'e voi oiko 'rã ha'eve'ŷ va'e ka'aru peve.

⁹ Ha'e gui peteĩ ava ha'eve va'e ma tanhimbu vaka kunha'i rugue omboaty ju vy omoĩ porã 'rã tekaoa gui mombyry'ia py, peteĩ henda iky'a e'ŷ va'e ojapo pyre py. Israel kuery ha'e javi peguarã omoĩ porã 'rã, yy joky'a'oa irûrã, jejavya gui joky'a'o aguã.

¹⁰ Ha'e gui vaka kunha'i rugue mono'õare voi ojoi 'rã oao, ha'e ha'eve'ŷ va'e oiko 'rã ka'aru peve. Ha'e va'e ojapo uka pyre ma raka'e rã peve guarã Israel kuery pe, ha'e amboae regua ha'e kuery mbyte rupi ikuai va'e pe guive.

¹¹ — Amongue omanogue re, ava retekue re ri opoko ramo ma ha'eve'ŷ va'e oiko 'rã sete ára peve.

¹² Ha'e gui mboapy araa py, ha'e sete araa py ju

ojeky'a'o uka 'rã ha'e va'e yy py, ha'eve va'e ju oiko aguã. Va'eri mboapy araa py, e'ŷ vy sete araa py ndojeky'a'o ukai ri vy ma ha'eve'ŷ va'e ae 'rã oiko.

13 Xapy'a rei omanogue re, ava retekue re opoko va'ekue ndojeky'a'o ukai vy ma omongy'apa avi 'rã SENHOR mbojeroviaaty. Ha'e va'e ma oipe'aa 'rã Israel kuery mbyte gui, mba'eta hi'áry rupi yy joky'a'oa nomboayviai rire ha'eve'ŷ va'e ae 'rã oiko. Hexe oĩ teri ha'eve'ŷa.

14 — Pova'e lei ma amongue ava peteĩ oo py ri omano rã guarã. Ha'e va'e opy oike va'e, ha'e opy ikuai va'ekue ha'e javi 'rã ha'eve'ŷ va'e ikuai sete ára peve.

15 Mba'emo ryru ojepe'a va'e, imbotya ojokua e'ŷ va'e ma ha'eve'ŷ va'e oiko avi 'rã.

16 Ha'e javive rei mba'ety rupi ooa rupi amongue kyxe py ojuka pyre re opoko va'ekue ma oiko 'rã ha'eve'ŷ va'e sete ára peve, ha'e'ŷ vy amboae rami omano va'ekue re, amongue ava kãgue re, e'ŷ vy te'õgue rupa re mba'e.

17 Ha'eve'ŷ va'e oiky'a'oa aguã ma pejopy 'rã vaka kunha'i oapy va'ekue rugue jejavya gui joky'a'oa va'e regua, ha'e gui hugue áry penhoẽ 'rã yy oxyry va'e, peteĩ hyru py.

18 Peteĩ ava ha'eve va'e ma peteĩ hissopo rogue ogueraa vy omoakŷ 'rã ha'e va'e yy py. Ha'e va'e py omboayvipa 'rã ha'e va'e oo áry rupi ha'e tembiporu ikuai va'e, ha'e py ikuai va'ekue áry rupi, ha'e gui ojuka pyre, e'ŷ vy omano va'ekue kãgue re opoko va'ekue, hupa áry rupi guive.

19 Ha'eve'ŷ va'e áry rupi amongue ha'eve va'e omboayvi 'rã mboapy araa py, ha'e sete araa py ju.

Sete araa py ma oiky'a'o 'rã. Ha'eve'ŷ va'ekue ojoi 'rã oao, ha'e ojau 'rã yy py. Ka'aru jave ha'eve va'e ju 'rã oiko.

20 — Ha'e rami teĩ xapy'a rei amongue ha'eve'ŷ va'e ndojeky'a'o ukai ramo oipe'aa 'rã heta va'e kuery mbyte gui, SENHOR pegua henda iky'a e'ŷ va'e omongy'apa rire. Hi'áry rupi yy joky'a'oa nomboayviai rire ha'eve'ŷ va'e ae 'rã oiko.

21 Ha'e rami aguã ma raka'e rã peve guarã oĩ ha'e kuery ojapo aguã. Yy joky'a'oa mboayviare voi ojoi 'rã oao. Yy joky'a'oa re opoko va'e rei ma oiko 'rã ha'eve'ŷ va'e ka'aru peve.

22 Opa marãgua re ha'eve'ŷ va'e opokoa va'e rei oiko 'rã ha'eve'ŷ va'e. Hexe opoko va'e voi oiko 'rã ha'eve'ŷ va'e ka'aru peve.

20

Miriã omanoague

1 Ha'e gui Israel kuery ha'e javi ovaẽ okuapy Zim regua tekao e'ŷa py. Jypy'igua jaxy py ma Cades py opytapa okuapy. Ha'e py ma Miriã omano, ha'e pyve ju onhono porãa.

Meribá py itaova oĩ va'e Moisés ombovoague

2 Ha'e gui yy nda'ipoi ha'e kuery oy'u aguã. Ha'e ramo onhemboaty okuapy Moisés ha'e Arão rovai.

3 Moisés pe ijayvu atã vy aipoe'i okuapy:

— Ne'exa, oreryvy kuery SENHOR renonde py omanomba jave ore voi romano va'e rire ha'eve'e 'rãgue!

4 Mba'e re tu SENHOR pegua orekuai va'e orererupa raka'e tekao e'ŷa py, romanomba aguã rive, ore kuery ha'e orerymba kuery guive?

⁵ Mba'e re tu Egito yvy gui orererupa ri kova'e tekoa vaikue py oremovaẽ aguã, neĩ mba'emo ra'yigue noña py, neĩ figo'a ma voi, vinho, romã'a, neĩ yy jay'u va'erã voi nda'ipoia py? — he'i okuapy.

⁶ Ha'e ramo heta va'e kuery onhemboaty okuapy va'e renonde gui Moisés ha'e Arão oje'oi vy ovaẽ nhemboaty oĩaty rokẽ py. Ha'e vy guenapyã re oĩ ngova yvy re omovaẽ peve. Ha'e ramove SENHOR rexakãa ojekuaa xapy'a ha'e kuery pe.

⁷ SENHOR aipoe'i Moisés pe:

⁸ — Aÿ eru popoka, ha'e emboatypa ju heta va'e kuery, ndee ha'e nderyke'y Arão voi. Ha'e vy ha'e kuery oexapaa py ndeayvu 'rã itaova oĩ va'e pe, ha'e ramo ixugui onheẽ 'rã yy. Ita gui yy onheẽ aguã rami pejapo vy peme'ẽ 'rã heta va'e kuery pe oy'u okuapy aguã, hymba kuery pe guive — he'i.

⁹ Ha'e ramo popoka SENHOR renonde py oĩ va'ekue Moisés oguenoẽ, SENHOR aipoe'iague rami vy.

¹⁰ Ha'e gui Moisés ha'e Arão omboatypa heta va'e kuery itaova oĩ va'e rexei. Ha'e vy aipoe'i ha'e kuery pe:

— Pendu ke aÿ, pepu'ã rei va'e kuery. Xapy'a rei nda'u rojapo 'rã kova'e itaova oĩ va'e gui yy onheẽ aguã rami, peẽ kuery pey'u aguã? — he'i vy

¹¹ Moisés opo py popoka oguereko va'e oupi vy itaova re oinupã mokoígue. Ha'e ramo onheẽ vaipa ete yy. Heta va'e kuery oy'u okuapy, hymba kuery guive.

¹² Ha'e ramo SENHOR aipoe'i Moisés ha'e Arão pe:

— Peẽ kuery ndapejeroviai va'ekue xere, mba'eta Israel kuery oendua py ndapexa

ukai xeky'a e'ŷ va'ea. Ha'e nunga rupi peẽ ma naperovaẽvei ma 'rã kova'e kuery ijyvyrã ame'ẽague py — he'i.

13 Ha'e va'e yy ma Meribá pygua. Ha'e py ma Israel kuery SENHOR rovai rupi ijayvu atã okuapy ramo ha'e kuery mbyte py SENHOR oexa uka iky'a e'ŷ va'ea.*

*Edom yvy rupi ha'e kuery oaxa oje'oivy aguã re
Moisés ojerure uka tēague*

14 Cades gui Moisés omondouka guembiguai kuery Edom pygua huvixaa py, ixupe aipoe'i aguã: “Po rami ijayvu nderyvy Israel kuery: Reikuaa porã ma ore kuery opa mba'e py orekuai axyague.

15 Mba'eta oreramoĩ kuery Egito yvy katy ogue-jypa raka'e. Ha'e gui ore kuery ju Egito py are vaipa orekuai. Ha'e rã Egito pygua kuery oremoingo axy, ore kuery ha'e oreru kuery voi.

16 SENHOR pe rojapukai ramo oreayvua oendu vy ojeguigua anjo omondouka Egito gui orepe'apaarã. Ha'e gui aŷ ma Cades py orekuai, tetã ndeyvy rexei'i oĩ va'e py.

17 Eja ndeyvy rupi roaxa aguã. Ndoroaxai 'rã penemba'ety rupi, neĩ uvaty rupi. Ndoroy'ui avi 'rã ygua ikuai va'e gui. Tape iporãve va'e rupi anho 'rã roguata, ndoropiai 'rã jaiporu kuaa katy, neĩ jaiporu kuaa e'ŷa katy ma voi, ndeyvy rupi roaxapa peve”, he'i uka.

18 Ha'e ramo Edom pygua aipoe'i uka ixupe:
— Peaxa eme ta'vy xeyvy rupi, rovaexĩ vy aa e'ŷ aguã kyxe reve — he'i.

19 Ha'e gui Israel kuery aipoe'i ju okuapy ixupe:

* **20:13** Tery Meribá ma “Aiyua ete-ete” 'ea (Êxodo 17.7).

— Tape jeporuve va'e rupi anho 'rã roje'oi. Xapy'a rei xee ha'e'ÿ vy xerymba kuery nemba'e yy roy'u ri vy apagapa 'rã hepya rami tema. Amboae nunga ma ndaiptai, yvy rupi roaxa aguã e'ÿ vy.

20 Ombovai:

— Peaxa eme ta'vy — he'i vy Edom kuery oupa nhoguenoiny heta avakue reve ovaexí aguã, opo'akaa oexa uka reve.

21 Ha'e rami vy Edom kuery ndoejai Israel kuery ijyvy rupi oaxa aguã. Ha'e ramo Israel kuery ojepekuavo oje'oivy ha'e va'e gui.

Números 33.38,39

22 Cades gui Israel kuery ha'e javi ikuai va'ekue oje'oi vy oguata oje'oivy Hor yvyty katy.

23 Hor yvyty re Edom yvy opa'ia py ma SENHOR aipoe'i Moisés ha'e Arão pe:

24 — Arão nhe'ẽ ma heraa 'rã tamoi kuerya py, novaëi 'rã Israel kuery yvyrã ame'ẽ va'e py, Meribá py yy onheẽ jave naxenhe'ẽ rendu potai rire.

25 Eraa ha'vy Arão ha'e ta'y Eleazar, ha'e enoẽ Hor yvyty apyte peve.

26 Ha'e rire ma emboi Arão ao, ha'e gui ijaokue py ta'y Eleazar ju emonhemonde, mba'eta Arão ma oipe'aa 'rã tuu kuery ooague katy, ha'e py ae 'rã omano — he'i.

27 Moisés ojapo SENHOR ojapo ukaa rami vy. Jugueraa nhoguenoiny Hor yvyty katy heta va'e kuery ha'e javi oexaa gui.

28 Arão ao Moisés omboi vy ta'y Eleazar ju omonhemonde ijaokue py. Ha'e py Arão omano yvyty apyte py ae. Ha'e rã Moisés ha'e Eleazar ma oguejy ju jogueruvy ha'e gui.

²⁹ Ha'e ramo heta va'e kuery Arão omanoague oikuua ma vy ha'e kuery ha'e javi ojae'o hexe. Trinta ára re ojae'o okuapy.

21

Arade pygua huvixa oity okuapyague

¹ Ha'e gui ma cananeu regua Arade pygua huvixa Neguebe py oikoa py oendu omombe'ua rã Israel kuery tape rupi ou okuapya Atarim katy. Ha'e rami vy Israel kuery re opu'ã vy amongue ogueraa escravo-rã.

² Ha'e ramo Israel kuery SENHOR renonde on-hemboayvu vy aipoe'i okuapy:

— Orepo py ri ha'e va'e kuery remboaxapa ramo romomba ete 'rã ha'e kuery retã ikuai va'e — he'i.

³ Israel kuery ijayvua SENHOR oendu vy ipo py ombaoxapa cananeu kuery. Ha'e ramo Israel kuery omomba ete, hetã ikuai va'e guive. Ha'e va'e tekoa ma oenoĩ okuapy Horma.*

Mboi ra'angaa overa va'e guigua re ijayvuague

⁴ Ha'e gui Hor yvyty gui oje'oipa okuapy. Ye'ẽ Pytã va'e yvýry tape oo va'e rupi oje'oi, Edom yvy rovai rupi oaxa aguã. Ha'e rami teĩ Israel kuery oguataa rupi nda'evei ete ju okuapy.

⁵ Ha'e vy ijayvu okuapy Nhanderuete ha'e Moisés rovai rupi. Ha'e vy aipoe'i:

— Mba'erã tu Egito yvy gui orererupa ri, kova'e tekao e'ŷa py romanomba aguã ty'y, mbojape neĩ yy ma voi nda'ipoia py? Mba'eta orenhe'ẽ py voi

* ^{21:3} Tery Horma ma “Ombovaipaague” 'ea.

orekane'õmba ma kova'e nunga mbojape ovare e'ŷ va'e anho ro'u vy — he'i.

⁶ Ha'e ramo ha'e kuery mbyte rupi SENHOR ombou mboi inharõve va'e, ixu'upaarã. Ha'e ramo heta omano Israel kuery va'e regua.

⁷ Moisés-a py ha'e kuery oupa vy aipoe'i okuapy:
— Rojejavypa ra'e, mba'eta SENHOR rovai ha'e nderovai rupi oreayvu. Ejerure ha'vy SENHOR pe ore kuerya gui oipe'apa aguã mboi — he'i ramo Moisés ojerure ha'e kuery re.

⁸ Ha'e gui SENHOR aipoe'i Moisés pe:

— Ejapo ke peteĩ mboi inharõve va'e ra'angaa, ha'e eupi imoiny yvyra po'i apy re. Ha'e gui ha'e javive oixu'u va'ekue ha'e nunga re oma'ẽ vy oikove 'rã — he'i.

⁹ Ha'e ramo Moisés ojapo peteĩ mboi ra'angaa overa va'e gui, ha'e vy oupi imoiny peteĩ yvyra po'i apy re. Ha'e gui amongue mboi oixu'u ramo overa va'e guigua re oma'ẽ va'e okuera kuerei.*

Israel kuery oguata oje'oivyague

¹⁰ Ha'e gui Israel kuery oje'oipa vy Obote py ju ikuai.

¹¹ Ha'e gui Obote gui oje'oi vy Ijé-Abarim py ju optya okuapy, tekoa e'ŷa Moabe rexei oĩ va'e py, kuaray oua katy.

¹² Ha'e gui oje'oi vy Zerede yvy'ã guy py ju optya.

¹³ Oje'oi jevy vy Arnom yakã rovai ju optya okuapy, tekoa e'ŷa amorreu kuery rekoa peve oo va'e py. Mba'eta Arnom yakã ma Moabe yvy apy'i rupi oĩ, Moabe ha'e amorreu kuery rekoa mbyte py.

* **21:9** João 3.14-15

14 Ha'e nunga rupi ae SENHOR joe opu'ãa regua oĩa kuaxia re ipara oiny:

“Vaebe tekaoa Sufa re oĩ va'e,
ha'e Arnom yakã yvýry yvy'ã guy ikuai va'e
rupi,

15 ha'e gui yvyugua gui jaguejya rupi
jaguejyve 'rã Ar tekaoa katy,

Moabe tekaoa apy'ia py nhavaẽa peve.”

16 Ha'e gui ma Beer katy ju oguata oje'oivy. Ha'e
va'e ygua ma Moisés pe SENHOR aipoe'iague: “Em-
boatypa heta va'e kuery, ha'e ramo ame'ẽ 'rã yy”,
he'iague va'e.

17 Ha'e ramo pova'e mboraei rupi Israel kuery
oporai okuapy:

— Tovu yy! Perovy'a ke mboraei rupi!

18 Yguarã huvixa kuery ojo'o va'ekue,

heta va'e kuery regua yvatekueve ojo'o
va'ekue

yvyra py rive, popoka oguereco va'e py ae —
he'i okuapy.

Ha'e gui ma tekaoa e'õa gui Matana katy ju oguata
oje'oivy.

19 Matana gui ma Naaliel katy ju oje'oi, ha'e Naaliel
gui ma Bamote katy,

20 ha'e Bamote gui ma yvy'ã guy Moabe yvy oĩ va'e
katy ju oje'oi, Pisga yvyty áry peve. Ha'e va'e apyte
gui nhama'ẽ 'rã tekaoa e'õa katy.

Deuteronômio 2.26-37

21 Ha'e gui ma Seom amorreuu kuery ruvixaa py
Israel kuery omondouka ayvu reraarã. Ha'e vy
aipoe'i:

22 — Oremboaxa uka ke ndeyvy rupi. Ndoropiai
'rã mba'ety ikuai va'e rupi, neĩ uvaty rupi. Ygua

gui voi ndoroy'ui 'rã. Roguata 'rã roje'oivy tape iporãve rupi anho, ndeyvy rupi roaxapa peve — he'i uka.

23 Ha'e rami teĩ Seom nomboaxa ukai Israel kuery oyvy rupi. Ha'e rami 'rãgue py ojeupegua kuery omboatypa vy oje'oi Israel kuery ovaexi aguã tekaoa e'ÿa py. Jasa py ovaãa py opu'ã okuapy Israel kuery rovai.

24 Teĩ Israel kuery ma kyxe py ojuka reta vy ipo'aka ijyvy re, Arnom yakã guive Jaboque peve, Amom ramymino kuery rekaoa peve. Ha'e va'e tekaoa apy'i rupi ikorapa va'e.

25 Ha'e rami vy Israel kuery ojopypa amorreu kuery retã ikuai va'ekue, ha'e va'e py ju ikuai, Hesbom py ha'e ijyvýry tekao'i ikuai va'e ha'e javi rupi.

26 Mba'eta Hesbom tetã ma amorreu kuery ruvixa Seom openaaty ae. Ha'e va'e ma Moabe pygua ruvixa yma guare re opu'ã vy ijyvy ojopypa va'ekue Arnom yakã peve,

27 ijayvu kuaa va'e kuery aipoe'ia rami:

“Peju ke Hesbom tetã py! Pejapo ju,
pemoatyrõmba ju Seom opena atyrã.

28 Mba'eta Hesbom gui tata oẽ,
tataendy nhomombaarã oẽ Seom pegua tetã
gui,
ha'e vy omomba Moabe kuery rekaoa Ar,
ha'e Arnom yvýry yvy'ã re yvatekueve ikuai
va'ekue ha'e javive.

29 Moabe kuery, nda'evei ete 'rã pãvy!
Quemos pe pendekuai va'e, okanhhygue ma
peiko.

Mba'eta ojapo pendera'y kuery onhamba
aguā rami,
ha'e penderajy kuery escravo-rā ogueraapa
aguā rami,
amorreu kuery ruvixa Seom peguarā ae.

30 Ore kuery ma roitypa ma.

Okanhymba ete Hesbom guive Dibom peve.
Rombovaipa ma Nofa peve,
tata py roapypa Medeba peve.”

Deuteronomio 3.1-11

31 Ha'e rami vy amorreu kuery yvy re ju Israel
kuery hekoia.

32 Ha'e va'e rire Jazer tetā re ju Moisés oexa pota
uka ma ramo Israel kuery ipo'aka hekoia ijyvýry
ikuai va'e ha'e javi reve, amorreu kuery ha'e py
ikuai va'ekue oipe'apa vy.

33 Ha'e gui ojevypa ju vy oje'oi Basā tetā katy tape
oo va'e rupi. Ha'e ramo Basā pygua huvixa Ogue
va'e ou ha'e kuery rovai, ojeupegua kuery ha'e javi
reve. Ha'e vy joe opu'ã okuapy Edrei py.

34 Ha'e gui SENHOR aipoe'i Moisés pe:

— Ekyje eme ha'e kuery gui, mba'eta xee amboaxa ma ndepo py, huvixa ha'e ixupegua kuery
ha'e javi, ijyvy voi. Ha'e kuery re pejapo 'rā
amorreu kuery ruvixa Seom Hesbom pygua re
pejapoague rami ae — he'i.

35 Ha'e ramo ojuka reta okuapy, huvixa, ta'y kuery
ha'e ixupegua kuery ha'e javi. Ha'e kuery va'e
regua neī peteī'i ma voi ndoo jepei. Ijyvy re
ipo'aka avi ombo'erā.

22

Balaão-a py ayvu reraa kuery Balaque omon-doukaague

¹ Israel kuery ha'e gui oje'oipa vy opyta ju okuapy Moabe yvy rupi Jordão rovaigua re, Jericó tetã rexei.

² Ha'e gui ma Zipor ra'y Balaque oexapa va'ekue Israel kuery amorreu kuery re ojapoague.*

³ Ha'e rami vy ha'e kuery gui Moabe kuery okyje vaipa okuapy, heta raxa ramo. Nda'evei ete ikuai Israel kuery ou rã oexa vy.

⁴ Ha'e va'e javé ma Moabe pygua huvixa ma Zipor ra'y Balaque ae.

Ha'e rami vy Moabe pygua huvixa aipoe'i Midiã pygua kuery yvatekueve pe:

— Aÿ ma ha'e kuery heta ete vy omomba 'rã orevvýry ikuai va'e, vaka nhuũ mba'ety rupi oĩ va'e ho'upaa rami avi — he'i.

⁵ Ha'e rami vy guembiguai kuery omondouka Beor ra'y Balaão oenoĩ aguã. Ha'e va'e ma Eufrates yakã yvýry oiko Petor py, hetarã kuery ikuiaia py ae. Ha'e va'e pe aipoe'i uka:

— Aÿ ma peteĩ regua Egito yvy gui ou vy ojao'ipa ma okuapy yvy ha'e javi. Ha'e kuery ma xerekoa renonde katy ae ju ikuai.

⁶ Ha'e gui aÿ ajerure ndevy: Eju na ha'e kuery re ndeayvu vai aguã, xegui ipo'akapave ramo. Xapy'a rei rã ha'e kuery va'e regua ajuka vy aipe'apa 'rã xeyvy gui, mba'eta xee aikuaa reroayvu porã va'ekue rei ayvu porãmby ae 'rã

* **22:2** Balaque ma Moabe pygua huvixave.

ikuai, ha'e amongue re ndeayvu vai rire ma ayvu vaipy 'rã oiko — he'i uka.

⁷ Ha'e ramo Moabe ha'e Midiã pygua yvatekueve oje'oi. Ngupive ogueraa avi ijayvu vaia omboekovia aguã. Balaão-a py ovaẽmba ma vy ixupe omombe'u okuapy Balaque ijayvuague ha'e javi.

⁸ Ha'e ramo Balaão aipoe'i ha'e kuery pe:

— Pepyta ke apy kova'e pyávy, ha'e gui aikuaa uka 'rã amboavaia, SENHOR ijayvua rami vy ae — he'i ramo Balaão ro py Moabe pygua yvatekueve opyta okuapy.

⁹ Ha'e gui Balaão-a py Nhanderuete ojekuaa vy aipoe'i:

— Marã ramigua tu kova'e avakue ndero py ikuai va'e?

¹⁰ Balaão ombovai Nhanderuete pe:

— Ha'e kuery ma Zipor ra'y Balaque Moabe pygua huvixa va'e ombou va'ekue xereve ijayvu aguã. Ha'e vy aipoe'i xevy:

¹¹ “Egitó yvy gui ou va'ekue regua ojao'ipa ma okuapy yvy ha'e javi. Aÿ ma eju na ha'e kuery re ndeayvu vai aguã. Xapy'a rei ha'e kuery re xepo'aka nho 'rã xeyvy gui aipe'apa aguã rami”, he'i va'ekue xevy.

¹² Ha'e ramo Nhanderuete aipoe'i Balaão pe:

— Tereo eme ha'e kuery reve, ndeayvu vai eme guive heta va'e kuery re. Mba'eta ha'e kuery ma ijayvu porãmby ae ikuai — he'i.

¹³ Ha'e gui ko'ëgue Balaão opu'ã vy aipoe'i Balaque pegua yvatekueve pe:

— Tapeo ju pendeyvy katy, mba'eta SENHOR naxemondoukai penderupive — he'i.

14 Ha'e ramo Moabe pygua yvatekueve opu'ã vy oje'oi ju Balaque-a py. Ha'e vy aipoe'i okuapy:

— Balaão rima ndouxei orereve — he'i okuapy.

15 Ha'e gui yvatekueve mboae ju Balaque omondouka, jypygua kuery gui hetave ha'e omboetevepy va'e.

16 Ha'e va'e kuery ma Balaão-a py ovaẽ vy aipoe'i okuapy:

— Po rami ma Zipor ra'y Balaque ijayvu: “Ajerure ndevy: Emboare eme xea py reju aguã, **17** mba'eta anhetẽ ete rojapo 'rã omboetepy. Ndeayvua ha'e javi tema 'rã ajapo. Ha'e gui ajerure ndevy: Eju ke, ndeayvu vai kova'e kuery re”, he'i uka va'ekue ndevy.

18 Ha'e ramo Balaque pegua yvatekueve pe Balaão ombovai:

— Xevy pe Balaque ngoo prata ha'e ouro tynyẽ reve ome'emb̄a teĩ xee mba'eve ndajapoi 'rã SENHOR Xeruete ojapo uka va'e e'ŷ vy, mba'emo kyr̄i'i va'e e'ŷ vy tuvixa va'e teĩ.

19 Ha'e rami avi aŷ ajerure kova'e pyávy peẽ kuery pepyta aguã apy, aikuaa aguã xapy'a rei xevy SENHOR omombe'uve rã — he'i.

20 Pyávy Balaão-a py SENHOR ojekuaa vy aipoe'i ixupe:

— Ha'e va'e avakue ndereraaxe vy ou ramo epu'ã, tereo ha'e kuery reve. Ha'e rami teĩ rejapo 'rã xeayvua anho.†

† **22:20** Nhanderuete nomondoukaxeit teĩ omondouka nho, mba'eta oikuua vy Balaão ooxe etea (versículo 12). Ha'e gui Balaão ma oikuua ma voi Nhanderuete nomondoukaxeia, teĩ oo nho Nhanderuete oipotaa rami e'ŷ.

*SENHOR-a guigua anjo ha'e Balaão rymba
mburika'i ojoko-jokoague*

²¹ Ko'ẽmba jave Balaão opu'ã vy ombokupe áryguapa guymba mburika'i, ha'e vy oo Moabe pygua yvatekueve reve.

²² Ha'e oo ramo Nhanderuete poxya hendy. Ha'e rami vy SENHOR-a guigua anjo opyta tape henonde oo aguã py ojoko aguã. Ha'e rami jave Balaão oguata ovy mburika'i áry. Hexeve oo avi mokoĩ hembiguai.

²³ Ha'e gui henda mburika'i oexa SENHOR-a guigua anjo tape py opyta ho'amy rã, opo py okyxé hyru gui oekyi va'ekue oguerekó reve. Ha'e ramo mburika'i ma tape gui ojepekuavo ovy vy mba'ety rupi ju oo oiny. Ha'e ramo Balaão oinupã mburika'i tape rupi ae ju ojevy aguã.

²⁴ Ha'e gui ma SENHOR-a guigua anjo ma peteĩ henda uvaty mbyte rupi hi'aĩ, kora joavaive rupi oĩ va'e py.

²⁵ Mburika'i ma SENHOR-a guigua anjo hi'aĩ rã oexa vy kora re ojekyty vy oumbiri heravy Balaão retyma. Ha'e ramo Balaão ojeaive ju.

²⁶ Ha'e gui henonde katy SENHOR-a guigua anjo oove vy peteĩ henda ipo'i'ivea py ju hi'aĩ, ojepekuavo aguã ha'eve'ña py oiporu kuaa katy, neĩ oiporu kuaa e'ña katy ma voi.

²⁷ Ha'e gui mburika'i ma SENHOR-a guigua anjo hi'aĩ rã oexa vy ho'a oupy Balaão guy rupi. Ha'e ramo Balaão ivai ete vy oinupãmba mburika'i yvyra py.

²⁸ Ha'e ramo SENHOR ojapo mburika'i ijayvu aguã rami. Ha'e vy aipoe'i Balaão pe:

— Mba'e tu xee ajapo ndevy, mboapykue ma xenupāmba aguã?

29 Balaão ombovai mburika'i pe:

— Mba'eta xeavyky rei. Xepo py kyxe areko va'e rire aŷ'i ma voi rojuka 'rāgue — he'i.

30 Ha'e ramo mburika'i ijayvu Balaão pe:

— Xapy'a rei nda'u xee nerymba mburika'i e'ŷ ri aiko, xe'áry e'ŷ nda'u reĩ, reikoa pukukue re aŷ peve? Xapy'a rei nda'u nami ae pa ndevy ajapo jepi?

Ombovai vy

— Any ri — he'i.

31 Ha'e gui Balaão rexâ SENHOR oipe'a ramo oexa SENHOR-a guigua anjo tape py hi'aĩ rã, kyxe hyru gui oekyi va'ekue opo py oguereko reve. Ha'e ramo oakã omboguejy vy ngova omovaẽ yvy re.

32 SENHOR-a guigua anjo aipoe'i ixupe:

— Mba'e re tu mboapykue ma reinupāmba mburika'i? Ne'exa, xee ma nderovai guarã aju, mba'eta xerenonde rupi ha'eve'ŷa rami reiko.

33 Mburika'i ma xerexa vy ae mboapykue ma ojepekuavo xegui. Anhetê ete ha'e rami e'ŷ va'e rire xee rojuka ma 'rāgue, ha'e rã nerymba ma aeja 'rāgue oikove reve — he'i.

34 SENHOR-a guigua anjo pe Balaão ombovai:

— Ajejavy, mba'eta ndaikuuai kova'e tape py xejokoarã ne'aĩa. Ha'e rã xapy'a rei rã ha'eve'ŷ va'e ri reikuua ramo ma ajevy ju 'rã.

35 SENHOR-a guigua anjo ombovai:

— Tereo tema peva'e avakue reve. Ha'e rami teĩ xeavyua rami anho 'rã ndeayvu — he'i ramo Balaão oo ju oiny Balaque pegua yvatekueve reve.

36 Ha'e gui Balaão ovaẽ ta maa Balaque oendu vy oẽ ovaexĩ aguã peteĩ tetã Moabe regua Arnom yakã ovaã peve, oyvy apy peve etc.

37 Ha'e rami vy Balaque oporandu Balaão pe:

— Xee namondoukai ri ty'y xerembiguai kuery nerenoĩ aguã? Mba'e re tu ndereju voi ri xea py? Xee nda'u nanemboete kuaai ri?

38 Balaão ombovai Balaque pe:

— Apy ma xee aĩ nerondenpe py. Xapy'a rei nda'u xee ju aỹ ha'eve 'rã xeayvu aguã mba'emo re rei? Ha'e rami 'rãgue py ayvu Nhanderuete xevy omombe'u uka va'e rupi anho 'rã xeayvu — he'i.

39 Ha'e gui Balaque reve Balaão oo vy ovaã okuapy Quiriate-Huzote py.

40 Ha'e ramo Balaque ma vaka ha'e vexa'i ojuka uka vy ho'okue omondouka Balaão pe ha'e hexeve yvatekueve ikuai va'e pe.

41 Ko'ëgue Balaque Balaão ogueraa vy oguenoẽ heravy Bamote-Baal apyte peve. Ha'e va'e gui ma Balaão oexa Israel kuery regua ha'e'i pyve ikuaiia.

23

Balaão jypy'i Israel kuery ogueroayvu porãague

1 Ha'e ramo Balaão aipoe'i Balaque pe:

— Ejapo na sete altar xevy, ha'e vy ejuka sete toro ra'y ha'e sete vexa'i — he'i ramo

2 Balaque ojapo Balaão ijayvuague. Peteĩ-teĩ altar áry Balaque ha'e Balaão oapy peteĩ toro ra'y ha'e peteĩ vexa'i.

3 Ha'e gui Balaão aipoe'ive ju Balaque pe:

— Ndee ma epyta apy altar áry reapy va'ekue yvýry, ha'e rã xee ma aa 'rã mombyry'i. Xapy'a rei

SENHOR xererovaexí vy ou ramo ma aju vy ndevy amombe'upa 'rã oexa uka va'e rei — he'i vy oẽ ový peteĩ vyty áry.

⁴ Ha'e gui Balaão reve Nhanderuete nhovaexí ouvy ramo aipoe'i ixupe:

— Xee ma sete altar ma ajapo ndevy, ha'e gui peteĩ-teĩ áry apy ma peteĩ toro ra'y ha'e peteĩ vexa'i — he'i.

⁵ Ha'e ramo SENHOR ome'ẽ ayvu Balaão omombe'u va'erã. Ha'e vy aipoe'i:

— Tereo ju Balaque-a py. Ha'e vy xeayvua rami ae 'rã ndeayvu — he'i.

⁶ Ha'e katy ju Balaão oo vy altar ikuaiia py ovaẽ rã altar yvýry teri Balaque hi'aĩ, Moabe pygua yvatekueve ha'e javi reve.

⁷ Ha'e ramo ayvu omombe'u vy aipoe'i:

— Balaque ma xereru ruka Arã gui,
Moabe pygua huvixa xerenoĩ kuaray ou katy vyty oĩ va'e gui.

“Eju na, Jacó ramymino kuery re ndeayvu vai aguã,

ejу ndeayvu rei Israel kuery re”, he'i uka.

⁸ Ha'e rami avi mba'exa tu xeayvu vai ta Nhan- deruete nda'ijayvu vaia kuery re?

Mba'exa tu xeayvu rei ta SENHOR nda'ijayvu reia kuery re?

⁹ Mba'eta xee ma vyty áry gui aexa Israel kuery, yvý'ã xe'aña gui ama'ẽ ha'amy ha'e kuery re.

Ha'e vy xee aexa rã ha'e kuery ae'i ikuai va'e regua,

ha'e kuery pe “Yvy regua” nda'eai 'rã.

¹⁰ Mava'e ha'vy oipapa kuaa ta Jacó ramymino kuery yvý ku'i rami heta va'e,

mava'e oipapa kuaa ta Israel kuery heta va'e
apý re'i voi?

Xee ma tamano heko porã va'e kuery rami,
ha'e kuery opaa rami avi tapa — he'i.

11 Ha'e ramo Balaque aipoe'i Balaão pe:

— Mba'e tu rejapo xere? Xee ma roenoĩ xe-
rovaigua kuery re ndeayvu vai aguã, va'eri ndee
ma reroayvu porã.

12 Ha'e rã ombovai:

— Xapy'a rei nda'u ayvu SENHOR omombe'u uka
va'ekue rupi e'ŷ 'rã ri xeayvu? — he'i.

*Balaão mokoĩguea Israel kuery ogueroayvu
porãague*

13 Ha'e ramo Balaque aipoe'i ixupe:

— Xee ajerure ndevy: Eju, amboae katy ju jaa
xerupive, ha'e kuery rexâ aguã py. Ha'e'i rupive
ikuai va'e anho 'rã rexâ, ha'e javi e'ŷ. Ha'e vy
ndeayvu vai 'rã ha'e gui — he'i vy

14 Zofim regua nhuũndy rupi ju ogueraa, Pisga
yvyty apyte áry. Ha'e py ma sete altar ju ojapo, ha'e
peteĩ-teĩ áry oapy Peteĩ toro ra'y ha'e Peteĩ vexa'i.

15 Ha'e ramo Balaão aipoe'i Balaque pe:

— Epyta ke apý altar áry reapy va'ekue yvýry,
ha'e rã xee ma aa ta pe'i py SENHOR reve aikuaa
pota aguã — he'i.

16 Balaão-a py SENHOR ojekuaa ju vy ixupe ome'ẽ
ayvu omombe'u va'erã. Ha'e vy aipoe'i:

— Tereo ju Balaque-a py. Xeayvua rami 'rã
ndeayvu.

17 Ha'e gui Balaque oĩa py ojevy rã ho'ame
teri altar yvýry. Hexeve ikuai avi Moabe pygua
yvatekueve. Ha'e vy oporandu:

— Mba'e he'i SENHOR?

¹⁸ Ha'e ramo Balaão ayvu omombe'u vy aipoe'i:

— Epu'ã ke Balaque, rendu aguã.

Ndee Zipor ra'y, ejapyxaka xeayvu re.

¹⁹ Nhanderuete ma ava e'ÿ oiko ijapu aguã,

ava ra'y e'ÿ guive oiko nda'evei nho ju aguã.

Xapy'a rei nda'u ha'e nome'ëi 'rã ri ome'ë 'rã
va'ekue?

Ha'e ijayvu rire ndojapoi 'rã ri nda'u ha'e rami
he'iague?

²⁰ Ma'ë, ha'e ijayvu ha'e kuery aroayvu porã aguã
re.

Ha'e gui ha'e ogueroayvu porãague ma xee
nda'evei amboaxa rive aguã.

²¹ Mba'eta Jacó kuery re ha'e ndoexai mba'emo
vai,

nonhembopy'ai guive Israel kuery omoingo
axy aguã.

Ha'e kuery reve SENHOR tuuete oiko,
ha'e kuery mbyte gui onhendu nguvixave
oguerovy'a okuapya regua.

²² Egito yvy gui Nhanderuete ogueraapa raka'e,
ha'e kuery ma toro ka'aguy regua rami 'rã
imbaraete.

²³ Mba'eta Jacó kuery rovai rupi mba'evykyá
nda'eve ranhei 'rã,

Israel kuery rovai mba'ekuaa ndovarei 'rã.

Aÿ ma Jacó ha'e Israel kuery re aipo'ea 'rã:

“Mba'emo iporã ete va'e ha'e kuery pe Nhan-
deruete ojapo!”

²⁴ Ma'ë, ha'e kuery opu'ã 'rã guary kunha rami,
guary rami ete 'rã opu'ã.

Mba'eta nonhenoi 'rã guembia ho'upa e'ÿa ja,
ojuka va'ekue ruguy voi oy'u va'e — he'i.

25 Ha'e ramo Balaque aipoe'i Balaão pe:
 — Ndeayvu vai eme ha'e kuery re, neĩ eroayvu
 porã eme guive.

26 Ha'e rã Balaão ombovai vy aipoe'i Balaque pe:
 — Aipo nda'ei ri ty'y: “SENHOR ijayvua ha'e javi
 ma xee ajapo 'rãe”, nda'ei ae ty'y ndevy?

27 Ha'e rami rã Balaque aipoe'ive ju Balaão pe:
 — Neĩ ke eju, amboae katy jevy ta rogueraa.
 Xapy'a rei ma ha'e py Nhanderuete ojou porã 'rã
 ndeayvu vai aguã — he'i.

28 Ha'e rami vy Peor vvyty apyte peve ju Balaque
 ogueraa Balaão. Ha'e va'e gui ma teko a e'ÿa ha'e
 javi ojekuaa 'rã.

29 Ha'e gui Balaão aipoe'i Balaque pe:
 — Apy voi ke ejapo xevy sete altar, ha'e eapy ju
 sete toro ra'y ha'e sete vexa'i — he'i.

30 Balaão ijayvuague rami vy Balaque ojapo vy
 peteĩ-teĩ altar áry oapy peteĩ toro ra'y ha'e peteĩ
 vexa'i.

24

*Balaão mboappykuea Israel kuery ogueroayvu
 porãague*

1 Ha'e gui Balaão oikuua ae ma SENHOR Israel
 kuery ogueroayvu porãxeia. Ha'e rami vy ha'ekue
 rami e'ÿ ndooi ranhe imba'ekuaa aguã. Ha'e rami
 'rãgue py teko a e'ÿa katy oma'ë ho'amy.

2 Balaão oma'ë vy oexa Israel kuery peteĩ-teĩ regua
 ikuai va'e. Ha'e gui hexe ou Nhanderuete-a guigua
 Nhe'ë.

3 Ijayvu vy aipoe'i:
 — Po rami ma Beor ra'y Balaão ijayvu,
 ava mba'emo oexa porã va'e ayvu,

- ⁴ Nhanderuete hayvu oendu va'e ayvu ae.
 Mba'eta Ipo'akapa va'e oexa uka va'e aexa vy
 xerenapy'ã re aĩ reve ama'ẽ porã va'e.
- ⁵ Jacó kuery, oo pendekuaia va'e ma iporã va'e
 meme!
 Israel kuery, penderekao ma iporã ete!
- ⁶ Yvy'ãmbe reia rupi ojekuaa,
 yvoty ty yakã yvýry onhotý mbyre rami,
 yvyra sândalo rembypy SENHOR onhotý
 va'ekue rami,
 yary yy yvýry rupi hi'aĩ va'e rami.
- ⁷ Ha'e kuery yryru py ndoatai 'rã yy,
 mba'emo ra'yã onhotýa rupi voi inhaký porã
 riae 'rã.
 Ha'e kuery ruvixave ma Agague gui 'rã yvat-
 eve,
 ipo'akaa voi omboetevepy.
- ⁸ Israel kuery Egito yvy gui Nhanderuete ogueru
 va'ekue ma
 toro ka'aguy regua rami imbaraete va'e.
 Ha'e vy omomba 'rã ngovaigua kuery yvy
 regua.
 Omopõmba 'rã ikãgue.
 Ngu'y py onhyvõmba 'rã.
- ⁹ Ha'e kuery oguapy vy onheno 'rã guary rami,
 ha'e guary kunha rami. Mava'e 'rã tu
 omomyí?
 Ovy'a ete 'rã ha'e kuery reroayvu porãare,
 ha'e rã ha'e kuery re ijayvu vai va'ekue ma
 ayvu vaipy ikuai — he'i.
- ¹⁰ Ha'e ramo Balaão pe Balaque ipoxy raxa. Ha'e
 vy aipoe'i Balaão pe:
 — Xee ma xerovaigua kuery pe ndeayvu vai
 aguã roenoĩ teĩ mboapykue ma reroayvu porã.

11 Ha'e nunga rupi aŷ ma tereo ju ndero katy. Xee ma "Ndevy ame'ẽ 'rã mba'emo porã" ha'e va'ekue ri aŷ SENHOR ojapo ma mba'eve rejopy e'ŷ aguã rami — he'i.

12 Ha'e ramo Balaão ju aipoe'i Balaque pe:

— Ha'e rami avi nerembiguai kuery xea py remondouka va'ekue pe xee aipo nda'ei ty'y:

13 "Xapy'a rei Balaque ngoo ouro ha'e prata tynyẽ reve xevy ome'ẽ teĩ xee ma mba'eve ndajapoi 'rã SENHOR ojapo uka va'e e'ŷ vy, aroayvu porã aguã, e'ŷ vy xeayvu vai aguã teĩ. SENHOR ijayvuague rupi ae 'rã xee xeayvu", nda'ei ae ri ty'y?

14 Ha'e gui aŷ xee aa ju ta xeretarã kuery rekoa katy. Ha'e rami teĩ enhemboja ranhe, ndevy amombe'u ta raka'eve rã ndevygua kuery re kova'e kuery ojapo 'rãa — he'i.

Jaxy-tata Jacó guigua re Balaão ijayvu ma voiague

15 Ha'e vy Balaão ayvu omombe'u vy aipoe'i:

— Po rami ma Beor ra'y Balaão ijayvu,
ava mba'emo oexa porã va'e ayvu,

16 Nhanderuete hayvu oendu va'e ayvu ae.

Mba'eta Yvateve ete va'e oikuaa uka va'e aikuaa va'e,

Ipo'akapa va'e oexa uka va'e aexa va'e,
ha'e xerenapy'ã re aĩ reve ama'ẽ porã va'e.

17 Ha'e gui peteĩ aexa teĩ aŷ'i oiko va'erã e'ŷ guive,
aexa teĩ ovaẽ rai'i va'erã e'ŷ.

Mba'eta peteĩ jaxy-tata oiko 'rã Jacó ramymino,

Israel kuery mbyte gui peteĩ ou 'rã po pygua reveguia,

Moabe kuery akã rupi omopẽmba va'erã,

ha'e Sete ramymino kuery mombaarã.

¹⁸ Mba'eta Edom yvy re ipo'aka 'rã,
ngovaigua kuery Seir yvy re voi ipo'aka 'rã.
Ha'e rã Israel kuery ma imbaraetea rupi 'rã
ikuai.

¹⁹ Mba'eta Jacó kuery mbyte gui oiko 'rã joe
ipo'aka va'erã.
Ha'e va'e omomba 'rã peneretã rupi pekuave
va'ekue'-ekue — he'i.

²⁰ Ha'e gui Balaão amalequita kuery ju oexa vy
ayvu omombe'uve. Ha'e vy aipoe'i:
— Amalequita kuery ma yvy regua kuery gui
penderetave va'eri
opaa py ma penemokanhymbaa 'rã — he'i.

²¹ Oexa avi Queneu kuery. Ha'e vy ayvu
omombe'u vy aipoe'i:
— Penderekoa ma oĩ porã ranhe,
nderaityrã itaova re rejapo va'ekue ri,

²² teĩ peẽ Queneu kuery penemombaa 'rã.
Raka'e peve 'rã tu? Assur pygua kuery pen-
dereraapa 'rã escravo-rã — he'i.

²³ Ayvu omombe'u teri vy aipoe'i:
— Haxy ete 'rã! Mava'e tu oikove 'rã
Nhanderuete ha'e nunga omoingo jave?

²⁴ Mba'eta Quitim yvy gui kanoã guaxu py avakue
ou vy
Assur ha'e Héber rupi voi nhombojexavai 'rã.
Ha'e rami teĩ ha'e kuery ae jevy 'rã omanomba
— he'i.

²⁵ Ha'e rire Balaão opu'ã vy ojepe'a ovv, oyvv
katy ju ojevy. Balaque voi oo ju ouague rupi.

25

Peor pygua kuery ruete ramigua Baal ombojerovia okuapy py Finéias omombaague

¹ Israel kuery Sitim py ikuai jave ha'e kuery omboypy Moabe pygua kunhague reve itavy rei okuapy aguã.

² Ha'e va'e kunhague oenoĩmba nguuete ra'angaa kuery pe rive mba'emo ome'ëa py. Ha'e ramo Israel kuery amboae kuery reve okaru okuapy aguã oo vy kunhague ruete ra'angaa kuery renonde py rive 'rã guenapy'ã re ikuai.

³ Peor pygua kuery ruete ramigua Baal re Israel kuery voi oje'oi ramo SENHOR poxya hendy ha'e kuery rovai.

⁴ Ha'e rami vy SENHOR aipoe'i Moisés pe:

— Ejopypa ke heta va'e kuery ruvixa ikuai va'e, ha'e vy SENHOR renonde ejyryvipypa imo'amy oka py, Israel kuerya gui xepoxya ojepé'a aguã — he'i.

⁵ Ha'e ramo Moisés aipoe'i Israel kuery mongetaa kuery pe:

— Peteï-teï pejuka 'rã pendereguá avakue Peor pygua ruete Baal re oje'oi va'ekue — he'i.

⁶ Ha'e rami teï peteï ava Israel kuery va'e regua oo vy heta va'e kuery ikuiaia py ogueru peteï kunha Midiã pygua. Moisés oexaa py eteve ogueru, ha'e Israel kuery ha'e javi oexa pavëa py, ha'e kuery oguy nhemboaty oïñaty renonde py ojae'opa teri okuapy jave.

⁷ Kunha va'e ogueru rã sacerdote Finéias oexa. Ha'e va'e ma Eleazar ra'y, Arão ramymino ae. Ha'e rami vy heta va'e kuery mbyte gui ha'e opu'ã vy peteï hu'y ojopy reve

⁸ oo oiny ava Israel regua rakykue, ngopy oike ovyaque peve. Ha'e py ae onhyvõ mokoïve hyepy rupi, ava Israel regua ha'e kunha va'e voi. Ha'e ramo opytu'u mba'emo vai Israel kuery mbyte rupi oiko va'ekue.

⁹ Mba'emo vai gui omano va'ekue ma vinte e quatro mil ha'e javi vy.

¹⁰ Ha'e gui SENHOR aipoe'i Moisés pe:

¹¹ — Eleazar ra'y Finéias, sacerdote Arão ramymino va'e rima ojapo Israel kuery áry gui xepoxya opytu'u aguã rami. Mba'eta xere vy ae oendu nda'evei etea ha'e kuery mbyte rupi. Ha'e rami vy ojapo Israel kuery amomba e'ŷ aguã rami, nda'evei etea aendu tei.

¹² Ha'e nunga rupi aipo're 'rā: “Aŷ ma ndereve ajapo 'rā xereve peteĩ rami romoingo aguã” 're,

¹³ mba'eta hexeve, ha'e gui ha'e ndoikovei rire hamymino kuery jevy ikuai va'e reve ajapo 'rā sacerdote ikuai aguã. Xee nguuete re ima'endu'a vy ae oendu openaxeia, ha'e rami vy ojao'i uka Israel kuery ojejavyague — he'i.

¹⁴ Midiã pygua kunha reve Israel regua ojuka pyre ma Salu ra'y Zimri. Tuu ma Simeão regua kuery ruvixa.

¹⁵ Ha'e rā Midiã pygua kunha ojuka pyre ma Zur rajy Cosbi. Tuu ma Midiã pygua huvixa oiko.

¹⁶ Ha'e gui SENHOR aipoe'ive ju Moisés pe:

¹⁷ — Pemoingo axy 'rā Midiã pygua kuery pejukapa peve,

¹⁸ mba'eta ha'e kuery voi penemoingo axy va'ekue Peor py nguuete ramigua pembojerovia aguã rami penembotavypaa py, ha'e gui gueindy Midiã

pygua huvixa rajy Cosbi káuxa voi. Ha'e va'e ma ojukaa Peor py mba'emo vai oiko jave.

26

Israel kuery oipapaa jevyague

¹ Mba'emo vai oaxapa ma rire SENHOR ijayvu Moisés pe, ha'e sacerdote Arão ra'y Eleazar pe. Ha'e vy aipoe'i:

² — Pemboparapa ke Israel kuery ha'e javi rery, vinte ma'etŷ va'e guive tujakue peve, peteĩ-teĩ tamoĩ kuery ro pygua ikuaria rami vy. Israel kuery va'e regua pemboparapa 'rã joe opu'ã kuaa va'e ha'e javi — he'i.

³ Ha'e ramo Moisés ha'e sacerdote Eleazar ijayvu Israel kuery yvatekueve pe. Moabe yvy ka'aguy e'ŷa py, Jordão yakã yvýry Jericó tetã rexei ikuaria py ijayvu vy aipoe'i:

⁴ — Peipapa 'rã avakue vinte ma'etŷ va'e guive tujakue peve, Moisés pe SENHOR ojapo ukaague rami vy, ha'e Israel kuery Egito gui oje'oi va'ekue ha'e javi pe — he'i.

⁵ Ha'e gui Rúben ma Israel ra'y jypykue va'e. Rúben ramymino kuery Enoque guigua ma enoquita, Palu ramymino kuery ma paluítia,

⁶ Hezrom ramymino kuery ma hezronita, Carmi ramymino kuery ma carmita.

⁷ Ha'e va'e kuery ma Rúben ramymino meme. Ha'e kuery va'e regua oipapaa rã quarenta e três mil e setecentos e trinta ha'e javi vy.

⁸ Palu ra'y ma Eliabe.

⁹ Eliabe ra'y kuery ma Nemuel, Datã ha'e Abirão. Ha'e gui Datã ha'e Abirão ma heta va'e kuery

oiporavo va'ekue ri opu'ã okuapy Moisés ha'e Arão rovai Coré pegua kuery reve, SENHOR rovai ae opu'ãa py.

10 Ha'e va'e jave py yvy ojepe'a ramo Coré pegua kuery ho'apa raka'e. Ha'e vy omanomba. Tata py ju duzentos e cinqüenta avakue omano raka'e. Ha'e nungakue ma nhanheangu aguã oiko raka'e.

11 Ha'e rami teĩ Coré ra'y kuery ma nomanombai.

12 Ha'e gui Simeão ramymino kuery peteĩ-teĩ regua ikuai va'e ma po rami hery: Nemuel ramymino kuery ma nemuelita, Jamim ramymino kuery ma jaminita, Jaquim ramymino kuery ma jaquinita,

13 Zerá ramymino kuery ma zeraíta, Saul ramymino kuery ma saulita.

14 Ha'e va'e kuery ma Simeão ramymino meme, vinte e dois mil e duzentos ha'e javi vy ikuai.

15 Ha'e gui Gade ramymino kuery ju. Zefom ramymino kuery ma zefonita, Hagi ramymino kuery ma hagita, Suni ramymino kuery ma sunita,

16 Ozni ramymino kuery ma oznita, Eri ramymino kuery ma erita,

17 Arodi ramymino kuery ma arodita, Areli ramymino kuery ma arelita.

18 Ha'e va'e kuery ma Gade ramymino kuery meme. Ha'e kuery va'e regua oipapaa rã quarenta mil e quinhentos ha'e javi vy.

19 Ha'e gui Judá ramymino kuery ma Er ha'e Onã. Ha'e va'e kuery ma Canaã yvy re omano va'ekue.

20 Ha'e rami vy Judá ramymino kuery peteĩ-teĩ regua ikuai va'e ma po rami hery: Selá ramymino

kuery ma selaíta, Perez ramymino kuery ma perezita, Zera ramymino kuery ma zeraíta,

²¹ Perez ra'y Hezrom ramymino kuery ma hezronita, ha'e rā Hamul ramymino kuery ma hamulita.

²² Ha'e va'e kuery ma Judá ramymino kuery meme. Ha'e kuery va'e regua oipapaa rā setenta e seis mil e quinhentos ha'e javi vy.

²³ Ha'e gui Issacar ra'y kuery ju peteĩ-teĩ regua ikuai va'e ma po rami hery: Tola ramymino kuery ma tolaíta, Puva ramymino kuery ma puvita,

²⁴ Jasube ramymino kuery ma jasubita, Sinrom ramymino kuery ma sinronita.

²⁵ Ha'e va'e kuery ma Issacar ramymino kuery meme. Ha'e va'e kuery oipapaa rā sessenta e quatro mil e trezentos ha'e javi vy.

²⁶ Ha'e gui Zebulom ra'y kuery ju peteĩ-teĩ regua ikuai va'e ma po rami hery: Serede ramymino kuery ma seredita, Elom ramymino kuery ma elonita, Jaleel ramymino kuery ma jaleelita.

²⁷ Ha'e va'e kuery ma Zebulom ramymino kuery meme. Ha'e kuery va'e regua oipapaa rā sessenta mil e quinhentos ha'e javi vy.

²⁸ Ha'e gui José ra'y kuery ju peteĩ-teĩ regua ma Manassés ha'e Efraim.

²⁹ Manassés ramymino kuery Maquir guigua ma maquirita, Maquir ra'y ma Gileade, ha'e Gileade ramymino kuery ma gileadita.

³⁰ Ha'e gui Gileade ramymino kuery Jezer ramymino kuery ma jezerita, Heleque ramymino kuery ma helequita,

³¹ Asriel ramymino kuery ma asrielita, Siquém ramymino kuery ma siquemita,

³² Semida ramymino kuery ma semidaíta, Hefer ramymino kuery ma heferita.

³³ Hefer ra'y Zelofeade ma ta'y e'ŷ va'e, tajy kuery anho ikuai. Zelofeade rajy kuery ma Macla, Noa, Hogla, Milca e Tirza.

³⁴ Ha'e va'e kuery ma Manassés ramymino kuery. Ha'e kuery va'e regua oipapaa rã cinqüenta e dois mil e setecentos ha'e javi vy.

³⁵ Ha'e gui Efraim ra'y kuery peteĩ-teĩ ikuai va'e ma po rami hery: Sutela ramymino kuery ma sutelaíta, Bequer ramymino kuery ma bequerita, Taã ramymino kuery ma taanita.

³⁶ Ha'e gui Sutela ra'y Erã va'e ramymino kuery ma eranita ae.

³⁷ Ha'e va'e kuery ma Efraim ramymino kuery meme. Ha'e kuery va'e regua oipapaa rã trinta e dois mil e quinhentos ha'e javi vy. Ha'e va'e kuery ma José ramymino kuery meme, peteĩ-teĩ regua ikuaria rami.

³⁸ Ha'e gui Benjamim ramymino kuery peteĩ-teĩ regua ikuai va'e ma po rami hery: Bela ramymino kuery ma belaíta, Asbel ramymino kuery ma asbelita, Airão ramymino kuery ma airamita,

³⁹ Sufã ramymino kuery ma sufamita, Hufã ramymino kuery ma hufamita.

⁴⁰ Bela ra'y kuery ma Arde ha'e Naamã. Arde ramymino kuery ma ardita, Naamã ramymino kuery ma naamanita.

⁴¹ Ha'e va'e kuery ma Benjamim ramymino kuery meme. Ha'e kuery va'e regua oipapaa rã quarenta e cinco mil e seiscentos ha'e javi vy.

⁴² Ha'e gui Dã ramymino kuery peteĩ-teĩ regua ikuai va'e ma po rami hery: Suão ramymino kuery

ma suamita. Ha'e va'e kuery ma Dã ramymino kuery kuery, peteĩ-teĩ regua ikuaria rami.

⁴³ Ha'e gui suamita kuery va'e regua ma oipapaa rã sessenta e quatro mil e quatrocentos ha'e javi vy.

⁴⁴ Ha'e gui Aser ra'y kuery ju peteĩ-teĩ regua ikuai va'e ma po rami hery. Imna ramymino kuery ma imnaíta, Isvi ramymino kuery ma isvita, Berias ramymino kuery ma beriaíta.

⁴⁵ Berias ra'y Héber ramymino kuery ma heberita, ha'e rã Malquiel ramymino kuery ma malquielita.

⁴⁶ Ha'e gui Aser rajy rery ma Sera.

⁴⁷ Ha'e va'e kuery ma Aser ramymino kuery meme. Ha'e kuery va'e regua oipapaa rã cinqüenta e três mil e quatrocentos ha'e javi vy.

⁴⁸ Ha'e gui Naftali ra'y kuery peteĩ-teĩ regua ikuai va'e ma po rami: Jazeel ramymino kuery ma jazeelita, Guni ramymino kuery ma gunita,

⁴⁹ Jezer ramymino kuery ma jezerita, Silém ramymino kuery ma silemita.

⁵⁰ Ha'e va'e kuery ma Naftali ramymino kuery meme. Ha'e kuery va'e regua oipapaa rã quarenta e cinco mil e quatrocentos ha'e javi vy.

⁵¹ Ha'e va'e kuery ma Israel kuery va'e regua oipapaa rã seiscentos e um mil setecentos e trinta ha'e javi vy.

Ha'e kuery yvyrã omboja'o-ja'o aguã re ijayvua

⁵² SENHOR aipoe'i Moisés pe:

⁵³ — Ha'e kuery pe ma remboja'o 'rã yvy imba'erã, peipapa rã peteĩ-teĩ regua mbovy pa ikuaria rami vy.

⁵⁴ Ha'e gui hetave va'e regua pe ma yvy tuvixave 'rã pemboaxa. Ha'e rã mboapy'ive va'e regua pe ma ruxâve'i 'rã remboaxa. Peteĩ-teĩ regua mbovy pa ikuiaia rami vy 'rã remboaxa ijyvyrã.

⁵⁵ Yvy pemboja'o 'rã xorte pexa vy. Tamoĩ kuery regua rery pexaa rami vy ha'e kuery ojopy 'rã oyvyrã.

⁵⁶ Xorte pexa vy 'rãe pemboja'opa peteĩ-teĩ regua pe, hetave va'e pe, ha'e mboapy'ive va'e pe voi.

Levita kuery ju oipapaa ague

⁵⁷ Pova'e kuery ma levita kuery va'e regua oipapa pyre, peteĩ-teĩ regua ikuiaia rami: Gérson ramymino kuery ma gersonita, Coate ramymino kuery ma coatita, Merari ramymino kuery ma merarita.

⁵⁸ Pova'e kuery voi ma Levi ramymino kuery ikuai: libnita, hebronita, malita, musita ha'e coreíta kuery regua. Coate ra'y ma Anrão.

⁵⁹ Anrão ra'yxy ma Levi ramymino Joquebede, Egito yvy re ae oiko va'ekue. Ha'e va'e ma oguerekoi Anrão ra'y kuery Arão ha'e Moisés, ha'e gui ha'e kuery reindy Miriã.

⁶⁰ Arão ra'y kuery ma Nadabe, Abiú, Eleazar ha'e Itamar.

⁶¹ Nadabe ha'e Abiú ma omano va'ekue, tata ha'eve'ŷa ramigua SENHOR renonde py ogueru-ague re.

⁶² Ha'e va'e kuery regua oipapaa rã vinte e três mil, avakue peteĩ jaxy va'e guive tujakue peve. Ha'e va'e kuery ma Israel kuery mboae reve ndoipa-paai, mba'eta ha'e kuery pe ma nome'ëai ijyvyrã amboae kuery reve.

⁶³ Ha'e va'e kuery ha'e javi ma Moisés ha'e sacerdote Eleazar oipapa va'ekue. Moabe yvy ka'aguy e'ÿa py oipapa Israel kuery, Jordão yakã yvýry, Jericó tetã rexei ikuai jave.

⁶⁴ Ha'e va'e kuery regua peteïve ma voi jipovei Moisés ha'e sacerdote Arão oipapa ypy va'ekue, Sinai regua tekao e'ÿa py Israel kuery ikuai jave,

⁶⁵ SENHOR “Ha'e kuery omanomba 'rã tekao e'ÿa py” he'i rire. Ha'e rami rire peteïve ma voi ndoikovei, Jefoné ra'y Calebe e'ÿ vy, ha'e gui Num ra'y Josué guive.

27

Zelofeade rajy kuery oyvvyrã ojopy aguã re ijayvua

¹ Ha'e gui ou okuapy Zelofeade rajy kuery. Zelofeade ma Hefer ra'y, Hefer ma Gileade ra'y, Gileade ma Maquir ra'y, Maquir ma Manassés ra'y, Manassés ma José ra'y. Po rami ma tajy kuery rery: Macla, Noa, Hogla, Milca ha'e Tirza.

² Ha'e gui ha'e va'e kuery ma Moisés renonde py ojexa uka okuapy, sacerdote Eleazar, huvixa kuery ha'e heta va'e kuery renonde py, oguy nhemboaty oÿaty rokẽ py onhemboatya py. Ha'e vy aipoe'i okuapy:

³ — Ore kuery ru ma omano karamboae tekao e'ÿa py tei SENHOR rovai Coré pegua kuery opu'ã okuapy va'e revegua e'ÿ. Ha'e ae ojejavyague re omano raka'e. Ta'y e'ÿ re guive omano.

⁴ Mba'e re tu ha'vy oreru rery pembogue ta ri hetarã kuery mbyte gui, ta'y kuery nda'ipoia káuxa

rive? Eme'ẽ avi na orevvyrã, oreru ryvy kuery oguerekoa rami avi — he'i okuapy.

⁵ Ha'e va'e kunhague ojerurea Moisés omboaxa SENHOR renonde py.

⁶ Ha'e ramo SENHOR aipoe'i Moisés pe:

⁷ — Zelofeade rajy kuery ma ha'evea rupi meme ojerure. Ha'e nunga rupi ha'e kuery pe voi peme'ẽ 'rã ijyvyrã, tuu ryvy kuery pe rami avi. Tajy kuery pe 'rã peme'ẽ tuu yvykue.

⁸ Ndeayvu 'rã Israel kuery pe. Ha'e vy aipo're: "Amongue ta'y e'ŷ re omano ri ramo imba'ekue peme'ẽ 'rã tajy pe ae.

⁹ Ha'e rã tajy ndoikoi ramo imba'ekue peme'ẽ 'rã tyvykue pe.

¹⁰ Ha'e rã tyvy kuery ndoikoi ri ramo imba'ekue peme'ẽ 'rã tuu ryvy kuery pe.

¹¹ Ha'e rã guyvy kuery ndoguerekoi ri ramo imba'ekue peme'ẽ 'rã penetarã kuery ae'ive pe imba'erã", 're 'rã — he'i.

Ha'e va'e ma Israel kuery rekorã SENHOR oeja va'ekue, Moisés pe ojapo ukaague rami vy.

Deuteronômio 3.23-29

¹² Ha'e va'e rire SENHOR aipoe'i Moisés pe:

— Eẽ ke kova'e yvyty Abarim apyte peve, yvy Israel kuery pe ame'ẽ va'e rex a aguã.

¹³ Ha'e va'e rex a ma rire nenhe'ẽ ju 'rã heraa neramoĩ kuerya py, nderyke'y Arão nhe'ẽ heraa ague rami avi.

¹⁴ Mba'eta Zim regua tekoa e'ŷa py heta va'e kuery opu'ãmba rei jave peẽ voi naxenhe'ẽ rendui va'ekue, ha'e vy ha'e kuery oexaa py ndapexa ukai xeky'a e'ŷ va'ea, yy peme'ẽa py — he'i. Ha'e va'e yy

ma Meribá pygua, Cades katy'i, Zim regua tekoa e'ýa py.

15 Ha'e ramo Moisés aipoe'i SENHOR pe:

16 — Ndee SENHOR pavẽ rekoverã me'ëa, ha'e pavẽ rekove re repena va'e, emoï peteï ava kova'e kuery re opena va'erã,

17 ha'e kuery renonde rupi ojepe'a ha'e ojevy va'erã, ha'e ha'e kuery oje'oi ha'e ojevyra rupi oguereko va'erã, SENHOR pegua kuery vexa'i ija e'ý va'e rami rive ikuai e'ý aguã — he'i.

Moisés rekovia Josué ju omoñaque

18 SENHOR aipoe'i Moisés pe:

— Eraa ha'vy Num ra'y Josué, ha'e emoï ndepo hexe, mba'eta ha'e va'e re ma Nhe'ë oï.

19 Rexa uka 'rã sacerdote Eleazar ha'e heta va'e kuery ha'e javi renonde py. Ha'e kuery oexaa py eme'ë ojapo va'erã.

20 Ixupe ju 'rã remboaxa ndepo'akaa regua, Israel kuery ha'e javi onhe'ë rendu aguã.

21 Ha'e jevy 'rã ojexa uka sacerdote Eleazar pe, SENHOR renonde py oikuaa pota aguã Urim oexaa rupi. Mba'eta sacerdote ijayvua rami meme 'rã ha'e kuery oje'oi ha'e ojevy okuapy, Josué ha'e Israel kuery ha'e javi — he'i.

22 Ha'e ramo Moisés ojapo SENHOR ojapo ukaa rami. Ha'e vy Josué ogueraa vy oexa uka sacerdote Eleazar pe heta va'e kuery pavẽ oexaa py.

23 Hexe opo omoï vy ome'ë ojapo va'erã, Moisés pe SENHOR ijayvuague rami vy.

28

Êxodo 29.38-42

1 Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Pepena 'rã mba'emo xevy peme'ẽ aguã, peme'ẽ aguã ára py porã, mba'emo aju guigua mba'e, mba'emo peapy va'erã, heakuã porã va'e guive.

³ Pova'e ae 'rã ko'ẽ nhavõ SENHOR pe peapy vy peme'ẽ va'erã: mokoĩ vexa'i ra'y peteĩ ma'etý va'e, ivaikue rei e'ŷ va'e. Ha'e va'e ma peapy vy peme'ẽ jepi 'rã.

⁴ Peteĩ vexa'i ra'y ma peme'ẽ 'rã aje'ive'i reve, ha'e rã amboae ma ka'a'ru'i jave guarã.

⁵ Peteĩ ryru trigo iporãve va'e avi 'rã peru mba'emo aju guigua ome'ẽ mbyrã, peteĩ ryru azeite onhami mbyre reve pemoirũ vy pemoapomo va'ekue reve.

⁶ Ha'e va'e ma peapy vy peme'ẽ jepi 'rã Sinai yvyty py oejaague rami vy, heakuã porã rã SENHOR ojou porã aguã.

⁷ Peteĩ-teĩ vexa'i ra'y reve penhoẽ avi 'rã peteĩ ryru iro va'e. Henda iky'a e'ŷ va'e py 'rã peme'ẽ SENHOR pe.

⁸ Ha'e rã amboae vexa'i ra'y ma ka'aru'i jave 'rã peme'ẽ. Aje'ive'i reve guarã peme'ẽa rami ae avi 'rã peme'ẽ ju mba'emo aju guigua, iro va'e penhoẽ reve. Peapy vy 'rã peme'ẽ, heakuã porã rã SENHOR ojou porã aguã.

⁹ — Ha'e rã sábado ára py ma peme'ẽ 'rã mokoĩ vexa'i ra'y peteĩ ma'etý va'e, ivaikue rei e'ŷ va'e, ha'e gui mokoĩ ryru trigo iporãve va'e azeite reve omoapomo mbyre. Mba'emo aju guigua peme'ẽ 'rã iro va'e penhoẽ reve.

¹⁰ Ha'e va'e ma sábado nhavõ peapy vy peme'ẽ va'erã, ko'ẽ nhavõ mba'emo peme'ẽ ha'e penhoẽ va'e áryve.

11 — Ha'e gui jaxy nhavõ ijypy'ia ára py ma SENHOR pe peapy vy peme'ẽ 'rã mokoõ toro ra'y, peteĩ vexa'i ha'e sete vexa'i ra'y peteĩ ma'etý va'e, ivaikue rei e'ŷ va'e.

12 Toro ra'y reve peme'ẽ avi 'rã mba'emo aju guigua mboapy ryru trigo iporâve va'e azeite reve omoapomo mbyre. Ha'e rã vexa'i reve ma mba'emo aju guigua peme'ẽ 'rã mokoõ ryru trigo iporâve va'e azeite reve omoapomo mbyre.

13 Vexa'i ra'y reve ma mba'emo aju guigua peme'ẽ 'rã peteĩ ryru trigo iporâve va'e azeite reve omoapomo mbyre. Ha'e va'e ma peapy vy peme'ẽ 'rã, heakuã porã rã SENHOR ojou porã aguã.

14 Toro ra'y reve penhoẽ 'rã mokoõ ryru vinho, ha'e rã vexa'i reve ma peteĩ ryru raxa'i 'rã penhoẽ, ha'e gui vexa'i ra'y reve ma peteĩ ryru ete'i 'rã penhoẽ. Ha'e va'e ma jaxy pyaua ára ojeupity nhavõ peme'ẽ 'rã peapy vy, ma'etý mbukukue re.

15 Ko'ẽ nhavõ peru avi 'rã peteĩ kavara ava jejavya regua SENHOR pe peapy vy peme'ẽ va'erã, mba'emo penhoẽ va'e reve.

16 — Ha'e gui jaxy jypy'igua re catorze araa py ma oiko 'rã SENHOR pegua ngaru Páscoa regua.

17 Ha'e va'e jaxy re quinze araa py ma pejapo 'rã ngaru. Sete ára re 'rã mbojape pe'u pekuapy imbovua rewegua e'ŷ.

18 Ijypya ára oiko 'rã nhemboaty iky'a e'ŷ va'e. Neĩ peteĩve ma napemba'eapoi 'rã.

19 SENHOR pe peapy vy peme'ẽ 'rã mokoõ toro ra'y, peteĩ vexa'i ha'e sete vexa'i ra'y peteĩ ma'etý va'e, ivaikue rei e'ŷ va'e meme.

20 Mba'emo aju guigua peme'ẽ 'rã azeite reve

omoapomo mbyre. Toro ra'y reve peme'ẽ 'rã mboapy ryru trigo iporãve va'e gui pejapo va'ekue, ha'e rã vexa'i ava reve ma mokoĩ ryru gui,

²¹ ha'e gui sete vexa'i ra'y ikuai va'e regua peteĩ-teĩ reve 'rã peme'ẽ peteĩ ryru gui pejapo va'ekue.

²² Peme'ẽ avi 'rã peteĩ kavara ava jejavya regua, pejejavyague pejao'i uka aguã.

²³ Ha'e nunga ha'e javi 'rã peme'ẽ, aje'ive'i reve mba'emo peapy vy peme'ẽ va'ety reve.

²⁴ Ha'e rami vy sete ára re, ko'ẽ nhavõ peme'ẽ 'rã mba'emo aju guigua peapy vy, heakuã porã rã SENHOR ojou porã aguã. Ko'ẽ nhavõ mba'emo peapy vy peme'ẽ va'e reve ha'e va'e peme'ẽ avi 'rã, mba'emo penhoẽ reve.

²⁵ Ha'e gui sete araa py ju 'rã pejapo nhemboaty iky'a e'ŷ va'e. Neĩ peteĩve ma napemba'eapoi 'rã.

²⁶ — Ha'e gui mba'emo aju jypy'igua ára py ju 'rã pejapo nhemboaty iky'a e'ŷa va'e, mba'emo aju pyau guigua SENHOR pe peru aguã, ngaru semana regua ojeupity jave. Neĩ peteĩve ma napemba'eapoi 'rã.

²⁷ Ha'e va'e jave py pova'e 'rã peapy vy peme'ẽ heakuã porã rã SENHOR ojou porã aguã: mokoĩ toro ra'y, peteĩ vexa'i ava ha'e sete vexa'i ra'y peteĩ ma'etŷ va'e meme.

²⁸ Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã pejapo 'rã mboapy ryru trigo iporãve va'e gui, ha'e rã vexa'i ava reve guarã ma mokoĩ ryru gui.

²⁹ Sete vexa'i ra'y va'e regua peteĩ-teĩ reve guarã ma pejapo avi 'rã peteĩ ryru gui.

³⁰ Peteĩ kavara ava peme'ẽ avi 'rã pejejavyague

pejao'i uka aguã.

³¹ Ha'e nunga ha'e javi 'rã peme'ẽ, ko'ẽ nhavõ mba'emo peapy vy peme'ẽ va'e reve, mba'emo aju guigua ha'e mba'emo penhoẽ va'e reve. Ivaikue rei e'ŷ va'e meme 'rã peru.

29

*SENHOR pegua ngaru mboae oiko jave py
mba'emo ome'ẽ va'erã re ijayvuague*

¹ — Ha'e gui sete jaxya re, jypy'igua ára py ma pejapo 'rã nhemboaty iky'a e'ŷ va'e. Neĩ peteĩve ma napemba'eapoi 'rã. Pêvy oiko 'rã mimby guaxu pemonhe'ẽ aguã ára.

² Ha'e va'e jave py pova'e nunga peme'ẽ 'rã peapy vy, heakuã porã rã SENHOR ojou porã aguã: peteĩ toro ra'y, peteĩ vexa ava ha'e sete vexa'i ra'y peteĩ ma'etŷ va'e, ivaikue rei e'ŷ va'e meme.

³ Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã ma mboapy ryru trigo iporâve va'e gui 'rã pejapo, ha'e rã vexa ava reve guarã ma mokoĩ ryru gui 'rã.

⁴ Ha'e gui sete vexa'i ra'y peteĩ-teĩ reve guarã ma peteĩ ryru gui 'rã pejapo.

⁵ Peteĩ kavara peme'ẽ avi 'rã jejavya regua, peje-javyague pejao'i uka aguã.

⁶ Ha'e va'e jaxy re mba'emo peapy vy peme'ẽ va'e reve 'rã peme'ẽ, mba'emo aju guigua reve, ko'ẽ nhavõ mba'emo peapy vy mba'emo aju guigua ha'e penhoẽ va'e regua reve. Ombopara pyre oĩa rami vy peme'ẽ 'rã heakuã porã rã SENHOR ojou porã aguã.

⁷ — Ha'e gui sete jaxya re dez araa py ma pejapo ju 'rã nhemboaty iky'a e'ŷ va'e. Penenhe'ẽ py pejexavaia rupi 'rã pendekuai. Neĩ peteĩve ma napemba'eapoi 'rã.

⁸ Pova'e ma peapy vy peme'ẽ 'rã heakuã porã rã SENHOR ojou porã aguã: peteĩ toro ra'y, peteĩ vexa ava, ha'e gui sete vexa'i ra'y peteĩ ma'etŷ va'e, ivaikue rei e'ŷ va'e meme.

⁹ Mba'emo aju guigua peme'ẽ 'rã azeite reve omoapomo mbyre: toro ra'y reve guarã ma mboapy ryru trigo iporãve va'e gui pejapo 'rã, ha'e gui vexa'i ava reve guarã ma mokoĩ ryru gui 'rã.

¹⁰ Ha'e rã sete vexa'i ra'y ikuai va'e regua peteĩ-teĩ reve guarã ma peteĩ'i ryru gui 'rã pejapo.

¹¹ Peme'ẽ avi 'rã peteĩ kavara ava jejavya regua. Ha'e va'e peme'ẽ avi 'rã jejavya regua ko'ẽ nhavõ peme'ẽ va'e reve, ha'e mba'emo peapy va'e, mba'emo aju guigua ha'e mba'emo penhoẽ jepi va'e reve.

¹² — Sete jaxya re quinze araa py ma teĩgue ju 'rã oiko nhemboaty iky'a e'ŷ va'e. Neĩ peteĩve ma napemba'eapoi 'rã. Sete ára re 'rã pejapo ngaru SENHOR pe.

¹³ Pova'e ma peapy vy peme'ẽ 'rã heakuã porã rã SENHOR ojou porã aguã: mboapy toro ra'y, mokoĩ vexa ava, ha'e gui catorze vexa'i ra'y peteĩ ma'etŷ va'e, ivaikue rei e'ŷ va'e meme.

¹⁴ Mba'emo aju guigua peme'ẽ 'rã azeite reve omoapomo mbyre: mboapy toro ra'y peteĩ-teĩ reve guarã ma mboapy ryru trigo iporãve va'e gui pejapo 'rã, ha'e gui mokoĩ vexa'i ra'y peteĩ-teĩ reve guarã ma mokoĩ ryru gui 'rã pejapo.

15 Ha'e rā catorze vexa'i ra'y peteī-teī reve guarā ma peteī'i ryru gui 'rā pejapo.

16 Peteī kavara peme'ē avi 'rā jejavya regua, ko'ē nhavō mba'emo peapy va'e reve, mba'emo aju guigua ha'e mba'emo penhoē va'e reve.

17 — Ha'e gui mokoī araa py ma peme'ē 'rā doze toro ra'y, mokoī vexa'i ava ha'e catorze vexa'i ra'y peteī ma'etŷ va'e, ivaikue rei e'ŷ va'e meme.

18 Toro ra'y, vexa'i ava ha'e vexa'i ra'y kuery reve guarā ma peme'ē avi 'rā mba'emo aju guigua ha'e mba'emo penhoē va'e. Peteī-teī mymba regua mbovy pa ikuiaia rami vy peme'ē 'rā hexeve guarā, ayvu oeja pyre rami vy.

19 Peteī kavara peme'ē avi 'rā jejavya regua, ko'ē nhavō mba'emo peapy va'e reve, mba'emo aju guigua ha'e mba'emo penhoē va'e reve.

20 — Ha'e gui mboapy araa py ma peme'ē 'rā onze toro ra'y, mokoī vexa'i ava ha'e catorze vexa'i ra'y peteī ma'etŷ va'e, ivaikue rei e'ŷ va'e meme.

21 Toro ra'y, vexa'i ava ha'e vexa'i ra'y kuery reve guarā ma peme'ē avi 'rā mba'emo aju guigua ha'e mba'emo penhoē va'e. Peteī-teī mymba regua mbovy pa ikuiaia rami vy peme'ē 'rā hexeve guarā, ayvu oeja pyre rami vy.

22 Peteī kavara peme'ē avi 'rā jejavya regua, ko'ē nhavō mba'emo peapy va'e reve, mba'emo aju guigua ha'e mba'emo penhoē va'e reve.

23 — Ha'e gui irundy araa py ma peme'ē 'rā dez toro ra'y, mokoī vexa'i ava ha'e catorze vexa'i ra'y peteī ma'etŷ va'e, ivaikue rei e'ŷ va'e meme.

24 Toro ra'y, vexa'i ava ha'e vexa'i ra'y kuery reve guarā ma peme'ē avi 'rā mba'emo aju guigua ha'e

mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

25 Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

26 — Ha'e gui peteĩ nhiruĩ araa py ma peme'ẽ 'rã nove toro ra'y, mokoĩ vexa'i ava ha'e catorze vexa'i ra'y peteĩ ma'etỹ va'e, ivaikue rei e'ŷ va'e meme.

27 Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

28 Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

29 — Ha'e gui mboapy meme araa py ma peme'ẽ 'rã oito toro ra'y, mokoĩ vexa'i ava ha'e catorze vexa'i ra'y peteĩ ma'etỹ va'e, ivaikue rei e'ŷ va'e meme.

30 Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

31 Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

32 — Ha'e gui sete araa py ma peme'ẽ 'rã sete toro ra'y, mokoĩ vexa'i ava ha'e catorze vexa'i ra'y peteĩ ma'etỹ va'e, ivaikue rei e'ŷ va'e meme.

33 Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

34 Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

35 — Ha'e gui oito araa py ma pejapo 'rã nhem-boaty iky'a e'ŷ va'e. Neĩ peteĩve ma napemba'eapoi 'rã.

36 Ha'e rami vy peapy vy peme'ẽ 'rã peteĩ toro ra'y, peteĩ vexa ava ha'e sete vexa'i ra'y peteĩ ma'etŷ va'e, ivaikue rei e'ŷ va'e meme, heakuã porã rã SENHOR ojou porã aguã.

37 Toro ra'y reve guarã, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

38 Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

39 — Ha'e va'e ha'e javi ma SENHOR pe peme'ẽ 'rã peteĩ-teĩ ngaru ojeupity nhavõ oapy vy ome'ẽ mbyrã, mba'emo aju guiguarã, mba'emo on-hoẽ mbyrã, ha'e peteĩ rami ikuai aguã reguarã. Ha'e va'e peme'ẽ avi 'rã SENHOR renonde penhemboayvua rami, e'ŷ vy penhenhandua'i rami mba'emo peme'ẽ va'e reve — he'i.

40 Ha'e rami Moisés ijayvu Israel kuery pe, ixupe SENHOR ojapo ukaague ha'e javi rami vy.

30*Deuteronômio 23.21-23*

¹ Ha'e gui Moisés ijayvu Israel kuery peteĩ-teĩ regua yvatekueve ikuai va'e pe. Ha'e vy aipoe'i:

— Pova'e ayvu ma SENHOR ojapo uka va'ekue:

² Xapy'a rei peteĩ ava onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re. Ha'e rami ri vy ndojapo e'ŷi 'rã ijayvuague. Onhemboayvuague ha'e javi 'rã ojapo.

³ Ha'e rami avi xapy'a rei peteĩ kunha onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re, kunhataĩ vy nguu ro py teri oiko va'e.

⁴ Ha'e gui xapy'a rei tuu ma guajy onhemboayvuague oikuaa va'eri mba'eve nde'i 'rã ixupe. Ha'e ramo ma onhemboayvuague ha'e javi 'rã ovare. Tajy ojapopa 'rãe mba'emo ojapo e'ŷ re oiko aguã re onhemboayvuague.

⁵ Ha'e rã xapy'a rei tuu ha'e va'e nunga oikuaa vyve ojoko ramo ma tajy onhemboayvuague neĩ peteĩ henda py voi ndovarei 'rã, mba'emo ojapo e'ŷ re oiko aguã re ijayvuague rupi oiko e'ŷ teĩ ha'eve 'rã. SENHOR operdoa 'rã, onhemboayvuague tuu ojoko rire.

⁶ — Ha'e rami avi xapy'a rei kunha va'e onhemboayvuague, ha'e'ŷ vy opõxa porã e'ŷ re mba'emo ojapo aguã re ijayvuague ovare teri reve omenda 'rã,

⁷ ha'e xapy'a rei ime ha'e nunga oendu teĩ mba'eve nde'i ramo kunha va'e onhemboayvuague ovare tema 'rã. Ojapo 'rãe mba'emo ojapo e'ŷ re oiko aguã re ijayvuague.

⁸ Ha'e rami teĩ xapy'a rei ime oendu vyve ojoko 'rã kunha va'e onhemboayvuague, e'ŷ vy opẽxa porã e'ŷ re ijayvuague ojapo aguã gui. Ijayvuague ime omboavaipa rire SENHOR operdoa 'rã.

⁹ Ha'e gui imeve'ŷ va'e, e'ŷ vy kunha oeja pyre onhemboayvuague ma ovare va'erã meme.

¹⁰ — Xapy'a rei kunha va'e ome ro py oiko reve onhemboayvu 'rã, ha'e'ŷ vy oura reve ijayvu 'rã mba'emo ojapo e'ŷ re oiko aguã re.

¹¹ Ha'e nunga ime oikuua vy “Ha'eve” nde'i, neĩ “Nda'evei” nde'i ri ramo kunha va'e onhemboayvuague ovare 'rã. Ojapopa 'rãe mba'emo ojapo aguã re ijayvuague.

¹² Ha'e rã xapy'a rei ime ha'e nunga oikuua vyve omboavaipa 'rã. Ha'e rami rã kunha va'e mba'emo ojapo aguã re, ha'e'ŷ vy mba'emo ojapo e'ŷ re oiko aguã onhemboayvu rire teĩ ndovarei 'rã. Ime omboavaipa rire SENHOR operdoa 'rã.

¹³ Kunha va'e onhe'ẽ py ojexavaia rupi oiko aguã re ijayvu, e'ŷ vy oura ramo ime oendu vy xapy'a rei “Ha'eve” he'i 'rã, e'ŷ vy “Nda'evei” he'i 'rã omboavaipa vy.

¹⁴ Ha'e rami avi xapy'a rei ime ma ko'ẽ nhavõ mba'eve nde'i ramo kunha va'e mba'emo ojapo aguã re onhemboayvuague ovarepa 'rã, ime oikuua vyve mba'eve nde'i rire.

¹⁵ Ha'e gui xapy'a rei ime ha'e nunga oendua ára rire ri omboavaipa ramo hexe ae 'rã oĩ kunha va'e káuxa opaga aguã — he'i.

¹⁶ Ha'e va'e ma Moisés pe SENHOR omboaxa va'ekue ojapoa aguã, ime ha'e gua'yxy reve joguereko kuaa aguã regua, ha'e gui tuu ha'e tajy kunhataĩ vy nguu ro py teri oiko va'e pegua.

31

Midiā pygua kuery re ipo'akaague

¹ SENHOR aipoe'i Moisés pe:

² — Embopaga Midiā pygua kuery Israel kuery re ojapoaque re. Ha'e rire ma nenhe'ẽ heraa 'rã neramoĩ kuerya py — he'i.*

³ Ha'e ramo Moisés ijayvu heta va'e kuery pe. Ha'e vy aipoe'i:

— Peẽ kuery va'e regua perekó katu ke tembiporu joe pepu'ã aguã. Ha'e gui tapeo Midiā pygua kuery rovai pepu'ã aguã, SENHOR ombopaga ukaa rami pejapo aguã.

⁴ Israel kuery peteĩ-teĩ regua joe opu'ã aguã py pemondouka 'rã mil avakue — he'i.

⁵ Ha'e ramo Israel kuery mbovy e'ŷ ikuai va'e peteĩ-teĩ regua gui omondouka mil. Joe opu'ã aguã katy doze mil ha'e javi vy omondouka tembiporu revegua meme.

⁶ Moisés ae omondouka joe opu'ã aguã katy, peteĩ-teĩ regua mil oje'oi aguã. Oo avi sacerdote Eleazar ra'y Finéias. Ha'e va'e ma ogueraa mimby guaxu iky'a e'ŷ va'e omonhe'ẽ aguã.

⁷ Ha'e gui Midiā pygua kuery reve opu'ã okuapy, Moisés pe SENHOR ojapo ukaague rami vy.

⁸ Ha'e vy ojukapa okuapy avakue ikuai va'ekue ha'e javi. Jypyve omano va'ekue regua anho e'ŷ, ojuka avi Midiā pygua huvixa kuery: Evi, Requém, Zur, Hur ha'e Reba, peteĩ nhiruĩ Midiā pygua kuery ruvixa ikuai va'ekue. Kyxe py ojuka avi okuapy Beor ra'y Balaão.

* **31:2** Midiā pygua kuery ojapo va'ekue ma ombotavypa rei Israel kuery, tuuete ramigua rive ombojerovia aguã rami (25.16-18).

⁹ Ha'e rã Midiã pygua kunhague ha'e kyrígue ma Israel kuery ogueraapa okuapy guembiguairã. Ogueraapa avi vaka kuery ha'e hymba kuery ikuai va'ekue, ha'e oguereko va'ekue-'ekue ha'e javi.

¹⁰ Oapypa avi tetã ha'e kuery ikuaiague, ha'e gui hekoa mboae ikuai va'ekue voi.

¹¹ Ha'e rami py ogueraapa ojopy va'ekue-'ekue, ombara'erã ojou va'ekue ha'e javi, ha'e kuery va'e regua ha'e hymba kuery guive.

¹² Ha'e nunga oguerupa okuapy Moisés pe, sacerdote Eleazar ha'e Israel kuery ha'e javi ikuai va'e pe. Guembiguairã ogueraa va'ekue, mba'emo ojou va'ekue ha'e imba'e rei-rei va'ekue ha'e javi ogueraa guekoa py, Moabe yvy ka'aguy e'ýa py, Jordão yakã yvýry, Jericó tetã rexei.

Guembiguairã oguerupa pyre re ijayvuague

¹³ Ha'e gui Moisés, sacerdote Eleazar ha'e heta va'e kuery regua yvatekueve ha'e javi ma tekao gui oëmba okuapy mombyry'i omovaẽ jevy aguã.

¹⁴ Ha'e rami teñ Moisés ivai xondaro ruvixa kuery pe, mil ha'e cem xondaro capitão kuery joe opu'ãague gui ou va'ekue pe.

¹⁵ Ha'e vy Moisés aipoe'i ha'e kuery pe:

— Peja ri ty'y kunhague ha'e javi okuave aguã?

¹⁶ Mba'eta ha'e kuery ae Balaão omongoetaa rami vy ojapo va'ekue Israel kuery SENHOR rovai rupi ikuai aguã rami, Peor py ae. Ha'e nunga rupi mba'emo vai oiko raka'e SENHOR pegua kuery mbyte rupi.

17 Ha'e nunga rupi aŷ kyrīgue'i regua pejukapa 'rã avakue'i ikuai va'e. Pejukapa avi 'rã kunhague avakue reve nhogueronheno va'ekue.

18 Ha'e rã kunhague'i ha'e kunhataīgue'i avakue reve nhogueronheno e'ŷ teri va'e ma peja 'rã okuave aguã pendejeupe guarã.

Xondaro kuery ha'e mba'emo ogueru va'ekue oiky'a'opaa jevyague

19 — Sete ára re ranhe 'rã pendekuai tekoa gui mombyry'ia py. Mava'e rã rei peẽ kuery pejojuka, ha'e'ŷ vy omanogue re pepoko va'ekue ma pejeky'a'o uka 'rã mboapy araa py, ha'e gui sete araa py ju, penembiguairã peru va'ekue voi.

20 Peiky'a'o uka avi 'rã ao perekó va'e, mba'emo mymba rague gui ojapo pyre, kavara rague gui ha'e yvyra gui ojapo pyre ha'e javi — he'i.

21 Ha'e gui sacerdote Eleazar aipoe'i avi xondaro kuery joe opu'ã aguã katy oje'oi va'ekue pe:

— Po rami ma lei Moisés rupi SENHOR ojapo uka va'ekue.

22 Mba'emo ouro guigua, prata, overa va'e, ferro, estanho ha'e chumbo guigua,

23 opa mba'e tata py oĩ aguã ha'eve va'e ma pemboaxa 'rã tata rupi ha'eve va'e opyta aguã. Peiky'a'o avi 'rã yy joky'a'oa py. Ha'e rã mba'emo tata py oĩ aguã nda'evei va'e ma yy py rive 'rã peiky'a'o.

24 Ha'e gui sete araa py pejoipa 'rã pendeao, ha'eve va'e ju peiko aguã. Ha'e gui mae ma peike ju 'rã tekoa py.

Mba'emo ogueru pyre omboja'opa aguã re ijayvuague

²⁵ Ha'e gui SENHOR aipoe'ive ju Moisés pe:

²⁶ — Reipapa 'rã nhomba'ekue ogueru pyre, ha'e kuery va'e regua ha'e mymba kuery voi. Ndee ha'e sacerdote Eleazar peipapa 'rã, ha'e heta va'e kuery regua tamoī kuery ro pygua yvatekueve ikuai va'e guive.

²⁷ Pemboja'o 'rã mokoï henda katy joo rami meme. Peteï henda py ma xondaro kuery joe opu'ã aguã oje'oi va'ekue peguarã, ha'e rã amboae henda py ma heta va'e kuery ha'e javi peguarã.

²⁸ Ha'e gui SENHOR peguarã peipe'a avi 'rã xondaro kuery joe opu'ã aguã oje'oi va'ekue guigua. Quinhentos ikuai va'e nhavõ gui peteï 'rã peipe'a, ha'e kuery va'e regua, toro, mburika'i ha'e vexa'i kuery ikuai va'e gui.

²⁹ Xondaro kuery peguarã omboja'o pyre mbyte gui reipe'a va'ekue ma sacerdote Eleazar po py 'rã reme'ẽ, SENHOR pe ju omboaxa va'erã.

³⁰ Ha'e rã Israel kuery peguarã omboja'o pyre mbyte gui ma reipe'a 'rã cinqüenta ikuai va'e nhavõ gui peteï, ha'e kuery va'e regua gui, toro, mburika'i, vexa'i ha'e mymba kuery ha'e javi gui. Ha'e nunga remboaxapa 'rã levita kuery po py, SENHOR pembojerovia aty rupi ombo'eapo va'e peguarã — he'i.

³¹ Ha'e gui Moisés ha'e sacerdote Eleazar ojapopa SENHOR Moisés pe ojapo ukaague.

³² Xondaro kuery mba'emo ogueru va'ekue ha'e javi vy ma seiscentos e setenta e cinco mil vexa'i,

³³ setenta e dois mil toro,

³⁴ sessenta e um mil mburika'i,

³⁵ ha'e gui trinta e dois mil kunhague neï peteigüe ma avakue reve nhogueronheno e'ŷ teri va'e.

36 Ha'e gui joe opu'ã aguã katy oje'oi va'ekue peguarã omboja'o pyre ma trezentos e trinta e sete mil e quinhentos vexa'i ikuai.

37 Vexa'i kuery SENHOR peguarã omboaxa va'ekue ma seiscentos e setenta e cinco ha'e javi vy.

38 Toro ma trinta e seis mil. Ha'e va'e regua SENHOR peguarã omboaxa va'ekue ma setenta e dois.

39 Mburika'i kuery ma trinta mil e quinhentos. Ha'e va'e regua SENHOR peguarã ome'ẽ va'ekue ma sessenta e um.

40 Ha'e rã ha'e kuery va'e regua ma dezesseis mil. Ha'e va'e regua SENHOR peguarã omboaxa va'ekue ma trinta e dois.

41 Ha'e ramo sacerdote Eleazar po py ju Moisés omboaxa SENHOR peguarã ome'ẽ mbyre, Moisés pe ojapo ukaague rami vy.

42 Heta va'e kuery peguarã ju Moisés omboja'o joe opu'ã aguã katy oje'oi va'ekue ogueru va'ekue gui.

43 Heta va'e kuery peguarã omboja'o va'ekue ma trezentos e trinta e sete mil e quinhentos vexa'i,

44 trinta e seis mil toro,

45 trinta mil e quinhentos mburika'i,

46 ha'e gui ha'e kuery va'e regua ma dezesseis mil.

47 Ha'e gui Israel kuery peguarã omboja'o pyre mbyte gui ma cinqüenta ikuai va'e nhavõ gui Moisés oipe'a peteĩ, ha'e kuery va'e regua ha'e mymba kuery guive. Ha'e vy omboaxapa levita kuery SENHOR ombojeroviaaty rupi ombo'eapo va'e po py, Moisés pe SENHOR ojapo ukaague rami vy.

*Xondaro ruvixa kuery mba'emo onhenhandua'i
rami ome'ẽ okuapyague*

48 Ha'e gui Moisés-a py ovaẽmba okuapy xondaro kuery mbovy e'ŷ ikuai va'e ruvixa kuery, mil ha'e cem ikuai va'e capitão kuery voi.

49 Ha'e vy ha'e kuery aipoe'i okuapy ixupe:

— Ore nerembiguai kuery ma roipapapa avakue joe opu'ãa pygua ore kuery ropenaa va'e. Ha'e rã ha'e kuery va'e regua neĩ peteĩve ma ndoatai, ore kuery va'e regua ha'e rami ae avi.

50 Ha'e nunga rupi rogueru ma SENHOR pe rome'ẽ va'erã, peteĩ-teĩ rogueru rojou va'ekue regua gui, mba'emo ouro guigua, jyva regua, poapy regua, kuã regua, namixã ha'e mbo'y. SENHOR renonde py rogueru rojejavyague rojao'i uka aguã — he'i okuapy.

51 Ha'e ramo ha'e kuery gui Moisés ha'e sacerdote Eleazar ojopypa ouro guigua, mba'eta jegua ojapo porã mbyre meme ramo.

52 SENHOR pe ouro guigua mil ha'e cem rerekoa capitão kuery ogueru va'ekue poyikue ma cento e oitenta quilos raxa ha'e javi vy.

53 Mba'eta joe opu'ãa pygua kuery omba'erã mba'emo ojopy va'ekue meme.

54 ouro guigua mil ha'e cem rerekoa capitão kuery gui Moisés ha'e sacerdote Eleazar ojopy vy onhem-boaty aty ropy ju ogueru imoiny, SENHOR renonde py Israel kuery ima'endu'a riae aguã.

32

Ha'e kuery va'e regua amongue Jordão rovai re opytaxe okuapyague

1 Rúben ha'e Gade ramymino kuery ma heta ete oguereko guymba kuery. Ha'e kuery ma Jazer

ha'e Gileade yvy oexa rã mymba kuery ikuai aguã ha'eve.

² Ha'e rami vy Gade ha'e Rúben ramymino kuery ou okuapy Moisés pe ojerure aguã, sacerdote Eleazar ha'e heta va'e kuery yvatekueve reve. Ha'e vy aipoe'i okuapy:

³ — Ha'e gui yvy Atarote, Dibom, Jazer, Ninra, Hesbom, Eleale, Sebã, Nebo ha'e Beom,

⁴ ha'e va'e yvy pygua kuery Israel kuery renonde gui SENHOR oipe'apa ma va'ekue meme. Ha'e va'e yvy ma ha'eve mymba kuery ikuai aguã. Ha'e gui ore nerembiguai kuery ma orerymba va'e meme.

⁵ Xapy'a rei rã ndee rejou porã ri vy eme'ẽ ha'e va'e yvy ore nerembiguai kuery pe orevyrã. Oremboaxa eme Jordão yakã rovai katy — he'i okuapy.

⁶ Ha'e rami teĩ Gade ha'e Rúben ramymino kuery pe Moisés aipoe'i:

— Amboae regua kuery anho 'rã ty'y joe opu'ã aguã katy oje'oi, ha'e rã peẽ kuery ma apy ae 'rã pepytapa?

⁷ Mba'e re tu pejapo Israel kuery nda'ipy'a guaxuvei aguã rami, yvy SENHOR ha'e kuery pe ome'ẽ va'e py oo ve e'ŷ aguã?

⁸ Mba'eta ha'e rami ae avi penderu kuery ojapo raka'e, Cades-Barnéia gui amondouka jave py kova'e yvy oexa pota aguã.

⁹ Ha'e va'e kuery ma Escol yvy'ã guy katy peve ovaẽa py yvy oexapa ma vy ojapo okuapy Israel kuery nda'ipy'a guaxuvei aguã rami, yvy SENHOR ome'ẽ va'e oupity e'ŷ aguã.

¹⁰ Ha'e va'e árave SENHOR poxya hendy vy oura reve aipoe'i va'ekue orevy:

11 “Anhetē ete avakue vinte ma'etŷ va'e guive tujakue peve Egito gui oje'oi va'ekue ri peteñve ma ndoexai 'rã yvy Abraão pe, Isaque ha'e Jacó pe aura reve ame'ẽ aguã re xeayvuague, xenhe'ẽ rendua gui ojepe'apa rire.

12 Oexa va'erã ma quenezeu Jefoné ra'y Calebe anho, ha'e Num ra'y Josué avi, mba'eta ha'e kuery ma SENHOR nhe'ẽ rendua gui ndojepe'ai rire”, he'i va'ekue.

13 Ha'e rami vy SENHOR poxya Israel rovai rupi hendy vy quarenta ma'etŷ re ojapo ha'e kuery teko a e'ŷa rupi oguata rei aguã rami, SENHOR rovai opu'ã okuapy va'ekue omanomba peve.

14 Ha'e gui apy ju pendekuai avakue ojejavypa va'e regua. Peẽ kuery ju penderu kuery ojapoague rami ae avi pepu'ã pekuapy, pejapo aguã Israel rovai SENHOR ipoxyve aguã rami.

15 Mba'eta peẽ kuery napenhe'ẽ reduxei ramo teïgue ju ha'e oejapa 'rã kova'e kuery teko a e'ŷa py. Ha'e ramo peẽ kuery káuxa ae 'rã ha'e kuery okanhymba — he'i.

16 Ha'e ramo Moisés oña py ha'e kuery onhembo-jave jogueruvy vy aipoe'i okuapy:

— Ore kuery ma apy rojapo 'rã mymba kuery korarã, ha'e tetã orera'y kuery rekoarã.

17 Ha'e rã ore kuery ma orerembiporu rojopy vy rojapura reve 'rã roje'oi Israel kuery renonde rupi, ha'e kuery ikuai aguã py rogueraa peve. Orera'y kuery anho 'rã optya tetã ikorapa va'e py, yvy regua kuery ojuka e'ŷa aguã py.

18 Israel kuery peteñ-teñ oyvyrã va'ekue py ikuai pa e'ŷa ja ore kuery ndorojevyvei 'rã orero katy.

19 Mba'eta ore kuery ma ndorojopyi 'rã ha'e kuery reve yvy Jordão rovai re itui va'e regua, neñ henondeve katy ma voi, mba'eta ore ma Jordão kylvõ katy roguereko ae ma oreyvyrã, kuaray oua katy — he'i okuapy.

20 Ha'e ramo Moisés ombovai:

— Xapy'a rei ha'e nunga pejapo ri vy, ha'e SENHOR renonde rupi penerembiporu reve joe pepu'ã aguã katy peje'oi,

21 SENHOR renonde rupi peteñ-teñ penerembiporu reve Jordão rovai re peaxa, guenonde gui ngo-vauga kuery oipe'apa peve,

22 ha'e SENHOR renonde rupi ha'e va'e yvy re pendepo'akapa, ha'e rami ramo ma ha'eve 'rã pejevy ju aguã. Ha'e gui SENHOR ha'e Israel kuery renonde rupi pejapo ve'ÿ teñ ha'eve 'rã. Ha'e gui kova'e yvy ma pendekuai aguã 'rã itui SENHOR renonde.

23 Ha'e rã xapy'a rei ha'e rami e'ÿ ri pendekuai ramo ma ma'ë, SENHOR rovai ojejavy va'e 'rã peiko. Ha'e rami vy peikuua pejejavyague re pepaga 'rãe.

24 Ha'e nunga rupi pejapo tema tetã pendera'y kuery ikuai aguã, penerymba kuery korarã guive. Pejapopa e'ÿeme guive pendeayvuague — he'i.

25 Ha'e ramo Gade ha'e Rúben ramymino kuery ijayvu ju okuapy Moisés reve. Ha'e vy aipoe'i okuapy:

— Ndee oreruvixa, rejapo uka va'ekue meme 'rã ore nerembiguai kuery rojapo.

26 Orera'y kuery, orerajy kuery, orera'yxy kuery ha'e orerymba kuery ha'e javi opytapa 'rã apy tetã Gileade yvy re ikuai va'e py ae.

27 Ha'e rã ore nerembiguai kuery ma SENHOR renonde rupi 'rã roaxa orerembiporu reve meme, ndee oreruvixa aipo'reague rami vy — he'i okuapy.

28 Ha'e ramo ha'e kuery ojapo va'erã re Moisés ijayvu sacerdote Eleazar pe, Num ra'y Josué ha'e Israel kuery regua tamoĩ kuery ro pygua yvatekueve ikuai va'e ha'e javi pe.

29 Ha'e vy aipoe'i ha'e kuery pe:

— Gade ha'e Rúben ramymino kuery pende kuery renonde rupi ri Jordão rovai katy oaxa ramo, SENHOR renonde rupi peteĩ-teĩ guembiporu reve joe opu'ã aguã katy oo aguã, ha'e xapy'a rei ha'e va'e yvy re pendepo'akapa ri vy ma ha'e kuery pe peme'ẽ 'rã Gileade yvy ikuai aguã.

30 Ha'e rami teĩ xapy'a rei ha'e kuery guembiporu reve ndoaxai ri vy pende kuery reve, ha'e rami vy pende kuery pendekuaia mbyte rupi ae 'rã ha'e kuery ikuai, Canaã yvy re ae — he'i.

31 Ha'e ramo Gade ha'e Rúben ramymino kuery ombovai vy aipoe'i okuapy:

— Ore nerembiguai kuery pe SENHOR ijayvua rami tema rojapo 'rã.

32 Ha'e rami vy SENHOR renonde rupi roaxa 'rã Canaã yvy re orerembiporu reve. Ha'e rã oreyvyrã rojopy va'erã ma Jordão yakã kyvõ rami ae itui.

Deuteronômio 3.12-17

33 Ha'e rami rã Gade ha'e Rúben ramymino kuery, ha'e José ra'y Manassés ramymino kuery va'e regua mbytekue yvyrã ma Moisés ome'ẽ amorreu kuery ruvixa Seom ha'e Basã pygua hu-vixa Ogue openaague. Ha'e va'e yvy ome'ẽ tetã

ikuai va'e reve, mba'eta yvy ha'e javi rupi tetã ikuai.

³⁴ Ha'e gui Gade ramymino kuery ma ojapo Dibom tetã, Atarote ha'e Aroer,

³⁵ Atarote-Sofã, Jazer ha'e Jogbeá,

³⁶ Bete-Ninra ha'e Bete-Harã, tetã ikorapa va'e meme. Vexa'i kuery korarã voi ojapo.

³⁷ Ha'e gui Rúben ramymino kuery ma ojapo Hesbom, Eleale ha'e Quiriataim,

³⁸ Nebo, ha'e Baal-Meom hery oguerova va'e. Sibma voi ojapo. Tetã ha'e kuery ojapo va'e ma amboae rami meme omboery.

³⁹ Ha'e gui Manassés ra'y Maquir ramymino kuery ma Gileade yvy katy oje'oi vy ipo'aka. Amorreu kuery ha'e py ikuai va'ekue ma ha'e kuery oipe'apa.

⁴⁰ Ha'e rami vy Manassés ra'y Maquir kuery pe Moisés ome'ẽ Gileade yvy ha'e kuery ikuai aguã.

⁴¹ Ha'e va'e yvýry rupi tekao ikuai va'e ma Manassés ra'y Jair ae oo vy ojopypa. Ha'e va'e ma oenoĩ Havote-Jair.

⁴² Ha'e gui Noba oo vy ojopy Quenate, ijyvýry rupi tekao ikuai va'e guive. Ha'e va'e oenoĩ ju Noba, guery rupi ae.

33

*Egito gui ha'e kuery oẽmba guive ikuaiague rery
meme oĩa*

¹ Pova'e rupi ma Israel kuery Egito yvy gui oje'oi vy peteĩ-teĩ regua oxondaro kuery reve oguata jogueravyague, Moisés ha'e Arão ijayvua rami meme.

² Moisés ombopara oguata oje'oivya nhavõ, SENHOR ijayvua rami vy. Pova'e rupi ha'e kuery oguata, oje'opia nhavõ rupi.

³ Ramessés tetā gui oje'oi jaxy jypyra re quinze araa py. Páscoa ára rire ko'ẽ jevy ma Israel kuery oguata oje'oivy ipy'a guaxu reve, Egito pygua kuery ha'e javi oexaa gui,

⁴ Egito pygua gua'y jypykue onhono porã teri okuapya ja, ha'e kuery mbyte rupi SENHOR ojukapa rire. Ha'e kuery ruete ra'angaa re voi SENHOR ombou imbopagaarã.

⁵ Ha'e gui Ramessés tetā gui Israel kuery oje'oi vy ikuai ranhe Sucote py.

⁶ Sucote gui oje'oi vy ma ikuai ranhe Etā py, tekoa e'ŷa apy'i py.

⁷ Etā gui oje'oi vy ojeapa oje'oivy vy Pi-Hairote py ju ikuai, Baal-Zefom katy'i peve. Ha'e vy ikuai ju ranhe Migdol rexei'i.

⁸ Ha'e gui Pi-Hairote gui oje'oi ju vy ye'ẽ oĩ va'e mbyte rupi oaxa oje'oivy tekao e'ŷa katy oje'oi vy. Ha'e gui mboapy ára re tekao e'ŷa Etā rupi oguata rire ma opyta ju ranhe Mara py.

⁹ Mara gui oje'oi jevy vy ova okuapy Elim py. Ha'e gui Elim py ma doze ygua oĩ, setenta pindo avi ikuai. Ha'e py ju opyta ranhe.

¹⁰ Elim gui oje'oi vy Ye'ẽ Pytā rembe'i rupi ju opyta.

¹¹ Ye'ẽ Pytā gui oje'oi vy Sim tekao e'ŷa py ju opyta.

¹² Sim gui oje'oi vy Dofca py ju opyta.

¹³ Dofca gui oje'oi vy ma Alus py ju opyta.

¹⁴ Alus gui oje'oi vy ma Refidim py ju opyta, teĩ ha'e py ma nda'ipoi yy ha'e kuery oy'u aguã.

¹⁵ Refidim gui oje'oi vy Sinai regua tekao e'ŷa py ju opyta.

- 16** Sinai regua tekao e'ŷa gui oje'oi vy ma Quibrote-Hataavá py ju opyta.
- 17** Quibrote-Hataavá gui oje'oi vy Hazerote py ju opyta.
- 18** Hazerote gui oje'oi vy Ritma py ju opyta.
- 19** Ritma gui oje'oi vy Rimom-Perez py ju opyta.
- 20** Rimom-Perez gui oje'oi vy Libna py ju opyta.
- 21** Libna gui oje'oi vy Rissa py ju opyta.
- 22** Rissa gui oje'oi vy Queelata py ju opyta.
- 23** Queelata gui oje'oi vy Sefer yvyty py ju opyta.
- 24** Yvyty Sefer gui oje'oi vy Harada py ju opyta.
- 25** Harada gui oje'oi vy Maquelote py ju opyta.
- 26** Maquelote gui oje'oi vy Taate py ju opyta.
- 27** Taate gui oje'oi vy Tera py ju opyta.
- 28** Tera gui oje'oi vy Mitca py ju opyta.
- 29** Mitca gui oje'oi vy Hasmona py ju opyta.
- 30** Hasmona gui oje'oi vy Moserote py ju opyta.
- 31** Moserote gui oje'oi vy Bene-Jaacā py ju opyta.
- 32** Bene-Jaacā gui oje'oi vy Hor-Hagidgade py ju opyta.
- 33** Hor-Hagidgade gui oje'oi vy Jotbatá py ju opyta.
- 34** Jotbatá gui oje'oi vy Abrona py ju opyta.
- 35** Abrona gui oje'oi vy Eziom-Geber py ju opyta.
- 36** Eziom-Geber gui oje'oi vy Zim regua tekao e'ŷa regua py ju opyta. Ha'e va'e ma Cades ae.
- 37** Cades gui oje'oi vy ma Hor yvyty py ju opyta, Edom yvy apy'i py.

Números 20.22-29

- 38** Ha'e gui sacerdote Arão ma SENHOR ijayvuague rami vy oẽ ov yvyty re. Ha'e py ae omano, quarenta ma'etŷ re ma Israel kuery Egito yvy gui oje'oipa rire, peteĩ nhiruĩ jaxy, ijypy'ia ára py.

39 Arão ma cento e vinte e três ma'etŷ oguerekoa py omano Hor yvyty re.

40 Ha'e gui cananeu Arade pygua huvixa oendu Israel kuery oupa ta maa. Ha'e va'e ma Canaã yvy regua kuaray puku-a katy oiko va'e.

41 Ha'e gui Hor yvyty gui ha'e kuery oje'oi vy Zalmona py ju opyta.

42 Zalmona gui oje'oi vy Punom py ju opyta.

43 Punom gui oje'oi vy Obote py ju opyta.

44 Obote gui oje'oi vy Ijé-Abarim py ju opyta, Moabe yvy apy'i py.

45 Ijé-Abarim gui oje'oi vy Dibom-Gade py ju opyta.

46 Dibom-Gade gui oje'oi vy Almom-Diblataim py ju opyta.

47 Almom-Diblataim gui oje'oi vy yvyty Abarim py ju opyta, Nebo katy'i.

48 Yvyty Abarim gui oje'oi vy opyta ju Moabe yvy ka'aguy e'ŷa rupi, Jordão yvýry, Jericó tetã rexei.

49 Ha'e gui Jordão yakã yvýry opyta ranhe okuapy, Bete-Jesimote guive Abel-Sitim oĩa peve, Moabe yvy ka'aguy e'ŷa rupi.

Canaã yvy regua kuery Nhanderuete oipe'a uka-paague

50 Ha'e gui SENHOR aipoe'i Moisés pe, Moabe yvy ka'aguy e'ŷa rupi ha'e kuery ikuai jave, Jordão yakã yvýry, Jericó tetã rexei:

51 — Ndeayvu ke Israel kuery pe. Ha'e vy aipo're: Jordão yakã peaxapa ma vy Canaã yvy katy peje'oi ma jave

52 penerenonde katy gui peipe'apa 'rã ha'e va'e yvy regua kuery. Pembovaipa 'rã ita ta'angaa oĩa va'e ha'e javi, ta'angaarã mba'emo ryku gui ha'e

kuery ojapo va'ekue voi. Peitypa 'rã yvy'ã rupi ombojerovia atyrã ojapo va'ekue.

⁵³ Ha'e va'e yvy pejopypa 'rã penemba'erã, ha'e py ae pendekuai aguã, mba'eta ha'e va'e yvy ae ame'ẽ pendeyvyrã.

⁵⁴ Xortea pexaa rami 'rã pemboja'o yvy, pendera'y kuery peteĩ-teĩ mbovy pa ikuiaia rami vy. Hetave va'e regua pe ma tuvixave va'e 'rã peme'ẽ ijyvyrã, ha'e rã mboapy'ive va'e pe kyrïve'i va'e 'rã peme'ẽ ijyvyrã. Xorte pexaa rami ae 'rã opyta peteĩ-teĩ peguarã. Penderu kuery guigua peteĩ-teĩ regua mbovy pa ikuiaia rami 'rã pejopy pendeyvyrã.

⁵⁵ Ha'e rami avi penerenonde gui yvy regua kuery ndapeipe'apai ri ramo peẽ kuery mbyte py opyta va'ekue ma penderexa py juu haxy va'e rami 'rã ikuai, penderyepy rupi hakua va'e oña rami 'rã pendu. Ha'e rami vy penemoangekoarã rive 'rã opyta yvy pendekuaia re.

⁵⁶ Ha'e gui pendere ju ajapo 'rã ha'e kuery re ajapo aguã re anhembopy'aague.

34

Ijyvy apy ikuai va'e re ijayvuague

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Canaã yvy re pevaẽmba ma rire itui 'rã penderekooarã, Canaã yvy ae, ijapya'i nhavõ peve.

³ — Yvy kuaray puku-a katy itui va'e re pendekuai 'rã Zim regua tekoa e'ÿa regua guive Edom yvy apy'i peve. Kuaray puku-a katy pendeyvy oo 'rã ye'ẽ apy guive kuaray oua katy.

⁴ Ha'e va'e apy ma ojeapa 'rã ov ykuaray puku-a katy rupi, Acrabim yvy'ã katy, ha'e gui ma oaxa ju 'rã Zim peve. Ha'e gui ma oo 'rã Cades-Barnéia kuaray puku-a katy rupi. Ha'e vy Hazar-Adar katy oẽ vy Azmom peve 'rã oaxa.

⁵ Ha'e va'e apy ma Azmom gui ojeapave 'rã ov y Egito katy'i yakã'i oĩ va'e rembe peve. Ha'e gui oove 'rã ye'ẽ rembe'i peve ae.

⁶ — Ha'e gui kuaray olkea katy rupi pendeyvy apyrã ma ye'ẽ tuvixave va'e rembe 'rã opyta. Ha'e va'e ae 'rã opyta pendeyvy apy kuaray olkea katy rupi.

⁷ — Pova'e ma ijapy kuaray ijapu'a'ia katy rupi: ye'ẽ tuvixave va'e guive oaxa 'rã Hor yvyty peve.

⁸ Ha'e gui Hor yvyty guive ma oo 'rã Hamate py nhavaẽa'i peve. Ha'e va'e apy ma Zedade peve 'rã oo.

⁹ Ha'e va'e gui ma oo 'rã Zifrom peve, ha'e gui opaa ma Hazar-Enã py 'rã opyta. Ha'e va'e ae ma ijapy kuaray ijapu'a'ia katy rupi oo va'e.

¹⁰ — Ha'e gui kuaray oua katy rupi ijapy oo 'rã Hazar-Enã guive Sefã peve.

¹¹ Ha'e gui Sefã guive oguejy 'rã Ribla peve, Aim kuaray oua katy rupi ae. Ha'e gui ma oguejyve vy oo 'rã Quinerete ye'ẽ rembe rupi kuaray oua katy rupi.

¹² Ha'e gui oguejyve 'rã ov y Jordão yakã rembe ha'e javi rupi, ha'e gui ye'ẽ rembe py ju 'rã opa. Ha'e va'e ae 'rã pendeyvyrã itui, ijapya'i ha'e javi peve — he'i.

¹³ Ha'e gui Moisés ijayvu Israel kuery pe. Ha'e vy aipoe'i:

— Kova'e yvy ma pendeyvyrã xortea pexaa rami pejopy va'erã, nove regua pe ha'e peteĩ regua mbytekue ikuai va'e pe ju SENHOR ome'ẽ uka va'ekue.

¹⁴ Mba'eta Rúben ha'e Gade ramymino kuery ma oyvyrã ojopy ae ma okuapy guamoĩ ro pygua kuery mbovy pa ikuiaia rami vy. Ha'e gui Manassés kuery regua mbytekue voi ojopy ma avi oyvyrã.

¹⁵ Ha'e va'e mokoĩ regua ha'e peteĩ regua mbytekue ikuai va'e ju ojopy ae ma okuapy oyvyrã Jordão yakã kyvõ rami, Jericó tetã rexei, kuaray oua katy ae.*

Yvy mboja'oarã kuery rery oĩa

¹⁶ Ha'e gui SENHOR aipoe'ive ju Moisés pe:

¹⁷ — Pova'e avakue ae ma yvy mboja'oarã ikuai. Hery ma sacerdote Eleazar ha'e Num ra'y Josué.

¹⁸ Peteĩ-teĩ regua gui peiporavo avi 'rã peteĩ huvixa, yvy mboja'oarã.

¹⁹ Ha'e va'e avakue rery ma po rami: Judá kuery va'e regua ma Jefoné ra'y Calebe,

²⁰ Simeão ramymino kuery va'e regua ma Amiúde ra'y Samuel,

²¹ Benjamim kuery va'e regua ma Quislom ra'y Elidade,

²² Dã ramymino kuery va'e regua ma Jogli ra'y huvixa Buqui,

²³ José ra'y Manassés ramymino kuery va'e regua ma Éfode ra'y huvixa Haniel,

* ^{34:15} Kova'e kuaxia py ma “Jordão kyvõ rami” he'ia ma Jordão yakã regua kuaray oua katy yvy itui va'e re ijayvu vy, mba'eta ha'e py teri ha'e kuery ikuai.

- ²⁴ Efraim ramymino kuery va'e regua ma Siftā ra'y huvixa Quemuel,
²⁵ Zebulom ramymino kuery va'e regua ma Par-naque ra'y huvixa Elizafã,
²⁶ Issacar ramymino kuery va'e regua ma Azã ra'y huvixa Paltiel,
²⁷ Aser ramymino kuery va'e regua ma Selomi ra'y huvixa Aiúde,
²⁸ Naftali ramymino kuery va'e regua ma Amiúde ra'y huvixa Pedael — he'i.
²⁹ Ha'e va'e kuery pe ae SENHOR omboja'o uka Canaã yvy Israel kuery rekoarã.

35

Levita kuery pegua tetã re ijayvuague

¹ SENHOR aipoe'ive ju Moisés pe, Moabe yvy ka'aguy e'ÿa py ha'e kuery ikuai jave, Jordão yakã yvýry, Jericó tetã rexei:

² — Ndeayvu ke Israel kuery pe, amongue tetã ha'e kuery yvy re ikuai va'e ome'ẽ aguã levita kuery rekoarã. Petei-tei tetã yvýry rupigua ome'ẽ avi'rã levita kuery yvyrã, guymba kuery oguereko aguã.

³ Ha'e va'e tetã py ae 'rã ha'e kuery ikuai. Ha'e rã ijyvýry rupi ma vaka, vexa'i ha'e guymba kuery ha'e javi 'rã oguereko.

⁴ Tetã ikuai va'e yvýrykue levita kuery pe ome'ẽ va'erã va'e ma tetã kora guive oo 'rã mombyry'i, quatrocentos e cinqüenta metros peve tetã yvýry ha'e javi rupi.

5 Tetā gui mombyrya py kuaray oua katy rupi ma pe'a' rā novecentos metros, ha'e gui kuaray pukua katy rupi, oikea katy, ha'e kuaray ijapu'a'ia katy rupi ma novecentos metros ju 'rā pea'ā. Ha'e va'e mbyte py oī 'rā tetā. Ha'e rami ae 'rā peteī-teī tetā yvýrykue oī.

6 — Levita kuery pe tetā peme'ē va'e regua ma mboapy meme tetā opyta 'rā onhemí atyrā. Ha'e va'e ma peiporavo 'rā jojuka rive va'ekue onhemí aguā. Ha'e va'e áryve levita kuery pe peme'ēve 'rā quarenta e dois tetā.

7 Levita kuery pe tetā peme'ē va'erā ma quarenta e oito tetā ha'e javi vy, ijvýrykue reve.

8 Ha'e gui tetā Israel kuery mba'e regua levita kuery pe peme'ē va'erā va'e ma xapy'a rei peteī regua heta raxa ri ikuai ramo ma levita kuery pe heta 'rā pemboaxa tetā. Ha'e rā xapy'a rei peteī regua ndaetai ramo mboapy'i 'rā pemboaxa levita kuery pe. Peteī-teī regua guetā mbovy pa ojopyague rami amongue ome'ē 'rā levita kuery pe ikuai aguā.

Deuterônômio 4.41-43; 19.1-3

9 Ha'e gui SENHOR aipoe'ive ju Moisés pe:

10 — Ndeayvu ke Israel kuery pe, ha'e vy aipo're: Canaã yvy re pevaẽ aguā Jordão yakã peaxa ma vy
11 amboae tetā ju 'rā peiporavo onhemia atyrā, ha'e va'e py jojuka rive va'ekue oike 'rā onhemí aguā.

12 Ha'e va'e tetā perekó 'rā jouguy moẽare onhemí aguā imbopagaarā va'e gui, heta va'e kuery mbyte py jojuka rive va'ekue ojukaa e'ŷ aguā ojexa uka e'ŷ mbove onhemboayvu uka aguā.

¹³ Mboapy meme tetā peiporavo 'rā onhemia atyrā.

¹⁴ Ha'e va'e tetā va'e regua ma mboapy peme'ē 'rā Jordão kyvō rami oĩ va'e, ha'e rā amboae mboapy va'e ma Canaã yvy re 'rā oĩ, tetā onhemia atyrā ae oĩ aguã.

¹⁵ Ha'e va'e mboapy meme tetā ma Israel kuery pe opyta 'rā onhemi atyrā, ha'e amboae regua kuery pe guive, ha'e kuery mbyte rupi ovaẽ va'ekue pe, ha'e va'e tetā py jojuka rive va'ekue onhemi aguã.

Deuteronômio 19.11-13

¹⁶ — Ha'e gui amongue tembiporu ferro guigua py mba'e nhonupā rā omano ramo hembiporu revegua pe “Jojukaare” peje 'rā. Ha'e ramo jojukaare ma guive rā pejuka 'rā.

¹⁷ Ha'e'ŷ vy amongue opo py ita oguereko va'e py amboae ojapi 'rā omano aguã rami. Ha'e va'e pe voi “Jojukaare” peje 'rā. Ijukaare ramo pejuka 'rā.

¹⁸ Ha'e'ŷ vy amongue opo py yvyra oguereko va'e py amboae oinupā 'rā omano aguã rami. Ha'e va'e pe voi “Jojukaare” peje 'rā. Ijukaare ramo pejuka 'rā.

¹⁹ Jouguy moẽare reve joepyarā ou va'ekue nhovaexī vy ojuka 'rāe.

²⁰ Ha'e gui xapy'a rei amongue nhomoanha 'rā nda'iporayvui vy, ha'e'ŷ vy amongue ojukaxe vy mba'emo hexe omombo 'rā omano aguã rami,

²¹ ha'e rami e'ŷ vy ija'ea rupi e'ŷ opo py ae ouna 'rā omano aguã rami. Ha'e ramo pejuka 'rā ijukaare, jojukaare ramo. Jojukaare reve joepyarā ou va'ekue nhovaexī vy ojuka 'rā.

Deuteronômio 19.4-10

²² — Ha'e gui xapy'a rei amongue potae vy

e'ŷ nhomoanha xapy'a 'rã, ha'e'ŷ vy mba'emo omombo rive 'rã hexe ojukaxe vy e'ŷ.

²³ Ha'e'ŷ vy oexa e'ŷ re hi'áry ita oity rive ramo omano 'rã, hovaigua e'ŷ oiko, neĩ ixupe ojapo vaixe rei e'ŷ teĩ.

²⁴ Ha'e ramo ma heta va'e kuery ha'e javi oikuaa pota 'rã okuapy jojukaare ha'e joepyarã ou va'e re, kova'e lei oĩ rami vy ae.

²⁵ Ha'e rami vy joepyarã ou va'ekue po gui ogueraa jepe 'rã okuapy jojukaare, hekoá katy'i tetã onhemia aty oĩ va'e katy omondouka vy, ha'e py onhemi aguã. Ha'e py ae 'rã jojukaare opyta, sacerdote yvateve va'erã azeite iky'a e'ŷ va'e py omoĩ mbyre omano e'ŷa ja.

²⁶ Ha'e rã xapy'a rei jojukaare tetã onhemi aguã ooague gui oẽ ri ramo

²⁷ ha'e va'e tetã gui mombyrya py joepyarã ojou vy jojukaare ojuka teĩ napembopagai 'rã huguy omoëague re.

²⁸ Tetã onhemiaty py ae jojukaare opyta 'rãgue sacerdote yvateve va'e omano e'ŷa ja. Ha'e gui sacerdote omano ma rire jojukaare ojevy ju 'rã oyvy py.

²⁹ Ha'e va'e ma penderekorã ombopara pyre, peneramymino kuery ikuai va'erã pe guive, penderekoa ha'e javi rupi.

³⁰ — Jojukaague hexaare kuery omombe'u ramo mae ma jojukaare pejuka 'rã. Peteĩ'i ri hexaare oiko ramo ma nda'evei 'rã pejuka aguã.

³¹ Jojukaare omano aguã rami oiko rire ma nda'evei 'rã pemboekovia uka aguã. Pejuka 'rãe.

³² Ha'e rami ae avi xapy'a rei tetã py onhemi oikovya gui ojevy ju 'rã oyvy re ae, sacerdote

yvateve va'e omano e'ŷ mbove ma voi. Ha'e va'e voi napemboekovia ukai 'rā,

³³ pejapo e'ŷ aguā yvy pendekuaia ha'eve'ŷ va'e itui aguā rami, mba'eta jouguy omoēague ma ojapo 'rā yvy ha'eve'ŷ va'e itui aguā rami. Peteīve henda py pendeyvy ndapeiky'a'oi jouguy omoēague gui, jouguy moēare ruguy pemoē e'ŷ vy.

³⁴ Ha'e nunga rupi pejapo eme yvy pendekuaia ha'eve'ŷ va'e opyta aguā rami, ha'e va'e mbyte rupi xee aiko avi ramo. Mba'eta xee SENHOR aiko Israel kuery mbyte.

36

Kunhague yvy jopyare omenda aguā re ijayvuague

¹ Ha'e gui Moisés oña py ovaẽmba okuapy Gileade ramymino kuery huvixa ikuai va'e. Gileade ma Maquir ra'y, Maquir ma Manassés ra'y, Manassés ma José ra'y. Ha'e gui ha'e kuery ijayvu okuapy Moisés ha'e Israel kuery ruvixa ikuai va'e renonde py.

² Ha'e vy aipoe'i okuapy:

— Oreruvixa, ndevy SENHOR ojapo ukaague rami vy kova'e yvy xortea oexaa rupi reme'ẽ uka va'ekue Israel kuery yvyrā. Ha'e gui oreruvixa, SENHOR ijayvuague rami ae avi rejapo va'ekue oreryke'y Zelofeade yvykue tajy kuery pe juomboaxaa aguā rami.*

³ Ha'e rami teĩ xapy'a rei ha'e va'e kuery omenda 'rā Israel kuery regua mboae re. Ha'e ramo ma ha'e kuery yvyrā ojopy va'ekue oipe'aa 'rā

* **36:2** Números 27.1-11

oreramoī kuery yvykue gui, ha'e omboaxaa 'rā amboae regua mba'erā, ime kuery regua mba'e ae. Ha'e rami 'rā oipe'aa orevyrā xortea oexaa rupi rojopy va'ekue gui.

⁴ Mba'eta jubileu ma'etŷ Israel kuery pegua oje-upity nhavō ma kunhague yvyrā ojopy va'ekue oaxa 'rā ime kuery regua pe ae.* Ha'e rami vy oyvyrā ojopy va'ekue oipe'aa 'rā oreramoī kuery regua yvykue gui — he'i okuapy.

⁵ Ha'e ramo Moisés ijayvu Israel kuery pe, SENHOR ojapo ukāa rami vy. Ha'e vy aipoe'i:

— José ramymino kuery va'e regua ma anhetē rupi meme ijayvu.

⁶ Mba'eta po rami ae SENHOR oeja va'ekue Zelofeade rajy kuery pe. Aipoe'i va'ekue: “Ha'e kuery pe ma ha'eve amongue va'e re rei omenda aguā teī guamoī ramymino kuery regua re anho.

⁷ Ha'e rami vy Israel kuery peteī-teī regua mba'e yvy ndoaxai 'rā amboae regua mba'erā. Mba'eta Israel kuery ikuai 'rā guamoī kuery mba'ekue yvy py ae.

⁸ Xapy'a rei Israel kuery peteī regua tajy ombo'erā ojopy 'rā guamoī kuery yvykue. Ha'e rami vy omenda 'rā guamoī ramymino kuery regua re ae, Israel kuery peteī-teī ikuai aguā guamoī kuery yvykue py.

⁹ Ha'e rami vy peteī-teī regua oyvyrā ojopy va'ekue gui ndoaxai 'rā amboae regua pe. Mba'eta Israel kuery peteī-teī ikuai 'rā guamoī kuery yvykue py ae”, he'i va'ekue.

¹⁰ Moisés pe SENHOR ojapo ukaague rami ae Zelofeade rajy kuery ikuai.

* **36:4** Levítico 25.8-34

11 Ha'e rami vy Zelofeade rajy kuery Macla, Tirza, Hogla, Milca ha'e Noa ma otuty ra'y kuery re meme omenda,

12 José ra'y Manassés ramymino kuery va'e regua re ae omendapa. Ha'e rami vy oyvyrã ojopy va'ekue opytapa tamoĩ ramymino kuery regua mba'e ae.

13 Ha'e va'e ayvu ha'e javi SENHOR oeja va'ekue Moisés pe Israel kuery rekorã, Moabe yvy ka'aguy e'ÿa py ikuai jave, Jordão yakã yvýry, Jericó tetã rexei.

cli

Nhanderuete ayvu iky'a e'ŷ va'e New Testament in Guarani, Mbyá

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guarani, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clii

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

3309fa3b-7590-5ae9-b829-5df4ddfbf957